

Tti Jian Joajné Jesucristo Que Dicjin Mateo

*Cain niñançhen de ixin Jesucristo
(Lc. 3.23-38)*

¹ Jihí ná lista de cain niñançhen de ixin Jesucristo. Jehé Jesucristo joixin de ngain razé chojní David co de Abraham.

² Abraham cjoí ndodé Isaac, co Isaac cjoí ndodé Jacob, co Jacob cjoí ndodé Judá conixin cainxin xanchó Judá.

³ Judá cjoí ndodé Fares co Zara, co janné na cjoí Tamar. Fares cjoí ndodé Esrom, co Esrom cjoí ndodé Aram.

⁴ Aram cjoí ndodé Aminadab, co Aminadab cjoí ndodé Naasón, co Naasón cjoí ndodé Salmón.

⁵ Salmón cjoí ndodé Booz co janné Booz cjoí Rahab. Booz cjoí ndodé Obed co janné Obed cjoí Rut. Obed cjoí ndodé Isaí.

⁶ Isaí cjoí ndodé rey David, co rey David cjoí ndodé Salomón, co janné Salomón icha saho cjoí jan nçhiçhihi ná tattíta que vinhi Urías.

⁷ Salomón cjoí ndodé Roboam, co Roboam cjoí ndodé Abías, co Abías cjoí ndodé Asa.

⁸ Asa cjoí ndodé Josafat, co Josafat cjoí ndodé Joram, co Joram cjoí ndodé Uzías.

⁹ Uzías cjoí ndodé Jotam, co Jotam cjoí ndodé Acáz, co Acáz cjoí ndodé Ezequías.

¹⁰ Ezequías cjoí ndodé Manasés, co Manasés cjoí ndodé Amón, co Amón cjoí ndodé Josías.

¹¹ Josías cjoí ndodé Jeconías conixin cainxin xanchó Jeconías. Co ngain tiempo mé chojni Babilonia savicao cain chojni Israel para ngain nonttehe Babilonia de esclavo.

¹² Después de mé Jeconías cjoí ndodé Salatiel, co Salatiel cjoí ndodé Zorobabel.

¹³ Zorobabel cjoí ndodé Abiud, co Abiud cjoí ndodé Eliaquim, co Eliaquim cjoí ndodé Azor.

¹⁴ Azor cjoí ndodé Sadoc, co Sadoc cjoí ndodé Aquim, co Aquim cjoí ndodé Eliud.

¹⁵ Eliud cjoí ndodé Eleazar, co Eleazar cjoí ndodé Matán, co Matán cjoí ndodé Jacob.

¹⁶ Jacob cjoí ndodé José tti cjoí xixihi María, co María cjoí janné Jesús, que dinhi Cristo, tti Dios rroanha.

¹⁷ Jañá cjoí catorce ndodaha desde Abraham hasta rey David co de rey David icatorce ndodaha hasta are chojni Israel cjoí na ngain Babilonia de esclavo, co iná catorce ndodaha de are mé hasta are concjihi Cristo.

Are concjihi Jesucristo

(Lc. 2.1-7)

¹⁸ Janhi conhe para concjihi Jesucristo: janné Jesús, María, ovechonda compromiso ngain José para rrocottehe. Co saho de rroguinttecao chó na, María oveyá chjan de ixin joachaxín Espíritu Santo.

¹⁹ José, tti joigoan xixihi María, cjoí ná xí jian de ngain Dios, co jehe joinaoha coequin chijni de ixin María. Jehe ijoinaoha rroguerca María. Mexinxin jehe xaxaon que irrocjanha ngain María. Jehe joinaoha conohe icha chojni que ixin jehe na ijeha novio na, mexinxin jehe xaxaon jañá.

²⁰ Co are José jiḡaxaon jañá, ná ángel de Dios joí ngain cottačhin are tajjioa José co ángel mé ndačo:

—José, jaha tti razé David, ḡaonha que ixin María soan čhiha, ixin chjan que jehe rrochonda joixin xan de ngain Espíritu Santo.

²¹ Jehe sincheconcjihi ná xanxí, co jaha sincheguinho xan JESÚS. Sinhi xan jañá ixin jehe xan tsjenga xan hna cainxin tti jianha que nchehe chojní xan.

²² Cain yá conhe para que joiconhe tti dindačo Dios ngain profeta que nichja:

²³ Ná xannčí que ḡa ḡonhi xí catte, xan mé xan seyá chjan,

co are tsoncjihí chjan mé, sinhi xan Emanuel, co mé rročo: Dios jí ngayá na.

²⁴ Are José xingamehe de cottačhin, jehe joinchehe inchin coetonha ángel de Dios co vayé María para čhihi.

²⁵ Pero vintteha na junto hasta que María joincheconcjihi xenhe que veyá. Co joincheguinho xan JESÚS.

2

Are tti ní xí sabio joitsjehe Jesús

¹ Jesús concjixin ngain rajna Belén, ngain nonttehe Judea are Herodes vehe rey ngain nontte mé. De ngain iná nontte icha oriente vinttequixin ní xí para ngain ciudad de Jerusalén. Co canio xí mé de ixin conotse vagatsoanxin xa de ixin quehe siconhe ngataha nontte,

² co nttiha joanchiangui xa:

—¿Quettinó jí tti rey de chojni judío que ocon-
cijihi? Janha na desde ngain lado oriente viconxin
na conotsé rey mé, co jai janha na joihi na nttihi
para sinttasayá na rey mé.

³ Are rey Herodes conohe jihi, jehe veva con-
tento, jehe conixin cain chojni que te ngain
Jerusalén.

⁴ Cottimeja jehe rey Herodes vayé cain xidána
que vaquetonha ngain icha xidána, co cain xi-
maestroé ley, co jehe rey joanchiangui ngain cain
nimé ixin ttinó tsoncjixin Cristo, tti Dios rror-
roanha.

⁵ Jehe na vinttendačo na:

—Ngain rajna Belén ngain nonttehe Judea, ixin
profeta dicjin janhi:

⁶ Co jaha, rajna Belén que rrihi ngain nonttehe
Judá,

jaha tti icha importante de cainxin rajna que tte-
tonha nttiha,
ixin de nganji sačhjexin ná xí que tsetonha,
co xí mé tti senda chojnina Israel.

⁷ Cottimeja Herodes jimao vayé canio xí que
vinttequixin de lado oriente co joanchiangui
Herodes ngain xa ixin quexehe nchanho mero
řago conotse mé.

⁸ Cottimeja Herodes coetonhe canio xí mé para
cjoí xa ngain rajna Belén co ndačo ngain xa:

—Ttji ra nttiha, co danchiangui ra jian ttinó jí
chjan yá. Co are osinchí ra xan, nchenona ra para
que janha cai tsji sinttasayá xan.

⁹ Conixin tti ndačo rey jihi, canio xí mé sav-
inttecji xa. Co tti conotse que vintteguicon xa de
ngain lado oriente jitaon va nttiha dirección de tti

tettji xa hasta que tavehe va dirección de ngain lugar tti jí xanxichjan.

¹⁰ Are canio xí mé vintteguicon xa conotse mé, anto vintteché xa;

¹¹ co are vintteguixinhi xa nchia tti jí xanxichjan ngain janné xan, María, canio jehe xa vinttettoxin nntajochjihi xa co joinchesayehe xa xanxichjan. Cottimeja vanttjé xa canxion caja que joicao xa para joinchetoen xa xanxichjan oro, co tsjoca, co iná cosa que dinhi mirra, que chojni vanchegonda inchin perfume.

¹² Cottimeja canio xí mé vitonhe xa ngain cottačhin que ixin irrocjanha xa ngain Herodes, mexinxin ojé nttiha savinttecjanxin xa para ngain nacioen xa.

Are María co José savicao na xanxichjan para Egipto

¹³ Después de savinttecji jehe tti canio xí que vinttequixin de ngain lado oriente, are tajjioa José, ná ángel de Dios joí ngain cottačhín José co ndačho ángel mé:

—Dingattjen co sattingacoho xanxichjan conixin janné xan. Sattji ra para ngain nonttehe Egipto co tadintte ra nttiha hasta que janha rronhattjo ra, ixin Herodes tsjé xanxichjan para nasoenxon xan.

¹⁴ Cottimeja vingattejen José conixin María para sajoicao na xanxichjan de ttie para Egipto.

¹⁵ Nttiha vintte na hasta que ndavenhe Herodes. Jañá conhe para joiconhe tti dindačho Dios ngain profeta, co jehe profeta dicjin: “De ngain nonttehe Egipto vayaxin Xanhna.”

Are coetonha Herodes para venhe cain xanxichjan

¹⁶ Are Herodes conohe ixin tti canio xí que vinttequixin de ngain lado oriente icjanha xa ngain inchin jehe coetonha xa, jehe anto coñao co coetonha xisoldadoe para nasoenxon xa cainxin xanxichjan que vinttechonda de yó nano para nontte que vintte ngain rajna Belén conixin xanvintte ngain icha rajna ngandanji Belén inchin tti tiempo que vinttendaçho canio xí que vinttequixin de ngain lado oriente.

¹⁷ Jañá joiconhe tti diquentaxin profeta Jeremías:

¹⁸ Coinhi ni ná tté chojni de ngain ciudad de Ramá, que tsjanga co ta joachjaon.

Co mé Raquel tti vatsjangaxin xenhe,
co vaçhoha para que iná chojni rrogantsjehe
joachjaon mé

ixin cain xenhe ondavintteguenhe xan.

¹⁹ Pero después de ndavenhe Herodes, ná ángel de Dios joí ngain cottaçhin are José tajjioa ntthiha ngain Egipto, co ndaçho ángel mé ngain José:

²⁰ —Dingattjen co sacjancoho xanxichjan conixin janné xan para ngain nontte Israel ixin ondavintteguenhe tti chojni que joinao narrogoenxon xanxichjan.

²¹ Cottimeja vingattjen José co sajoicao xanxichjan conixin janné xan para ngain nontte Israel.

²² Pero are conohe José ixin Arquelao tti jitte-tonha ngain Judea en lugar de Herodes, ndodé

jehe Arquelao, José xaon para rrocji nttiha. Mexinxin jehe vitonhe ngain cottačhin para sacjoi ngain regioen Galilea.

²³ Are jehe joiji nttiha, jehe sajoiguehe ngain rajna Nazaret. Jihi conhe para joiconhe tti vinttendačo profeta que Jesús sinhi nazareno.

3

*Juan ndache chojni ngagaha jna joajné Dios
(Mr. 1.1-8; Lc. 3.1-9, 15-17; Jn. 1.19-28)*

¹ Ngain tiempo mé Juan, tti vancheguitte chojni, joí ngain regioen Judea, ngagaha jna tti jí joxon nchise para vandache chojni de ixin Dios,

² co vandačo ngain na:

—Xo tenchehe ra jianha, incheha ra jamé. Tten-toxinhi ra vidá ra ixin tti ttetonha Dios ochian joí.

³ Jehe Juan jihi tti diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondačo:

“Nchechjian ra nttiha para ixin jehe tti chonda cain joachaxin;
danttjehe ra ná nttiha nao.”

⁴ Lonttoe Juan diconchjian de xehe cocamello, co cinturoen de roa, co jehe vane ná tipo de coxoali que dinhi langosta, co tsjén cormena que jehe vaguittja ngagaha jna mé.

⁵ Vaquí chojni de ciudad de Jerusalén ngain Juan para vaquinhi na tti vandačo, co vaquí cainxin chojni de ngain nonttehe Judea co cai cain chojni que vintte ngain rajna que vintte chiaon de río Jordán.

⁶ Co are vaquendoenhe ñao na de cain tti jianha que vanchehe na, cottimeja Juan vancheguitte na ngain río Jordán.

⁷ Pero are Juan vicon que atto tsje xifariseo co xisaduceo cjoí xa ngain para rrojiguitte xa cai, jehe ndačo ngain xa:

—¡Jaha ra razé conché! ¿Quensen jointtanoha ra ixin nchao setanha ra tti castigo anto soji que jitonchian?

⁸ Chonda ra que sinchehe ra jian para que jamé sicon ni claro que jaha ra ocoentoxinhi ra vidá ra,

⁹ co ndacheha chó ra: “Ján na razé Abraham na”; ixin janha rrondattjo ra que hasta xó jihi Dios nchao sinchechjian xó chojni de razé Abraham.

¹⁰ Hacha ojí listo para tsončhinji nttá, co cain nttá que danjoha jian ttochjoin rročhinji nttá mé co rroche ntta ngain xohi.

¹¹ Ndoa que jai janha rrinttaguitte jaha ra conixin jinda, co mé jeho ná señal que ixin jaha ra ocoentoxinhi ra vidá ra; pero tti tsí después de janha, jehe sinttaguitte ra conixin Espíritu Santo co Espíritu mé tsiaho inchin xohi para sincheroa almá ra inchin oro toroaxin ngain xohi. Jehe mé chonda icha tsje joachaxin que janha, hasta que janha ni jiquininxinha na ni para tsjiá catté.

¹² Co jehe mé ochonda palé ngá rá para tsjendoaxin trigo para sačhjehe trigo paja. Jehe tsenchjinha trigoe ngain nchiandoha, co paja tsjaga ngain ná xohi que xonhi tiempo danga.

*Are joiguitte Jesús
(Mr. 1.9-11; Lc. 3.21-22)*

¹³ Co Jesús joixin de Galilea para cjoi ngain río Jordán, tti vehe Juan para que Juan joincheguitte Jesús.

¹⁴ Pero Juan čoha para rrojincheguitte Jesús, co ndačo ngain Jesús:

—Jaha tti jiquinixin sincheguitte na janha; ¿quedonda janha sinttaguitte jaha?

¹⁵ Pero Jesús ndačo:

—Pero jaxon sonttoha na jamé ixin ján na jiquinixin sonttoho na inchin rinao Dios.

Cottimeja Juan vitticaon.

¹⁶ Co are joexin joiguitte Jesús, vačhjenguixin de jinda. Co rato mé ngajni xiré, co Jesús vicon Espíritu Santo de Dios que xincanji inchin ná contoanajni ngataha Jesús.

¹⁷ Cottimeja coinhi na tté Dios de ngajni, que ndačo:

—Jehe jiji tti Xanhna que janha anto rinaho, co de ixin jehe Xan janha anto chahna.

4

Are inchínji joinao rrojincheyehe Jesús

(Mr. 1.12-13; Lc. 4.1-13)

¹ Cottimeja jehe Espíritu mé joicao Jesús para ngagaha jna tti jí joxon nchise para que inchínji rrojincheyehe Jesús.

² Nttiha vehe Jesús cuarenta nchanho co cuarenta ttie, co ngoixin tiempo mé jehe joinaha. Cottimeja jehe venhe jintta.

³ Cottimeja inchínji conchienne ngain Jesús para rrojincheyehe, co ndačo ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Pero Jesús ndačo:

—Tti jitaxin Palabré Dios ndačo: “Chojni sintechonxin na jeoha de tti jine na, sino cai de cain palabra que Dios ndačo.”

⁵ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha tti nihngo icha importante

⁶ Co nttiha ndačo inchínji ngain Jesús:

—Si ndoa jaha Xenhe Dios, daritsingaxin de nttihi hasta tti nontte, ixin ndačo ngain tti jitaxin Palabré Dios:

Dios tsetonhe ángel de jehe para senda jaha.

Cain ángel mé rrocaha conixin rá

para que xonhi tti tsonihi rottea de ixin xo.

⁷ Jesús ndačo:

—Cai ndačo ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

⁸ Cottimeja jehe inchínji sajoicao Jesús para ngataha ná jna anto noi. Co de nttiha cjoagoexin inchínji Jesús cainxin nación que jí ngoixin mundo co cain tti čhjoin que jí ngain cain nación mé.

⁹ Co ndačo inchínji ngain Jesús:

—Janha rrochjaha jaha cain yá si jaha sarittoxin nttajochjiha co sinchesayana janha.

¹⁰ Cottimeja Jesús ndačo ngain inchínji:

—Sattjixin de nganji janha, Satanás, ixin ndačo ngain tti jitaxin Palabré Dios: “Nchesayehe jeha Dios tti chonda joachaxin para ixin jaha, co jeha ngain jehe ditticaon jaha.”

¹¹ Cottimeja inchínji sacjoixin de ngain Jesús, co joí canxion ángel de Dios para joincheatendehe Jesús.

Jesús coexinhi xé ngain Galilea

(Mr. 1.14-15; Lc. 4.14-15)

¹² Are Jesús conohe que Juan jiaxinhi ngain cárcel, jehe sacjoi para nonttehe Galilea.

¹³ Pero jehe taveha ngain rajna Nazaret, sino que jehe sacjoi joigüehe ngain rajna Capernaum, co mé ná rajna que jí ngandehe lago que dinhi Galilea ngain regioen Zabulón co Neftalí.

¹⁴ Jamé joiconhe tti dindačo profeta Isaías:

¹⁵ Nonttehe Zabulón co nonttehe Neftalí que te ngaca jinda que dinhi Galilea toenxin río Jordán,
nonttehe Galilea tti te chojni que jeha judío.

¹⁶ Tti chojni que vintte inchin ngain tti naxin xehe,
jai jehe na inchin ná xohi joinchengasañehe na.

Co tti chojni que inchin ondavenhe pero jai cjan xechon na iná.

¹⁷ Desde are mé Jesús coexinhi ndache chojni de ixin Dios. Jehe vandačo ngain na:

—Ttentoxinhi ra de tti jianha que jaha ra tenchehe ra ixin Dios que ttjen ngajni otoin tse-tonha nganji ra.

Jesús nichjé nó xí que vatse copescado

(Mr. 1.16-20; Lc. 5.1-11)

¹⁸ Jesús mero jidatto ngandehe lago que dinhi Galilea are jehe vicon yó xí, co cayoi xí mé ichó xa. Ná xa vinhi xa Simón, co cai vinhi xa Pedro, co iná xa vinhi xa Andrés. Co cayoi xí mé vatse

xa copescado, co rato mé tetjahngui xa nonchaha jinda.

¹⁹ Jesús ndačo ngain cayoi xí mé:

—Xácoi ra chjin na; jaha ra ttjejo ra copescado pero jai janha sinttacoanha ra quexén tsjejo ra chojni para ixin Dios.

²⁰ Co rato mé cointtohe na nonchaha co sajoicao na Jesús.

²¹ Nchion icha ndaha Jesús vicon iyó xí, co cayoi xí mé ichó xa cai. Cayoi xí mé xenhe Zebedeo. Ná xa vinhi xa Jacobo co iná xa vinhi xa Juan. Cayoi xí jihi tate xa conixin ndodé xa Zebedeo ngá ná barco tatetteyehe na nonchaha. Jesús vayé na,

²² co ngain rato mé cointtohe na ndodé na nttiha ngain barco mé co sarroé na Jesús.

*Jesús joinchecoenhe tsje chojni de ixin Dios
(Lc. 6.17-19)*

²³ Jesús ngaria ngoixin nonttehe Galilea para joinchecoenhe chojni de ixin Dios ngain cain nihngo que te nttiha. Jehe ndache na tti jian joajna de ixin quexén ttetonha Dios co jehe vanchexingamehe cain chojni que vinttechonda quexeho chin.

²⁴ Co hasta chojni de ngoixin regioen Siria conohe na tti jian que vanchehe Jesús co joiaho na ngain Jesús cain chojni que vinttechonda quexeho chin; tti vinttechonda dolor ngain cuerpo, tti vinttechonda espíritu jianha, tti vinttechonda chin denda, co tti čoha vaguinttequingui rioho cuerpo. Co Jesús joinchexingamehe cain chojni mé.

²⁵ Co ngain tiempo mé tsje chojni de tsje parte rroé na Jesús tti jehe savacji; chojni de Galilea, de ngoi regioen Decápolis, de ngain Jerusalén, de Judea, co de toenixin río Jordán.

5

Tsje nichja Jesús ngain chojni are ngain jna

¹ Are Jesús vicon anto tsje chojni xatte ngain, jehe coani ngain ná jna para que jehe nchao ndache cain chojni mé de ixin Dios, co are jehe nttiha, cain chojni que vacao vintte na ngandanji jehe.

² Cottimeja jehe coexinhi ndache na janhi:

Quexehe chojni tti chonda chjoin vida (Lc. 6.20-23)

³ —Anto chjoin para ixin tti chojni que xaxaon ixin rrongondehe na que Dios tsjenguijna na, ixin chojni mé tequininxin na ngajni tti ttetonha Dios.

⁴ 'Anto chjoin para ixin tti chojni que techín de ixin anto tsje cosa jianha jí ngataha nontte jihi, ixin Dios sincheconsolá chojni mé.

⁵ 'Anto chjoin para ixin tti chojni que dintteha orgulloso, ixin jehe na nisayé tti nontte que Dios ndačo sanjo.

⁶ 'Anto chjoin para ixin tti chojni que anto rinao sinchehe inchin ttetonha Dios, ixin jehe Dios tsjenguijna chojni mé para sinchehe na jamé.

⁷ 'Anto chjoin para ixin tti chojni que ttiacoehe icha chojni, ixin Dios tsiacoehe chojni mé.

⁸ 'Anto chjoin para ixin tti chojni que ixonhi jianha teca ixin chojni mé sicon na Dios.

⁹ 'Anto čhjoin para ixin tti chojni que ttjen-guijna icha chojni para tsetoha na, ixin Dios sincheguinhí cain chojni mé xenhe jehe Dios.

¹⁰ 'Anto čhjoin para ixin tti chojni que anto tangui tonhe ixin jehe na tenchehe na inchin rinao Dios, ixin chojni mé tequininxin na ngajni tti ttetonha Dios.

¹¹ 'Co anto čhjoin para ixin jaha ra are chojni feo ndattjo ra na, co feo nchehe na nganji ra, co ndattjo ra na tsje cosa que jeha ndoa para rroningacoanxin ra na ixin jaha ra nichja ra joajana janha.

¹² Masqui jamé tsonha ra, jaha ra čhjoin tonoha ra co dintte ra contento, ixin jaha ra sayehe ra jie premio ngajni. Ixin cai jańá feo joinchehe chojni ngain cain profeta que joí icha saho que jaha ra.

Chojni que ditticaon Jesús inchin xijntta co inchin joadingasán para ngain mundo jihi

(Mr. 9.50; Lc. 14.34-35)

¹³ 'Jaha ra inchin xijntta para ngain chojni ngataha nontte jihi. Pero si xijntta mé ndarocjan simple que ijeha xijntta, ¿queéén nchao sinchegonda chojni? Xijntta mé ixonhi xé, jeho para singo ndaha co tsingachje chojni.

¹⁴ 'Co jaha ra inchin joadingasán para icha chojni de ngataha nontte jihi. Inchin ná ciudad que jí ngataha ná jna, cain chojni de cjin nchao siconxin na ciudad mé.

¹⁵ Ni ná lámpara are jinchengasán čhoha sehe ngaxinhi ná cajón ixin lámpara mé chonda que sehe noi para sinchengasenhe cain chojni que te ngain nchia.

16 Jamé jaha ra cai, nchehe ra jian para que tti jian que jaha ra sinchehe ra, mé inchin joadingasán para ngatto con cain chojni para que are jehe na sicon na tti jian que jaha ra sinchehe ra, jehe na sinchecoanxinhi na Ndodá ra que ttjen ngajni.

Jesús cjoagoe chojni quehe rrocho ley que vayé Moisés

17 Co Jesús ndačo cai:

—Āaxaonha jaha ra que janha joihi para jointtaxante ley que vayé Moisés ni cain tti ndačo cain profeta are saho; janha joiha para jointtaxante cain mé, janha joihi para joindattjo ra tti mero ndoa quehe rročo cain mé.

18 Janha rrondattjo ra ndoa que cain tiempo que sehe ngajni co nontte, ley mé rroxantteha ni rioho ni ná letra sačhjeha hasta tsoenja cain tti jitaxin ngain ley mé ixin cain mé chonda que tsonhe.

19 Mexinxin tti chojni que ditticaonha quexeho parte que ley jihi ttetonha, masqui parte mé antoha importante, co si chojni mé tsjagoe icha chojni para sinchehe na řajeho, Dios rrondačo que chojni mé antoha importante ngajni, tti ttetonha Dios. Pero tti chojni que ditticaon cain tti ttetonha ley jihi, co jehe nchecoenhe icha chojni řajeho inchin jehe nchehe, Dios rrondačo que ixin chojni mé anto importante na ngajni tti ttetonha Dios.

20 Ixin janha rrindattjo ra, que si jaha ra sincheha ra icha jian que cain ximaestroey ley mé co tti nchehe cain xifariseo, jaha ra čhoha sintte ra ngajni tti ttetonha Dios.

Are Jesús ndache chojni quehe tsonhe chojni que tsoñaohe chó
(Lc. 12.57-59)

²¹ 'Jaha ra coinhi ra tti vitonhe nindogoelitoa ra xančhjen janhi: "Dantsjeha ra vidé iná chojni, ixin quexeho tti santsjehe vidé iná chojni, tti tjaya chonda que soenhe juzgado."

²² Pero janha rrondattjo ra que quexeho tti tsoñaohe iná chojni, tti tsoñao mé chonda que soenhe juzgado. Co quexeho tti rrondache feo iná chojni, tti rronichja feo mé soenhe juzgado de ngain tti juzgado que chonda icha tsje joachaxin nttihi ngataha nontte. Co tti ncheguinhí iná chojni, tonto, tti ndačo mé chonda peligro de tsji ngacjan xoí infierno.

²³ 'Mexinxin are jaha tsjiho ofrenda ngain alté Dios para sanjo ngain, co rato mé jaha rrořaxaon que ixin iná chojni ningaconha jaha,

²⁴ nttiha ttinttohe ngaca altar tti jaha sanjo ngain Dios, co ttji ngain tti chojni que ningaconha co nchetsenhe ñao que itsoñaoha nganji ni jaha ngain jehe. Cottimeja cjan jaha para danjo tti jaha rridanjo ngain Dios.

²⁵ 'Si čhonja chojni sičo jie para ixin jaha, co tsjiho ngain juzgado, icha jian de ngatjao nttiha jaha nchetsenhe ñao chojni mé para que jehe sinttatjañaha cain tti rrica, para que jehe itsjioha ngain xijuez. Ixin si nahi, xijuez tsetonhe xa xipolicía para que tsiaxinha xa jaha.

²⁶ Co ndoa tti janha rrindattjo, que nttiha siaxinha hasta que tsjengaja hna cainxin tomi que jaha rrica.

Are Jesús ndache chojni que ixin jianha para ná xí sejoacaho xa iná nchí

²⁷ 'Jaha ra ocoinhi ra ixin ley que vayé Moisés ttetonha janhi: “Dinttechincoha ra iná nchí que jeha nchičhiha ra.”

²⁸ Pero janha rrindattjo ra que quexeho ná xí tsiacophe iná nchí, xí mé rrocho que inchin ojoinchehe xa tti jehe xa xaxaon xa ngain nchí mé de ngain ansén xa.

²⁹ 'Mexinxin si jmacon sinttaxaxaon para sinchehe jianha, ncheha cosa mé masqui hasta dantsjengui jmacon mé co danza ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

³⁰ Co si rá sinttaxaxaon de sinchehe jianha, ncheha cosa mé masqui hasta tonchinji rá mé co danza ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

Are Jesús ndacho de ixin tti chojni que dačhjendehe chó

(Mt. 19.9; Mr. 10.11-12; Lc. 16.18)

³¹ 'Cai ndacho ngain ley que vayé Moisés: “Tti rinao sačhjendehe nchičhihi chonda que sinchechjienhe ncha ná xón que setaxin que jehe ndoa ondavačhjendehe ncha para ngoixin vidé.”

³² Pero janha rrindattjo ra, que si ná xí sinao xa sačhjendehe xa nchičhihi xa (co jeha ixin vittjaxin xa ncha tajjoacaho ncha iná xí,) xixihi ncha tti culpé ngattoxon con Dios co por ixin tti sinchehe jehe xa, nchí sinchehe ncha jianha cai. Co xí que

jehe n̄cha secao n̄cha después, sinchehe xa jianha cai ixin secao xa n̄chí mé.

Are Jesús ndache chojni ixin nchejuraha

³³ Cai ndačo Jesús:

—Cai jaha ra ocoihni ra ixin vitonhe nindo-goelitoa ra x̄ančhjen janhi: “Ttinttoeha de nchehe tti jaha joincheprometé conixin ná juramento de ixin nombré Dios.”

³⁴ Pero janha rrindattjo ra que x̄onhi tiempo sinchejurá ra. Nchejuraha ra de ixin ngajni ixin nttiha tti ttjen Dios.

³⁵ Ni nchejuraha ra de ixin ngataha nontte ixin nttihi tti nchejogaxin rotté Dios. Ni nchejuraha ra de ixin Jerusalén ixin mé tti ciudad de Dios, tti Rey de cainxin cosa.

³⁶ Ni nchejuraha ra de ixin já ra ixin jaha ra čhoha sinchettie ra ni sincheroa ra ni ná x̄ajá ra.

³⁷ Mexinxin icha jian jeho ndačo ra “ján” o “nahi” ixin si rrondačo ra icha, mé tsixin de ngain inchínji.

Are Jesús ndačo ixin tsjengueyexinha ni iná chojni que joinchehe jianha ngain ni

(Lc. 6.29-30)

³⁸ Jaha ra ocoihni ra quehe ttetonha ley que vayé Moisés: “Tti tsončhinga jmacon ná chojni, cai jehe chonda que rročhinga jmacon. Co tti san-qué neno ná chojni, cai jehe chonda que setsinga neno.”

³⁹ Pero janha rrindattjo ra que ncheha ra jamé ngain tti chojni que sinchehe jamé nganji ra. Sino que, si čhonja chojni rrožanguiha ra ná manazo ngá con ra, dittoaxin ra para rrožanguiha ra iná manazo.

40 Co si čhonja chojni sičo jie para ixin jaha ra co sinao na santsjaha ra na camisá ra, jaha ra dittoaxin ra danjo ra hasta chamarrá ra cai.

41 Si čhonja chojni tsetonha que jaha ra tsjiho ra ná carga yó kilómetro, jaha ra dittoaxin ra ttjiho ra carga mé hasta nó kilómetro.

42 Co quexeho chojni que sanchiaha ra ná cosa, jaha ra chjehe ra; co ndačoha ra nahi ngain chojni mé.

Are Jesús ndačo chonda que sinao ni chojni que ningaconhe ni

(Lc. 6.27-28, 32-36)

43 Cai jaha ra ocoinhi ra ixin ley que vayé Moisés janhi ttetonha: “Rinao chojni amigoa co ningaconhe tti chojni que ningaconha jaha.”

44 Pero janha rrindattjo ra que rinao ra tti chojni que ningaconha ra, co nichja ra jian de ixin tti chojni que nichja jianha de ixin jaha ra co nchehe ra jian ngain tti chojni que ningaconha ra, co nchetsenhe ra ñao Dios que jehe sinchehe jian ngain tti chojni que feo ndattjo ra co nchehe feo nganji ra.

45 Jañá sinchehe ra para que sintte ra ndoa xenhe Ndodá ra que ttjen ngajni. Ixin jehe Ndo mé tti rroanha nchanho para nchengasañehe cain chojni, tti chojni que nchehe jian co tti chojni que nchehe jianha, co jehe Ndo tti rroanha čhin para cainxin chojni cai, tti nchehe jian co tti nchehe jianha.

46 Ixin si jaha ra rinao ra jeho tti chojni que jehe rinao ra jaha ra, xonhi premio sayehe ra ixin hasta

tti chojni que chonxinha de ixin Dios cai nchehe jamé, inchin cain xicobrador de impuesto.

⁴⁷ Co si jecho amigoa ra rronichjehe ra, cai mé ¿quehe jian sinchehe ra? ixin hasta tti chojni que chonxinha de ixin Dios nchehe na jamé cai.

⁴⁸ Nchehe ra de que dintte ra chojni jian, jañá inchin Ndodá ra que ttjen ngajni jehe Ndo jian Ndo.

6

Are Jesús ndačo ixin chonda ni que tsjenguijna ni chojni noa

¹ Nchehe ra tti jian jeoha are tatetsjehe icha chojni para que jehe na sicon ra na co rrořaxaon na ixin jaha ra anto jian ra. Si jamé sinchehe ra, Ndodá ra que ttjen ngajni řonhi tsjengaha ra Ndo hna.

² Mexinxin are jaha ra tsjenguijna ra chojni noa, ttequinha ra ngain cainxin chojni inchin nchehe canxion chojni are ngain nihngo Israel co ngá nttiha. Chojni mé ndačo ixin nchehe na jañá para ixin Dios, pero ndoaha; chojni mé nchehe na jañá para que icha chojni rronichja na jian de ixin chojni mé. Pero janha rrindattjo ra que Dios řonhi tsjenguehe hna chojni mé ixin ojoacha de tti jian que nichja icha chojni por ixin jehe.

³ Mexinxin jaha ra are tsjenguijna ra chojni noa, řonhi chojni ttequinhi ra, ni chojni icha amigoa ra ndacheha ra.

⁴ Rročo que ttjenguijna ra chojni mé, pero jimao. Co Ndodá ra que ttjen ngajni sicon Ndo tti jaha ra sinchehe ra; co jehe Ndo tsjengaha ra Ndo hna.

*Jesús cjoago quexén sinchecoanxinhi ni Dios
(Lc. 11.2-4)*

⁵ Co Jesús ndačo cai:

—Are jaha ra sinchecoanxinhi ra Dios, ncheha ra inchin nchehe tti chojni que ncheřoxinhi na nchecoanxinhi na Dios tatengattjen na ngaxinhi nihngo co ngain esquiné nttiha, para que icha chojni sicon na. Chojni mé ndačo na ixin nchehe na jańa para ixin Dios, pero ndoaha. Janha rrindattjo ra que Dios tsjengueha hna chojni mé tti jehe na tenchehe na, ixin ochonda na tti sacha na.

⁶ Mexinxin are jaha ra sinchecoanxinhi ra Dios, dixinhi ra nchiandoi ra co ttejehe ra puerté nchia co nchecoanxinhi ra Dios Ndodá ra que ttjen nganji nttiha, jaho ra conixin jehe Ndo. Co Dios tti sicon tti jaha ra tenchehe ra, co jehe Ndo tsjengaha ra Ndo hna.

⁷ 'Are jaha ra sinchecoanxinhi ra Dios cjan-taonha ra de nichja ra tti palabra que řonhi řé, inchin tti chojni que chonxinha de ixin Dios, ixin jehe na řaxaon na que Dios sinchehe caso cain tti jehe na tendačo na ixin anto tsje tenichja na.

⁸ Mexinxin jaha ra ncheha ra inchin nchehe jehe na, ixin Ndodá ra que ttjen ngajni onohé Ndo quehe rrogondaha ra icha saho que jaha ra sanchiehe ra Ndo.

⁹ Mexinxin jaha ra nchecoanxinhi ra Ndo janhi: Padre soixin que ttjen ngajni, nombrea soixin jiquinixin tsosayehe.

¹⁰ Siquetonha nttihi soixin.

Co tsonhe inchin soixin rinao nttihi ngataha nontte, jańa inchin tonhe nttiha ngajni.

¹¹ Chjana ra jai tti sine na que rrogondana na.

12 Nchetjañana ni ra tti jianha que jointtaha na, jañá inchin janha na jointtatjañá na tti chojni que joinchehe jianha nganji na.

13 Nchegattoha ni ra tangui; tančhlandaha ni ra ngain tti jianha.

Ixin soixin tti ttetonha co soixin tti chonda cainxin joachaxin co gloria para cainxin tiempo. Amén.

14 'Ixin si jaha ra nchetjañehe ra tti chojni que nchehe jianha nganji ra, Nnodá ra que ttjen ngajni sinttatjañaha ra Ndo jaha ra cai.

15 Pero si jaha ra nchetjañeha ra chojni mé, Nnodá ra que ttjen ngajni cai čoha sinttatjañaha ra Ndo cain tti jianha que jaha ra nchehe ra.

Are Jesús ndačo queXén sinttecjáño ni

16 Co Jesús ndačo cai:

—Are jaha ra sinttecjáño ra para ixin Dios, dinttechinha ra inchin tti chojni que ncheha inchin ndačo. Chojni mé ndačo na ixin tecjáño na para ixin Dios pero nahi, ixin chojni mé dinttechín na para que icha chojni dicon que ixin jehe na tecjáño na. Pero janha rrindattjo ra seguro que chojni mé Dios xonhi tsjenguehe na hna ixin ochonda na tti sachá na.

17 Pero jaha ra are sinttecjáño ra para ixin Dios, tontti ra jinda ngá con ra co nchejinji ra já ra jian,

18 para que icha chojni rrořaxaonha na que ixin jaha ra tecjáño ra para ixin Dios. Jeho Nnodá ra que ttjen nganji tsonohe Ndo, co jehe Ndo tsjen-gaha ra Ndo hna.

*Cosa rentte que rrořhonda na ngajni
(Lc. 12.33-34)*

19 Cai ndaĉho Jesus:

—Datseha ra tsje cosa nttihi ngataha nontte, nttihi tti ndattjehe cochı co nttihi tti cain cosa ndaditjan, co nttihi tti jı tti chehe que tte cain cosa.

20 Icha jian datse ra tsje cosa para ngajni, nttiha tti xonhi cochı jı para tsjehe cain cosa, ni cain cosa diha chjın, ni tti chehe coha nttiha para tse.

21 Ixin ngain lugar tti jaha ra rrochonda ra cosa icha importante para ixin jaha ra, cai nttiha sehe joarrixaoan ra co ansean ra.

*Jmacon ni, me tti lampare cuerpoe ni
(Lc. 11.34-36)*

22 Cai ndaĉho Jesus:

—Jmacon jı inchin na lampara ngain cuerpoa. Mexinxin si jmacon jian, cai ngoixin cuerpoa rrochonda joadingasan. Rroĉho si joadingasan que Dios rroanha jı ngain ansean, jaha na chojni jian.

23 Pero si jmacon jianha, cai ngoixin cuerpoa jı ngain tti naxin xehe. Rroĉho que si coha nganji tti joadingasan que Dios rroanha, jaha inchin chojni chejo ixin ĉhoha dicon nttie Dios. ıCo tti naxin xehe me anto jianha para ixin jaha!

*Chonda que icha sinao ni Dios que tomi
(Lc. 16.13)*

24 Xonhi chojni nchao sinchehe xe yo xinajni ngain nacoa tiempo, ixin icha sinao na xinajni co rroningaconhe ina xinajni, o icha sitticaon ngain na xinajni co ngain ina xa isincheha caso. Jana cai ĉhoha sinao ni tomi co sinao ni Dios ngain nacoa tiempo.

*Dios jinda cain xenhe**(Lc. 12.22-31)*²⁵ Cai ndačo Jesús:

—Co janha rrindattjo ra que taha ra joachjaon de ixin tti sintte ra co de ixin tti sihi ra para sinttechonxin ra, ni taha ra joachjaon de ixin lontto para sinttengaha ra ixin icha rentte vidé ni que tti jine ni, co icha rentte cuerpoe ni que lonttoe ni. Ixin Dios chjá ra vida que techonxin ra, mexinxin jehe tti rrochjá ra cain cosa que rrogondaha ra ngain vida jihi.

²⁶ Tsjehe ra que cain conttoa que tjanganga va ngataonhe čhintto; jehe va řonhi ttenga va ngataon jngui, co jamé řonhi cosecha tsín va, ni ttenchjianha va cosecha ngain ná nchia. Pero masqui jamé, Ndo dá ra que ttjen ngajni danjo Ndo tti jine cainxin coxigochjan mé. Co jaha ra seguro que icha rentte ra que cain coxigochjan mé.

²⁷ Co jaha ra masqui anto tsa ra joachjaon pero čhoha sahngui ra ni irioho metro icha de tti jininxin ra.

²⁸ ¿Quedonda jaha ra anto ta ra joachjaon de ixin lontto? řaxaon ra jian queřén dangui cain tsjo ngataon jngui que cain tsjo mé ncheha tsjo řa, ni tajinha tsjo chjon.

²⁹ Co ni rey Salomón, que jehe anto čhjoin vaguistsá, pero řonhi tiempo jehe vetsá icha čhjoin que cain tsjo.

³⁰ Si Dios jańá nchetsá cain ca que jehojai jí ca ngataon jngui co ndoe ondarroxema ca co rroche ca ngain řohi, mexinxin Dios sinchehe icha jian nganji jaha ra masqui řa ditticaonha ra jian ngain Dios.

³¹ Mexinxin taha ra joachjaon ni tendačho ha ra: “¿Quehe sontte na? o ¿quehe sonho na? o ¿quehe lonitto šitoxianxin na?”

³² Ixin cain icha chojni cain jihi tti taxin na joachjaon, pero jaha ra chonda ra ná Ndodá ra que ttjen ngajni co jehe Ndo onohe Ndo que jaha ra ján rrogondaha ra cain cosa jihi.

³³ Mexinxin cain tiempo ditticaon ra cain tti jehe Ndo ttetonha Ndo, co nchehe ra tti jehe Ndo rinao Ndo, co jamé sayehe ra cain cosa jihi.

³⁴ Co taha ra joachjaon de ixin quežén sinchehe ra ndoe, ixin ndoe tsiaho ojé problema. Nchanho co nchanho chonda problemé, pero jaha ra chonda ra confianza ngain Dios ixin jehe tti sinttažaxaon ra quehe sinchehe ra.

7

Ncheha ra juzgado iná chojni

(Lc. 6.37-38, 41-42)

¹ Ncheha ra juzgado iná chojni para que Dios sincheha juzgado nganji ra.

² Ixin jehe sinttajuzgá jaha ra žajeho inchin jaha ra nchejuzguehe ra icha chojni, co jehe sinchehe nganji ra inchin nchehe jaha ra ngain icha chojni.

³ ¿Quežén nchao sicon ra tti anto nchín caxineno que jinganguí jmacon iná chojni, co diconha ra tti caxineno anto jie que jinganguí jmacon ra jaha ra?

⁴ Si jaha ra jinganguí ná caxineno anto jie nganguí jmacon ra, ¿quežén nchao rrondache ra iná chojni: “Tančhanda na santsjenguiha caxineno que jinganguí jmacon”?

⁵ Jaha ra tti chojni que ncheha tti ndačo! Saho dantsjengui ra tti caxineno anto jie que tenganguí

con ra, co jamé nchao sicon ra jian para santsjen-gui ra tti caxineno nchín que jinganguí jmacon iná chojni.

⁶ 'Ncheha ra sigue ndačo ra joajné Dios ngain tti chojni que anto čhintto inchin conia ixin joajna mé anto jian co jehe chojni mé puede rrocjan-coa na nasoenxon ra na. Ni ncheha ra sigue ndačo ra joajné Dios ngain tti chojni que deporsín ncheřoxinhi nchehe jianha, ixin chojni mé te inchin cocochi co joajné Dios inchin perla que anto fino, co jehe na sincheha na caso, inchin are cocochi ttingachjexon va noa co jineha va.

*Quexén sanchia cosa de ngain Dios
(Lc. 11.9-13; 6.31)*

⁷ 'Danchia ra co Dios rrochjá ra. Ttjé ra co sinchí ra. Dinga ra puerta co puerta mé rroxiré.

⁸ Ixin tti chojni que danchia dayé; co tti chojni que ttjé, jehe dittja; co tti chojni que dinga puerta, xiré puerta mé para ixin jehe.

⁹ '¿Ixin apoco čhonja de jaha ra nchao rrochjehe ra xanha ra ná řo are sanchiaha ra xan niottja?

¹⁰ ¿O apoco nchao rrochjehe ra xan nntaohe conché are sanchiaha ra xan nntaohe copescado?

¹¹ Jańá, si jaha ra que jeha jian ra noha ra danjo ra cosa jian ngain xanha ra, mexinxin Ndodá ra que ttjen ngajni seguro rrochjá ra Ndo cosa jian jaha ra řo sanchiehe ra Ndo.

¹² 'Mexinxin cainxin tiempo nchehe ra ngain icha chojni inchin jaha ra rińao ra sinchehe jehe na nganji ra, ixin jamé ttetonha ley que vayé Moisés co cain tti dicjin cainxin profeta are saho.

Tti puerta jno

(Lc. 13.24)

¹³ Para tsji ra ngajni chonda que sixinxin ra de ngain tti puerta jno, ixin tti puerta ton co tti nttiha ton, mé tti sattjixin tsje chojni ngain infierno.

¹⁴ Pero tti puerta co tti nttiha que satsjixin chojni para ngajni, cayoi mé nojno, co tsjeha chojni chonxin puerta mé co nttiha mé.

Nttattochjoin datsoan ni ntta de ixin ttochjoín ntta

(Lc. 6.43-44)

¹⁵ Ttjiho ra cuidado de ixin tti chojni mentiroso que ndačo na ixin jehe na nichja na de ixin Dios pero ndoaha. Jehe na ndačo na jańá de ngain rroha na pero de ngain ansén na jehe na jianha na inchin coxigo čhintto ngagaha jna.

¹⁶ Jaha ra nchao satsoan ra chojni mé de ngain tti jehe na nchehe na ixin inchin nttanchaha čhoaha sinchian ntta uva, ni canchaha čhoaha sinchian ca higo,

¹⁷ jańá cai cain nttattochjoin jian danjo ntta ttochjoin jian, co tti nttattochjoin que xonhi xé danjo ntta ttochjoin que xonhi xé.

¹⁸ Nttattochjoin jian čhoaha sanjo ntta ttochjoin que xonhi xé ni cai nttattochjoin que xonhi xé čhoaha sanjo ntta ttochjoin jian.

¹⁹ Cain nttattochjoin que danjoha ttochjoin jian činji ntta mé co che ntta ngain xohi.

²⁰ Co jamé jaha ra rrochonxin ra chojni mé de ngain tti jehe na nchehe na.

Cainxinha chojni tsji na ngajni tti ttetonha Dios

(Lc. 13.25-27)

21 'Cainxinha chojni que ndachjenji na janha: "Soixin, Soixin", tsji na ngajni tti ttetonha Ndo-dana, sino que jeho tti chojni que nchehe cain tti rinao Ndodana que ttjen ngajni.

22 Are tsí nchanho mé, tsje chojni rrondachjenji na janha: "Soixin, Soixin, janha na ndattjan na chojni de ixin soixin, co ngain nombrea venguixin na espíritu jianha de ngaxinhi cuerpoe tsje chojni, co de ixin nombrea jointtaxin na tsje milagro."

23 Pero ngain nchanho mé janha rrondattjan na: "Janha xonhi tiempo joatsoan jaha ra inchin chojnina. Sattjixin ra de nganji janha, jaha ra xo joinchehe ra jianha."

*Ttinchia que jingattjen ngataha ttjao co ttinchia que jingattjen ngataha nchise
(Lc. 6.47-49; Mr. 1.22)*

24 'Jañá mexinxin tti chojni que ditticaon na janha co nchehe tti janha ndachjan, chojni mé inchin ná xí que xaxaon jian para joinchechjian nchiandoha ngataha ttjao.

25 Co are jói chin, coyé jinda ngain río, co cjoa chintto soji ngain nchia mé, pero nchia vetsingaha nchia ixin soji jingattjen nchia ngataha ttjao.

26 Pero tti chojni que ttinhi tti janha ndachjan co ncheha jamé, chojni mé inchin tti ná xí que xonhi xé tti jehe xa xaxaon xa ixin dinchechjian xa nchiandoha xa ngataha nchise.

27 Co are jói chin, coyé jinda ngain río, co cjoa chintto soji, nchia mé cjamangui nchia. Co mé anto tangui para ixin xí mé.

²⁸ Are Jesús joexin nichja cain jihi, cain chojni que tettinhi nttiha vinttegoan na admirado de ixin tti ndačo Jesús,

²⁹ ixin Jesús ndačo ngain na conixin anto tsje joachaxin, co jeha inchin cain ximaestroe ley.

8

*Jesús joinchexingamehe ná tti vechonda lepra
(Mr. 1.40-45; Lc. 5.12-16)*

¹ Are Jesús vaniixin de ngain jna mé, anto tsje chojni rroé.

² Co conchienne ná xí que veninxin chin dinhi lepra. Xí mé vettoxin nttajochjihi xa ngattoxon con Jesús co ndačo xa:

—Si rinao soixin, nchao nchexingamana de ixin chin que janha rrichonda.

³ Cottimeja Jesús catte xí mé co ndačo ngain xa:

—Ján, rinaho. Co jaxon oxingamaha jaha.

Co are Jesús ndačo yá jehe tti venihi mé xingamehe de ixin tti chin que jehe vechonda.

⁴ Co Jesús ndačo ngain tti xí mé:

—Tsjenxin, xonhi chojni ndache. Jeho ttji co tonchienne ngain xidána para que jehe xa sicon xa ixin jaha oxingamaha, co danjo para ixin Dios inchin ttetonha ley que vayé Moisés, para que cain chojni nttiha tsonohe na que jaha oxingamaha de ixin tti chin que joarichonda.

*Jesús joinchexingamehe ná xanxí, xinchehe xé
ná xicapitán romano
(Lc. 7.1-10)*

⁵ Are joigaha Jesús rajna Capernaum, ná xisoldado capitán romano conchienne xa co joinchet-senhe xa ñao Jesús,

⁶ co ndačo xa:

—Nttatsanha ñao soixin nchexingamehe ná xinchehe xana ixin nihi xa. Tajitsinga xa ngain nchia co čoha ttingui xa co cai anto jittín xa.

⁷ Jesús ndačo:

—Janha tsji sinttaxingamá xí mé.

⁸ Co xicapitán mé ndačo xa:

—Nttatsanha ñao soixin, janha ni jiquininxinha na para soixin sixinhi nchiania. Jeho rinaho janha que soixin ttetonha co xinchehe xana orrox-ingamehe xa.

⁹ Janha nona jamé ixin janha ditticanho cain tti ttetonna xichonda icha tsje joachaxin que janha, co cai janha chonda joachaxin de ttetoan cain xisoldadona. Are janha ndattjan ná de jehe xa que tsji xa quexeho parte, jehe xa ttji xa. Co are ndattjan xa que tsí xa, jehe xa ttí xa. Co are ttetoan ná de xinchehe xana de sinchehe xa quexeho xá, jehe xa nchehe xa xá mé.

¹⁰ Are Jesús coinhi jihi jehe goan admirado co ndačo ngain chojni que jidicao:

—Janha rrindattjo ra ndoa que cainxin rajna de Israel xonhi chojni vetan janha que anto jian ditticaon inchin xí jihi.

¹¹ Janha rrondattjo ra que tsje chojni de icha nación inchin xisoldado romano jihi tsji na siguiente na ngain Abraham, co Isaac co Jacob nttiha ngajni tti ttetonha Dios.

¹² Co tsje chojni Israel que tequininxin tsji nttiha, pero tsjiha na nttiha ixin Dios rrorroanha na

ngain tti naxin xehe, nttiha tti puro rrotsjanga na, co hasta sinetaon neno na.

¹³ Cottimeja Jesús ndačo ngain xicapitán mé:

—Sattji nchiandoi, co tsonhe inchin jaha ditti-caon.

Co xinchehe xé mé xingamehe xa ngain rato mé.

Jesús joinchexingamehe jannché Pedro

(Mr. 1.29-31; Lc. 4.38-39)

¹⁴ Jesús cjoí nchiandoha Pedro, co nttiha vicon Jesús jannché Pedro tajitsinga jan de ixin soa.

¹⁵ Jesús jeho tsehe rá jan co ondavačhehe jan soa que veyá jan, co vingattjen jan para joinchea-tendehe jan na.

Jesús joinchexingamehe tsje chojni nihi

(Mr. 1.32-34; Lc. 4.40-41)

¹⁶ Co are ondaconaxin xehe, tsje chojni joiaohe na Jesús tsje chojni que chonda espíritu jianha, co jehe, conixin nacoa palabra que jehe nichja, vengui cain espíritu jianha mé. Co cai ngain rato mé jehe joinchexingamehe cainxin chojni nihi que conchienne ngain.

¹⁷ Jihi conhe para que joiconhe tti dindačo profeta Isaías are jehe dicjin: “Jehe mismo vayé chinha na co sajoicao tti anto ttín cuerpoa na.”

Tti chojni que joinao rrogacao Jesús

(Lc. 9.57-62)

¹⁸ Are Jesús vicon que anto tsje chojni xatte ngain, jehe coetonhe chojni que vacao para vatto na conixin jehe para toenxin lago.

¹⁹ Co ngain rato mé conchienne ná ximaestroe ley Israel ngain Jesús co ndačo xa:

—Maestro, janha rinaho sacjin na tti soixin sacji.

²⁰ Jesús ndačo:

—Cain condaniša chonda va cuevé va co cain conttoa chonda va caqué va; pero janha, tti Xí que joixin de ngajni, chondaha ni ttinó saričhin.

²¹ Co iná de tti chojni que vacao Jesús ndačo:

—Janha ján sacjin na, pero chonna na hasta ndasenja ndodana para que janha tsjavá ndo.

²² Co Jesús ndačo:

—Chjin na co tančhjanda tti chojni que ditti-caonha na janha tsjavá chó na.

Jesús tajoaquehe čhintto conixin olé lago

(Mr. 4.35-41; Lc. 8.22-25)

²³ Cottimeja Jesús conixin chojni que vacao coani na ná barco co sacjoixin na de nttiha.

²⁴ Co are ongataonhe jinda mé, cjoa ná čhintto anto soji que tsín olé jinda que hasta cjoanotaon barco mé. Co Jesús tajijoa ngaxinhi barco hora mé.

²⁵ Cottimeja cain chojni que joicao cjoí na joinchexingamehe na Jesús co ndačo na ngain:

—Nttatsanha na ñao soixin, tančhjandaha ni ra ndasenhe na ixin barco ndajixincanjingui jinda.

²⁶ Jesús ndačo ngain na:

—¿Quedonda anto žaon ra? ¡Jaha ra antoha jian ditticaon ra tti janha ndattjo ra!

Cottimeja vingattjen Jesús co nichjé čhintto conixin jinda, co ngain rato mé tavehe čhintto conixin jinda.

²⁷ Co cain chojni mé vinttegoan na admirado, co vinttendačo na:

—¿Quehe joachaxin chonda xí jihi que hasta ċhintto co jinda ditticaon tti ndaċho xa?

Xí de ngain nonttehe Gadara que vinttechonda espíritu jianha

(Mr. 5.1-20; Lc. 8.26-39)

²⁸ Are Jesús joihi toenxin lago mé ongain nonttehe Gadara, yó xí vinttegaċhjexin xa de ngaxinhi cueva tti vaguittohe cuerpoe chojni que ndavaguenhe ngain tiempo mé. Co xí mé vintteconchienenhe xa ngain Jesús. Cayoi xí mé vinttechonda xa espíritu jianha ngaxinhi cuerpoe xa, co anto ċhintto vintte xa que ni xonhi chojni nchao vagattoxin ngain lugar mé.

²⁹ Co vinttendaċho xa sén:

—¿Quedonda joihi nganji na, jaha Jesús, Xenhe Dios? ¡Ĥa jeha tiempo para que jaha sincheguetan ni ra tangui!

³⁰ Co nonttiha chiaon rridinttene anto tsje cocochi.

³¹ Co cain espíritu jianha joinchetsenhe ñao Jesús co ndaċho:

—Si senguixin na de ngaxinhi cayoi cuerpo tehe, nttatsanha na ñao tanċhjanda na sixinhi na ngaxinhi cocochi taha.

³² Cottimeja Jesús ndaċho:

—Ján, diguixinhi ra nttiha remé.

Co cain espíritu jianha vaċhjexin de ngaxinhi cayoi cuerpoe xí mé co savixinhi ngaxinhi cain cocochi mé. Cottimeja cain jehe va ndavinttecoloco va co coinga va xincanji va ngain ná lago nttiha, co nttiha joingui va jinda co nttiha ndavintteguenxin cainxin va ixin vinttecjonhe va jinda.

³³ Co tti chojni que vaquingaria cain cocochi mé vintteḡaon na co coinga na cjoí na ngain rajna que jí icha chian para joindačo na tti conhe cain cocochi, co tti conhe ngain cayoi xí que vinttechonda espíritu jianha.

³⁴ Cottimeja cain chojni de ngain rajna mé vinttecji na tti jí Jesús. Co are vicon na Jesús, jehe na joinchetsenhe na ñao Jesús que satsjixin de ngain nonttehe na.

9

*Jesús joinchexingamehe ná xí que čhoħa vacji
(Mr. 2.1-12; Lc. 5.17-26)*

¹ Cottimeja Jesús coani barco iná co sacjoi para toenxin jinda ngain rajna Capernaum, rajné Jesús tiempo mé.

² Nttiha joicaohē na Jesús ná tti xí que čhoħa vacji, tajitsingataha xa ná camilla. Are Jesús vicon que cain chojni que joicao tti nihi mé chonda seguro que Jesús sinchexingamehe jehe tti nihi mé, Jesús ndačo ngain tti nihi:

—Ķaonha, janha ojointtatjañaha cain tti jianha que jaha rrica.

³ Co cainxin ximaestroē ley Israel que te nttiha vintteḡaxaon xa: “Nchaoha tti jinichja xí jihi; Dios tsoñaohe xa.”

⁴ Pero Jesús ovenohe tti teḡaxaon xí mé, co jehe ndačo ngain xa:

—¿Quedonda anto jianha tti jaha ra ḡaxaon ra?

⁵ ¿Quexehe tti icha tanguiha rročhjan: “Ovitjañaha jaha cain tti jianha que joinchehe”, o rrondačhjan: “Dingattjen co sattjixin rottea”?

⁶ Nchao remé, janha tsjagoha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que nchehe na.

Cottimeja ndačo Jesús ngain tti čoha vacji mé:

—Dingattjen co tsinhi camillá co sattjixin rottea para nchiandoi.

⁷ Co ngain rato mé jehe tti čoha vacji, vingattjen co sacjoi para nchiandoha.

⁸ Co cain chojni que te nttiha are vicon na milagro jihi, jehe na vinttežaon na co ndačo na que ixin Dios jian ixin joanjo joachaxin mé ngain chojni.

Jesús nichjé Mateo

(Mr. 2.13-17; Lc. 5.27-32)

⁹ Cottimeja Jesús sacjoixin de nttiha, co ngatja nttiha Jesús vicon Mateo tají ngaca mesa tti jinchestin cobro cain impuesto. Co Jesús ndačo ngain:

—Āacoi, chjin na.

Co ngain rato mé jehe Mateo vingattjen co sacjoi conixin Jesús.

¹⁰ Co después Jesús tajine ngain nchiandoha Mateo. Co nttiha conchienne tsje xicobrador de impuesto, co icha chojni que nchehe jianha, co cain nimé joine na ngain mesa conixin Jesús conixin cain chojni que jehe vacao.

¹¹ Pero canxion xifariseo vintteguicon xa jihi, co después vinttejanchiangui xa ngain tti chojni que vacao Jesús co vinttendačo xa:

—¿Quedonda ximaestrosa ra jinecaho xa cain xicobrador de impuesto, co icha chojni que nchehe jianha?

¹² Jesús coinhi jihi, co jehe ndačo ngain xa:

—Chojni que niha, chojni mé rrongondeha xincheñoan, jého tti chojni nihi, mé tti rrongondehe xincheñoan.

¹³ Sattji ra co diquinxin ra quehe rročo tti parte ngain Palabré Dios que jitaxin: “Janha rinaho que jaha ra tsiacoehe ra chojni, co nahi ixin sonhe ra coxigo para tsín ra para ixin janha.” Mexinxin janha joiha para joinichjá chojni jian, sino que janha joihi para joinichjá chojni jianha para que tsentoxinhi na de tti jehe na tenchehe na.

Are joanchianguihi na Jesús ixin quedonda chojni jehe dinttecjaño na

(Mr. 2.18-22; Lc. 5.33-39)

¹⁴ Cottimeja chojni que vacao Juan, tti vancheguitte chojni, conchienne na ngain Jesús co ndačo na:

—¿Quedonda janha na, conixin cain xifariseo anto dinttecjaño na para ixin Dios, co chojni que čhjiho jaha dinttecjaño na?

¹⁵ Jesús ndačo ngain na:

—¿Apoco cain chojni que ttji ngain ná vandango tti tottehe na nchao sinttecjaño na si xinovio řa jí xa ngayehe na? Pero, ján, tsí tiempo que xinovio satsjixin xa de ngain na, cottimeja jehe na sinttecjaño na.

¹⁶ Āonhi chojni tteyehe lontto naroa ngain rioho lontto nttaxí, ixin lontto naroa ndadixehe co ndatinchje lontto nttaxí, co tti diguichje icha tojie.

17 Ni cai xonhi chojni ttequia xan que jidatsoxinhi ngá ná roanxan nttaxí ixin xan mé anto daca tsonchintaon xan roanxan mé, co cayoi cosa mé ndasitján. Mexinxin xan que jidatsoxinhi siquia xan ngain ná roanxan naroa para que sitjanha cayoi cosa mé, ixin roanxan mé sichjeha co xan mé singoha xan. Jañá tti costumbre que jaha ra chonda ra jiha de acuerdo ngain tti janha rrindat-tjo ra.

*Are xingamehe xannchichjenhe Jairo conixin tti nchí que catte lonttoe Jesús
(Mr. 5.21-43; Lc. 8.40-56)*

18 Jesús xa jindačo cain palabra yá are joí ná xí que ttetonha ngain nihngo nttiha. Vettoxin nttajochjihi xa ngain Jesús co ndačo xa:

—Ná xannchichjanhna jaxon joexin ndavenhe xan. Pero si soixin sihi co tsín rá ngataha xan, jehe xan rrocjan rroxechon xan iná.

19 Jesús vingattjen co sajoicao xí mé conixin tti chojni que vacao.

20 Co are ongatja nttiha conchienhe ná nchí que ovechonda tteyó nano que veguenguihi ncha jni. Jimao conchienhe ncha toenxin Jesús co catte ncha ngandehe tti manta que jitsá,

21 ixin jehe ncha xaxaon ncha: “Conixin jehorrocate lonttoe Jesús, janha rroxingamana.”

22 Pero Jesús ngaria co jehe vicon nchí mé, co ndačo ngain ncha:

—Xaonha, jaha oxingamaha ixin vitticaon.

Co desde ngain rato mé, nchí mé ondaxingamehe ncha.

²³ Co después are Jesús joiji ngain nchian-doha xí que vaquetonha ngain nihngo, Jesús vicon que onttiha te ximusico para sasicjavá na xannchichjan mé. Co icha chojni anto tetsjanga na.

²⁴ Jesús ndacho ngain na:

—Daçhjexin cain ra de nttihi, ixin xannchichjan yá jeha ndadiguenhe xan, jeho tajijoa xan.

Cain chojni nttiha cjoanoa na Jesús ixin jehe ndacho jañá.

²⁵ Pero jehe coetonhe na que vaçhjexin na de nttiha, cottimeja jehe joixinhi co tsehe rá xannchichjan mé, co jehe xan vingattjen xan.

²⁶ Co ngoixin región mé anto daca conohe chojni de ixin tti milagro jian que joinchehe Jesús.

Jesús joinchexingamehe yó xí que vaguiconha

²⁷ Are Jesús sacjoixin de nttiha, rroé yó xí que vaguiconha co vinttendacho xa sén:

—¡Ttiaconoana ni ra soixin, tti razé David co tti chonda joachaxin que vechonda rey David!

²⁸ Co are Jesús joixinhi nchiandoha, jehe cayoi tti vaguiconha mé vintteconchienenhe ngaca Jesús co jehe joanchianguihi cayoi xí mé:

—¿Aditticaon ra que janha nchao sinttañoán jmacon ra?

Cayoi xí mé ndacho xa:

—Ján ditticanho na que soixin nchao sincheñoanna ni ra.

²⁹ Cottimeja Jesús catte ngataha jmacon cayoi xí mé co ndacho:

—Tsonhe inchin jaha ra ditticaon ra.

30 Co ngain rato mé ndaxingamehe jmacon cayoi xí mé. Cottimeja Jesús anto coetonhe xa co ndačo ngain xa:

—Xõnhi chojni ttequinhi ra quehe conha ra.

31 Pero are sacjoixin xa de nttiha, jehe xa coexinhi xa coequín xa chojni ngoixin región mé tti joinchehe Jesús.

Jesús joinchexoenhe ná tti čoha vanichja

32 Are cayoi xí mé tedačhjexin xa de nttiha, canxion chojni joiaohe na Jesús iná xí que čoha vanichja ixin vechonda ná espíritu jianha.

33 Are Jesús joantsje espíritu jianha mé, jehe tti xí mé coexinhi nichja. Cain chojni que vicon nttiha vinttegoan na admirado co ndačo na:

—Nttihi Israel xõnhi tiempo vocon na ná cosa inchin jihi.

34 Pero xifariseo vinttendačo xa:

—Xí jihi nchao dengui xa espíritu jianha de ixin joachaxín Satanás ixin Satanás tti ttetonhe cain espíritu jianha.

Jesús ttiaconoehc cain chojni

35 Jesús vacji ngain cain ningoe cain rajna nttiha co ngain ningoe cain rajnanchjan para vandache chojni de ixin Dios. Jehe vandačo tti jian joajna de ixin quexén ttetonha Dios, co vanchexingamehe cain chojni que vinttechonda quexeho chin.

36 Are Jesús vicon cain chojni jihi, jehe coiaco-noehc na ixin jehe na chonda na joachjaon co tedoan na desanimado inchin coleco que chondaha va tti ttingaria va.

³⁷ Cottimeja jehe ndačho ngain tti chojni que vacao:

—Ján ndoa, que cosecha atto tsje pero ninchehe ħa tsjeha na.

³⁸ Mexinxin ndache ra Xinajni que rrorroanha Xa icha ninchehe ħa para que satse na cain cosecha jihi.

10

Jesús coinchiehe tti tteyó chojni que vacao

(Mr. 3.13-19; Lc. 6.12-16)

¹ Cottimeja Jesús vayé tti tteyó chojni que vacao co joango joachaxin ngain na de nchao sengui na espíritu jianha de ngain chojni, co de nchao sinchexingamehe na cain chojni que ninxin quexeho chin.

² Jihi nombré tti tteyó chojni que vacao Jesús: tti saho vinhi Simón, co cai vinhi Pedro; Andrés xanchó jehe Pedro; Jacobo conixin Juan xanchó jehe Jacobo, co cayoi nimé xenhe Zebedeo.

³ Co Felipe; Bartolomé; Tomás; Mateo, tti co-brador de impuesto; Jacobo, xitsihi Alfeo; Lebeo, que cai vinhi Tadeo;

⁴ Simón, jehe ná de tti partidoe chojni politico que vaquetocaho chojni romano; co Judas Iscariote, tti joindačho para tse na Jesús.

Jesús rroanha chojni que vacao para joinichja na de ixin Dios

(Mr. 6.7-13; Lc. 9.1-6)

⁵ Jesús coetonhe tti tteyó chojni jihi janhi:

—Ttjiha ra ngain región tti te chojni que jeha judío, ni ttjiha ra ngain nonttehe Samaria.

⁶ Ttji ra jehó ngain chojni judío ixin jehe na te na inchin coleco que diguichoe.

⁷ Ttji ra co dindache ra chojni mé que oconchiaon tiempo para que Dios tsetonha ngain ansén jehe na.

⁸ Nchexingamehe ra chojni nihi, nchexechon ra chojni que ondadiguenhe, nchexingamehe ra tti chojni que techonda chin lepra, co dehngui ra espíritu jianha de ngain chojni. Jaha ra vittonha ra joachaxin jihi, mexinxin are sinchegonda ra joachaxin jihi ncheha ra cobro.

⁹ 'Ttjioha ra tomi; ni de oro ni de plata ni de cobre.

¹⁰ Ni ttjioha ra tti sintte ra ngatja nttiha. Co ttjioha ra icha lontto ni icha catte que jehó catte que jaha ra techjanga ra co jehó lontto que jaha ra tengaha ra, ni ttjioha ra nttacotto ixin jaha ra chonda ra derecho de sayehe ra tti sintte ra co cain icha que sondaha ra de ngain tti chojni que tsji ra.

¹¹ 'Are saso ra ngain ná rajna o ngain ná rajnanchjan, ttjé ra nttiha ná chojni jian para dittoha ra nttiha ngain nchiandoha chojni mé hasta que jaha ra satsjixin ra de ngain rajna mé.

¹² Are saso ra ngain nchia mé chjehe ra na joajna co nchetsenhe ra ñao Dios que jehe sinchençaon chojni mé.

¹³ Si chojni de nchia mé jian na, ján, Dios sinchençaon na. Pero si jehe na jianha na, Dios sinttanchaon jaha ra en lugar de jehe na.

¹⁴ Co si ngain ná nchia rroçhoha na sayaha ra na ni sincheha na caso tti jaha ra rronchache ra na, jaha ra daçhjexin ra de ngain nchia mé o de ngain rajna mé co tontsjenga ra rottea ra para que sinttji

cain jinche que teyá rottea ra nttiha. Jamé para ná señal ixin vitticaonha na jaha ra.

¹⁵ Janha rrindattjo ra seguro que are ngain tti nchanho que are Dios sinchejuzguehe cain chojni, rajna mé icha soji castigo sayé que tti castigo que vayé chojni ngain Sodoma co Gomorra.

Jesús ndache tti tteyó chojni ixin icha chojni feo sinchehe ngain na

¹⁶ ¡Tsjenxin ra! Janha rrorroanha jaha ra inchin coleco ngayehe condaniža. Dittoaxinha ra para sinttayaha ra na inchin conché dittoexinha va para denhe va. Pero dintteha ra čintto; sino que dintte ra inchin conttoanjani.

¹⁷ Pero ttjiho ra cuidado ixin rrotse ra na co sinttachianha ra na ngain juzgado, co tsaxin ra na nttá ngaxinhi nihngo.

¹⁸ Co hasta tsjiho ra na ngain tsje xigobernador co ngain tsje rey de ixin causananxin janha. Co jamé jaha ra rrochonda ra oportunidad de rronichja ra ngain cain xí mé de ixin janha, co hasta rronichja ra ngain icha chojni que jeha judío.

¹⁹ Pero are rrotse ra na co tsjiho ra na ngain juzgado, jaha ra taha ra joachjaon de ixin quežén rrondačo ra nttiha, ni taha ra joachjaon de ixin quehe palabra sinchegonda ra, ixin are mé Dios rrorroanha palabra que jaha ra rronichja ra.

²⁰ Ixin jeha jaha ra tti rronichja ra, sino que Espíritu Santo que rrorroanha Nnodá ra que ttjen ngajni, mé tti rronichja.

²¹ 'Chojni sičo jie para ixin xanchó para na-soenxon na xan. Co sehe ndodaha que jeha ndo

siĉho ndo jie para nasenxon xenhe ndo. Co sehe chjan que rroningaconhe xan ndodé xan co janné xan co jeho xan siĉho xan jie para nasenxon nindoha xan.

²² Cainxin chojni ngoixin mundo rroningaconha ra na ixin causananxin janha. Pero quexeho ra ʒo sitticaon ni ra co sinchehe ra cain tti janha coetonha ra hasta are ndasenhe ra, jaha ra rrochonda ra iná vida naroaxin ngain Dios.

²³ Are chojni de ngain ná rajna feo sinchehe na nganji ra jaha ra sattjixin ra de nttiha co sattji ra ngain iná rajna. Janha rrindattjo ra seguro que ni ʒa tsjaha ra tsingaria ra ngain cainxin rajna de chojni Israel are janha, tti Xí que joixin de ngajni, orrocjan na sihi iná.

²⁴ Ni ná tti jitangui jeha icha nohe que ximaestro, co ni ná tti nchehe ʒa jeha icha ttetonha que xinajní.

²⁵ Tti jitangui, ĉhoha tsangui icha que jeho tti nohe ximaestro, co tti nchehe ʒa ĉhoha icha tsetonha que jeho inchin ttetonha xinajní. Jañá si janha tti inchin ndodá ra de ngain nchia co ncheguinhí na na Beelzebú, que rroĉho Satanás, seguro jehe na rronichja na icha feo de ixin jaha ra.

*Quensen jiquininxin rroʒagoen ni
(Lc. 12.2-9)*

²⁶ Pero ʒagoenha ra ni ná chojni ixin anto daca tsononxin cain tti ndoa de ixin Dios co ʒonhi cosa jima que tsononxinha.

²⁷ Cain tti rrindattjo ra, nchenohe ra tsje chojni, co cain tti rrindattjo ra jimao, jaha ra nchenohe ra

icha tsje chojni inchin rrocani ra ná nchia co de nttiha rronichjaxin ra.

²⁸ Xagoenha ra tti chojni que natjayaxon ixin mé čoha nasoenxon almé ni. Xagoenhe ra jeho Dios ixin jeho mé tti nchao nasoenxon cuerpoe ni co almé ni ngain infierno.

²⁹ ¿Quejanhi rentte yó conttoachjan? ¡Anto tsjeha tomi! Pero masqui jamé ni ná de jehe va denha va si Ndodá ra que ttjen ngajni danjoha joachaxin.

³⁰ Co jehe Ndo nohe Ndo hasta quejanhi Xajá ra chonda ra.

³¹ Mexinxin jaha ra Xaonha ra, ixin para Dios, jaha ra icha rentte ra que tsje conttoa.

Tti chojni que ndačo ngattoxon con icha chojni ixin Jesús jian

(Lc. 12.8-9)

³² Cain chojni que rrondačo ngattoxon con icha chojni que ixin janha jian na, cai janha rrondačjan ngattoxon con Ndodana que ttjen ngajni que ixin chojni mé jian cai.

³³ Pero tti chojni que ndačo ngattoxon con icha chojni que ixin janha jeha jian na, cai janha rrondačjan ngattoxon con Ndodana que ttjen ngajni que ixin chojni mé jeha jian cai.

Causexin Jesús chojni rrochjeya

(Lc. 12.51-53; 14.26-27)

³⁴ Xaxaonha ra que janha joihi ngataha nontte jiji para que cain chojni sinao chó ixin tsoenha jamé, sino que cainxin chojni rrochjeya na ixin janha joihi.

³⁵ Ixin ttoha chojni sitticaon na janha co ttoha na nahi, mexinxin ná xanxí co ndodé xan tsoñaöhe

chó na co xannché co janné xan tsoñaöhe chó na, co nchidainda co jannché ncha tsoñaöhe chó na.

³⁶ Jañá cada chojni rroningaconhe na jeho nindo na.

³⁷ 'Chojni que rinao ndodé o janné icha que janha, chojni mé jiquininxinha soan chojnina, co tti chojni que rinao nchichjehe o xitsihi icha que janha, chojni mé jiquininxinha soan chojnina,

³⁸ co tti chojni que tsinha en peligro vidé na para ixin janha, chojni mé jiquininxinha soan chojnina.

³⁹ Tti icha rinao vidé, mé sinchetján vidé. Pero tti sinchetján vidé de ixin causananxin janha, mé rrochonda iná vida nroaxin.

Tti chojni que rroxenguehe hna
(Mr. 9.41)

⁴⁰ 'Tti chojni que jian sayaha jaha ra, chojni mé cai sayehna na janha, co tti chojni que sayehna janha, chojni mé cai sayé na jehe tti rroanha na janha.

⁴¹ Co tti chojni que sayé ná profeta ixin profeta nichja joajna que dayé de ngain Dios, chojni mé Dios tsjenguehe hna inchin xenguehe hna ná profeta. Co tti sayé ná xí jian ixin xí mé jian xa, chojni mé Dios tsjenguehe hna xajeho inchin xenguehe hna ná chojni jian.

⁴² Co quexeho chojni que sanjo masqui ná vaso de jinda quin ngain quexeho chojni que ditticaon na janha jeho ixin ditticaon na janha, chojni mé Dios tsjenguehe hna cai.

11

Tti chojni que Juan rroanha (Lc. 7.18-35)

¹ Are Jesús joexin ndache cain cosa jihi tti tteyó chojni que vacao, sacjoixin de nttiha para join-dache icha chojni de ixin Dios ngain icha rajna que vintte ngain región mé.

² Juan, tti vanheguitte chojni, ovehe ngaxinhi cárcel tiempo mé pero jehe conohe cain tti jian que jinchehe Jesucristo. Cottimeja jehe rroanha yó chojni que vacao para joiganchianguihi na Jesús

³ ixin quensen jehe, co ndačo na ngain Jesús:

—¿Ajaha tti Cristo tti chonda que tsí, o ʒa rrochonda na que rrochoan na iná chojni?

⁴ Jesús ndačo:

—Ttji ra co dindache ra Juan tti jaha ra tedicon ra jaxon co tti jaha ra tettinhi ra.

⁵ Diquequinhi ra Juan ixin tti chojni que vaguiconha, jai onchao dicon, co ixin tti čoha vacji, jai onchao čhji, co ixin oxingamehe tti chojni que veninxin tti chin que dinhi lepra, co ixin tti chojni que vaquinha, jai onchao ttinhi, co ixin tti chojni que ondavenhe, jai oxechon, co ixin tti chojni que ʒa vaquinha de ixin Dios, jai janha ndattjan.

⁶ Co anto čhjoin para ixin tti chojni que chonda seguro nganji na janha.

⁷ Are cayoi tti chojni mé sacjoi na, Jesús coexinhi ndache icha chojni que te nttiha de ixin Juan, tti vanheguitte chojni, co Jesús ndačo:

—Are cjo ra ngagaha jna tti ʒonhi chojni te para joitsjehe ra Juan, ¿quehe ʒaxaon ra rroguicon

ra jehe? ¿Añaxaon ra ixin joarrixaon seguroha inchin nttaxiji que nchequingui čhintto,

⁸ o ani ná xí que jingá lontto anto fino inchin ná rey? ¿Apoco chonxinha ra ixin tti chojni que jingá lontto anto fino, jehe na te na ngain nchia anto fino?

⁹ Mexinxin ¿quehe ðaxaon ra rroguicon ra? ¿A ná profeté Dios? Ján ndoa que Juan ná profeté Dios, co jehe icha rentte que ná profeta.

¹⁰ Juan, mé tti rročo ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana

para que jehe mé sinchechjian nttiha para ixin jaha.

¹¹ Janha seguro rrindattjo ra que de cainxin chojni que concjixin ngataha nontte jiji hasta jai, ngattoxon con Dios ðonhi chojni icha importante que jehó Juan. Pero masqui jamé, tti chojni que icha importanteha de ngain tti parte que ttetonha Dios de ngain ansén chojni, chojni mé ða icha importante que Juan.

¹² 'Desde que Juan jói para joindache chojni de ixin Dios hasta jai, atto tsje chojni rinao na rrocayacoen na tti ttetonha Dios que ttjen ngajni, co chojni čhintto rinao na sinchexante na tti ttonha Dios.

¹³ Cain profeté Dios que jói co ley que vayé Moisés jinchenohe chojni de ixin queñén tsetonha Dios ngain ansén chojni hasta que jói Juan para joinchenohe chojni que ixin otoiñ tsí tiempo mé.

¹⁴ Co si jaha ra rinao ra sitticaon ra, ján, Juan mé tti profeta Elías que chonda que jói iná.

15 Xó tsinxin ra, ttinhi ra jian.

16 ¿Quehe sinttacaninxin chojni de ngain tiempo jihi? Jehe na inchin tti xannchinnchinchjan que tsontaon ngataon ndásin co toyaotte xan icha xan-compañeroe xan:

17 “Janha na jointtachjian na són conixin ná nntaxo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

18 Rrocho ixin joí Juan, tti vancheguitte chojni, co jehe vaguiha vino ni vajineha tsje. Co jaha ra ndačo ra que ixin jehe chonda ná espíritu jianha.

19 Cottimeja joihi janha, tti Xí que joixin de ngajni, que jinecaho chojni co dihi vino. Co jaha ra ndačo ra que ixin janha anto jine co anto dihi hasta coan na, co ixin janha amigoe cain chojni que tenchehe jianha, co xicobrador de impuesto. Pero tti nchecoene Dios chojni, mé anto jian ixin tti jian mé xago ngain tti nchehe chojni que ditticaon ngain jehe.

*Rajna que vintteguitticaonha
(Lc. 10.13-15)*

20 Cottimeja Jesús coexinhi joinchesattehe chojni de cain rajna tti jehe joinchehe icha tsje milagro, ixin cain chojni mé xa coentoxinha na vidé na de tti jianha que tenchehe na. Mexinxin Jesús ndačo ngain na:

21 —¡Anto tangui tsonha jaha ra de ngain rajna Corazín, co cai jaha ra de ngain rajna Betsaida! Ixin tti cain milagro que janha jointtaha ngayaha ra, si cain milagro mé rroconhe ngayehe chojni de ngain ciudad de Tiro co ciudad de Sidón, cain

chojni mé osé rroquentoxinhi na vidé na de tti jianha que vanchehe na. Co para rrocjago na que ixin jehe na orroquentoxinhi na vidé na, jehe na rroguinttengá na lontto ttie co rrocjinttjitte na nntesoguihi já na.

²² Pero jaxon janha rrindattjo ra que para ngain tti nchanho que Dios sinchejuzguehe cain chojni, jaha ra tti sayehe ra ná castigo icha soji que chojni ngain ciudad de Tiro co Sidón.

²³ Co jaha ra de ngain rajna Capernaum, ¿axaxaon ra que ixin anto importante ra para ngain Dios? Jeha jamé ixin jaha ra chonda ra que tsji ra ngain infierno. Ixin tti cain milagro que janha jointtaha ngayaha ra, si mé rroconhe ngayehe chojni de ngain ciudad de Sodoma, cain chojni mé seguro rroquentoxinhi na vidé na co ciudad mé xa rrogehe hasta jai.

²⁴ Pero janha rrindattjo ra que para ngain tti nchanho que Dios sinchejuzguehe cainxin chojni, jaha ra tti sayehe ra ná castigo icha soji que cain chojni de ngain regioen Sodoma.

*Are Jesús ndačo: “Sihí ra nganji co nchejogaha ra”
(Lc. 10.21-22)*

²⁵ Ngain rato mé Jesús ndačo:

—Padre soixin que joinchechjian ngajni co nontte, janha chjaha gracias soixin ixin soixin coema tti ndoa para ngain tti chojni que anto chonxin co anto sé coangui na, co cjoago tti ndoa mé ngain tti chojni que tsjeha chonxin.

²⁶ Ján, Padre, ixin soixin jañá rinao.

²⁷ 'Ndodana que ttjen ngajni chjana Ndo cain cosa. ŋonhi chojni chonxin cainxin de ixin Xenhe Ndo, sino que jehø jehe Ndo nohe Ndo de ixin Xenhe Ndo. Co ŋonhi chojni chonxin cainxin de ixin jehe Ndo, sino que jehø Xenhe Ndo conixin cain tti chojni que jehe Xan sino Xan sinchenohe Xan de ixin jehe Ndo.

²⁸ ŋacoi ra nganji na, cain jaha ra ŋo atto cončhjen ra de ngain ŋa co de joachjaon que techonda ra, co nganji na janha sinchejogaha ra.

²⁹ Dittoaxin ra ditticaon ra nchehe ra tti janha rrittonha ra co tangui ra cain tti janha rrintta-coanha ra, ixin janha jeha čhinto na, co anto nda ansenna, co jamé nchao sinchejogaha almá ra.

³⁰ Tti janha rrittonha ra tanguiha para jaha ra sitticaon ra sinchehe ra.

12

Chojni que vacao Jesús cončhinji na trigo ngain nchanho que nchejogaha ni

(Mr. 2.23-28; Lc. 6.1-5)

¹ Ngain tiempo mé ngain ná nchanho que nchejogaha ni, Jesús conixin tti chojni que vacao vatto na ngain canxion jngui que dinga trigo. Co chojni mé venhe na jintta, mexinxin coexinhi na cončhinji na canxion ninchjenhe trigo para joine na.

² Co canxion xifariseo vintteguicon xa mé, co vinttendačo xa ngain Jesús:

—Tsjenxin, chojni que čhjiho tenchehe na ŋa co jiquininxinha sinchehe ni ŋa ngain tti nchanho que nchejogaha ni.

³ Pero Jesús ndačo ngain xa:

—¿Axa tsjeha ra tti jitaxin ngain Palabré Dios ixin quehe joinchehe David conixin cain xicompañeroe ná nchanho are vintteguenhe na jintta?

⁴ David conixin cain xicompañeroe mé joixinhi na tti nihngo icha importante co joine na tti niottja que jiquininxinha para rrojine na jehe na, sino que jeho xidána vequininxin vane xa niottja mé.

⁵ ¿O ani xa tsjeha ra tti jitaxin ley que vayé Moisés que ixin cain xidána de ngain nihngo icha importante xonhi tiempo nchejogaha xa ngain tti nchanho que nchejogaha ni, co mé jeha ná cosa jianha para ixin jehe xa?

⁶ Co janha rrindattjo ra que jí nganji ra jaxon ná tti icha importante que nihngo mé.

⁷ Jaha ra xa coinxinha ra tti ndačo Dios ngain tti jitaxin Palabré que ndačo: “Janha rinaho que jaha ra tsiaconoehe ra chojni, co nahi ixin sonhe ra coxigo para tsín ra para ixin janha.” Si jaha ra orroquinxin ra mé irronichjaha ra jianha de ixin chojni que ncheha ni ná cosa jianha.

⁸ Janha, tti Xí que joixin de ngajni, cai chonda joachaxin para tti nchanho que nchejogaha ni.

*Ná xí que ndadixemadoho ná rá
(Mr. 3.1-6; Lc. 6.6-11)*

⁹ Cottimeja Jesús sacjoixin de nttiha, co sajoixinhi iná nihngo.

¹⁰ Co ngaxinhi nttiha tají ná xí que ndadixemadoho ná ra, co xifariseo techonhe xa quehe cosa nchaoha rrojinchehe Jesús para rrocjanguihi xa. Mexinxin joanchiangui xa ngain co ndačo xa:

—¿Ají joachaxin para que sinchexingamehe ni chojni nihi mero ngain tti nchanho que nchejogaha ni?

¹¹ Jesús ndačo:

—Si ná de jaha ra chonda ra ná coleco, co si setsingá va ná pozo ngain tti nchanho que nchejogaha ni, ¿atsjiha ra para sigantsjea ra va? ¡Seguro que ján!

¹² Nchao, janché ndachjenji ni ra, ¿ajeha anto icha rentte ná chojni que ná coleco? Mexinxin jeha jianha para que jehe ni sinchehe ni ná cosa jian ngain tti nchanho que nchejogaha ni.

¹³ Cottimeja ndačo Jesús ngain tti xí que dixemadoho rá:

—Ttinxe rá.

Co are jehe coinxe rá, ojian vittohe ra inchin ra jngo.

¹⁴ Cottimeja xifariseo mé vinttegačhjexin xa de nttiha co coexinhi xa cjoao chó xa ixin quečén sinchehe xa para nasoenxon xa Jesús.

Tti dindačo profeta Isaías de ixin Jesús

¹⁵ Are Jesús conohe cain mé, jehe sacjoixin de nttiha co anto tsje chojni rroé na Jesús. Co jehe joinchexingamehe cainxin chojni nihi que vetan.

¹⁶ Co jehe vaquetonhe na que rrondacheha na icha chojni ixin quensen jehe.

¹⁷ Jamé, para que joiconhe tti dicjin profeta Isaías que ndačo:

¹⁸ Yá chonda ra tti nchehe xana, tti janha coinchiá, tti janha anto rinaho, co de ixin jehe, janha anto chahna.

Co sanjo Espíritu Santo ngain jehe, co jehe tti rrondache cain chojni de cainxin nación quehe jiquininxin sinchehe na.

19 Jehe xonhi chojni tsetocaho, ni tsoyaotteha chojni,

ni jehe rronichjaha soji ngain chojni ngá nttiha.

20 Jehe sincheanimá tti chojni que anto tangui tonhe na

co jion sinchecoehne chojni que ditticaon nchion, hasta que cainxin chojni sinchehe na jian inchin jehe tsetonha.

21 Co cainxin nación satsoan que ixin jehe tti ttjen-guijna chojni.

Are ndačo chojni ixin Jesús chonda joachaxín Satanás

(Mr. 3.19-30; Lc. 11.14-23; 12.10)

22 Cottimeja joicaohe na Jesús ná xí que čho ha vaguicon ni vanichja ixin vechonda xa ná espíritu jianha. Co Jesús joinchexingamehe xí mé para que jehe xa onchao vicon xa co onchao nichja xa.

23 Cainxin chojni goan na admirado ngain rato mé, co vinttendačo na:

—Puede jiji tti razé David que rrochonda xajeho joachaxin que vechonda rey David.

24 Pero are xifariseo vinttequinhi xa jiji, vinttendačo xa:

—Xí jiji dengui xa espíritu jianha pero de ixin joachaxín Satanás, tti rey de cain espíritu mé co tti dinhi Beelzebú cai.

25 Jesús oconohe quehe tendačo xifariseo mé, mexinxin jehe ndačo ngain xa:

—Si chojni ngain ná nación chjea na para tte-tocaho chó na, nación mé tsončjenha sé, co si ná rajna o ná nindoha anto tteto na, cai tsončjenha chojni mé sé.

²⁶ Jamé cai si Satanás dengui chó jeho, rrocho que jeho ttetocaho chó co joachaxín tsonchjenha sé, toin ndatsjexin.

²⁷ Mexinxin, si inchin ndacho ra jaha ra que janha dehngui espíritu jianha de ixin joachaxín Satanás, si jamé ¿quensen danjo joachaxin ngain chojnia ra para que jehe na dengui na espíritu jianha? Mexinxin jeho chojnia ra tjago que jaha ra jeha ndoa tti jaha ra xaxaon ra.

²⁸ Pero janha dehngui espíritu jianha de ixin joachaxín Espíritu Santo de Dios, co mé rrocho que tti ttetonha Dios ojí nganji ra.

²⁹ 'Ixin si ná chojni rinao santsjehe cosé iná xí tsanga de ngaxinhí nchiandoha xa, saho chonda que tsia xa.

³⁰ 'Tti chojni que ncheoxoxinha tti janha rrint-taha, chojni mé ningaonna janha, co tti chjiha nganji na janha para ttjejo na chojni, mé icha tonchjequé na.

³¹ 'Mexinxin janha rrindattjo ra que cain chojni nchao sitjañehe na cain tti jianha que nchehe na co cain tti jianha que nichja na, pero si rronichja na jianha de ixin Espíritu Santo, Dios sinchetjañeha na palabra mé.

³² Co quexeho tti rronichja palabra jianha de ixin janha, tti Xí que joixin de ngajni, nchao sitjañehe chojni mé, pero tti chojni que rronichja palabra jianha de ixin Espíritu Santo, Dios xonhi tiempo sinchetjañehe chojni mé, ni jaxon ni después que jehe ndasenhe.

Nttattochjoin datsoan ni nta de ixin ttochjoín

ntta

(Lc. 6.43-45)

³³ 'Si nttattochjoin jian nttá, cai ttochjoin que nchechjian nttá jian tto; co tti nttá xonhi xé, cai ttochjoin que nchechjian nttá xonhi xé tto. Mexinxin cada nttattochjoin datsoan ni nttá de ixin ttochjoín nttá.

³⁴ ¡Jaha ra inchin xenhe conché! ¿Quexén nchao rronichja ra cosa jian si jaha ra jianha ra? Rroha ni nichja cain tti jí ngain ansén ni.

³⁵ Ná chojni jian jehe nichja cosa jian ixin tti jian jí ngain ansén; co ná chojni jianha jehe nichja cosa jianha ixin tti jianha mé jí ngain ansén.

³⁶ Co janha rrindattjo ra que are ngain tti nchanho que Dios sinchejuzguehe cainxin chojni, are mé cainxin na chonda que tsjenga na hna de ixin cain palabra que xonhi xé ndačo na.

³⁷ Ixin inchin rronichja jaha, jamé Dios sinchejuzgá nganji. Co are mé tsonoha si ján rrica o ni xonhi rrica.

Are chojni jianha joanchia na ná milagro

(Mr. 8.12; Lc. 11.29-32)

³⁸ Cottimeja canxion xifariseo co canxion xi-maestroe ley Israel vinttendačo xa ngain Jesús:

—Maestro, janha na rinaho na sicon na que jaha sinchehe ná milagro.

³⁹ Jesús ndačo ngain xa:

—Chojni jianha que ditticaonha na Dios rinao na sicon na ná milagro, pero chojni mé Dios tsjagoeha na icha milagro que jehó inchin tti conhe profeta Jonás.

⁴⁰ Ixin jamé inchin Jonás vehe ní nchanho co ní ttie ngaxinhi tsehe copescado jie, jamé janha cai,

tti Xí que joixin de ngajni, sarihi ngadoho nontte ní nchanho co ní ttie.

⁴¹ Cain chojni que vintte ngain ciudad de Nínive, jehe na singattjen na ngain tti nchanho are Dios sinchejuzguehe cainxin chojni para rrocho na jie para ixin cain chojni de ngain tiempo jihi, ixin jehe na coentoxinhi na vidé na are Jonás join-dache na joajné Dios. Co nttihi nganji ra jaxon jí ná tti icha importante que Jonás, pero jaha ra čoha ra ditticaon ra.

⁴² Cai tti reina que joixin de ngain nontte Sabá icha sur, singattjen ngain tti nchanho are Dios sinchejuzguehe cainxin chojni de ngain tiempo jihi para que reina mé rrocho jie para ixin jehe na ixin jehe reina mé joixin anto cjin para joiquinhi tti venohe Salomón, co nttihi nganji ra jaxon jí ná tti icha importante que Salomón.

Tti espíritu jianha que cjan
(Lc. 11.24-26)

⁴³ Co Jesús ndačo cai:

—Are ná espíritu jianha dačhjexin de ngain cuerpoe ná chojni, espíritu mé sattji ngain tsje lugar xema para dicjé ttinó sinchejogaha, co are jehe idittjaha lugar mé, jehe řaxaon:

⁴⁴ “Janha rrocjan na ngain nchiania tti vačhjexin.” Co are jehe espíritu jianha mé cjan, dittja ngain cuerpoe chojni mé inčhin ná nchia que řonhi chojni te, tti diganjo na jian, co cain roa ngaxinhi nchia mé.

⁴⁵ Cottimeja jehe espíritu jianha mé dirroé iyáto espíritu icha jianha que jehe para que dintte cain espíritu mé ngaxinhi cuerpoe chojni mé, co chojni

mé cjan icha tangui tonhe que are saho. Co jamé tsonhe ngain chojni jianha tehe cai.

Janné Jesús co xanchó
(Mr. 3.31-35; Lc. 8.19-21)

⁴⁶ Jesús řa jinichja cain yá ngain chojni are joí janné conixin xanchó Jesús ixin joinao na rronichjé na Jesús, pero ndoja tavintte na ixin tsje chojni sinxinhi nchia tti jí Jesús.

⁴⁷ Ná chojni ndačo ngain Jesús:

—Janná co xanchó ndoja nttihi te na co rinao na rronichja na nganji.

⁴⁸ Pero Jesús ndačo ngain chojni mé:

—¿Quensen jannana, co quecá xanchian?

⁴⁹ Cottimeja jehe cjoago ngain chojni que vacao co ndačo:

—Chojni tehe tti inchin jannana co jehe na tti inchin xanchian,

⁵⁰ ixin quexeho chojni que nchehe inchin rinao Nnodana que ttjen ngajni, chojni mé tti xanchian co chojni mé tti jannana.

13

Ejemploe tti joiquenga trigo ngataon jngui
(Mr. 4.1-9; Lc. 8.4-8)

¹ Ngain nchanho mé Jesús vačhjexin de nchia mé co sacjoi para ngandehe lago.

² Pero anto daca řatte anto tsje chojni ngain jehe, mexinxin jehe coani ná barco para ngataonhe jinda mé co de nttiha ndachexin cain chojni mé de ixin Dios. Cain jehe na tavintte na ngandehe jinda mé.

³ Ngain rato mé jehe joinchegonda tsje ejemplo para joinchecoenhe na tsje cosa. Saho jehe ndačo:

—Ná xí cjoí xa joiquenga xa trigo ngataon jngui.

⁴ Co are coexinhi xa cjoa xa trigo ngataon jngui, canxion noanchjan de trigo vinttji ngá nttiha, co jói conttoa ndajoine va trigo mé.

⁵ Co icha noanchjan de trigo vinttji ngataha tti jí ttjao tti ttjinha jinche jí, co trigo mé anto daca činhi ixin tsjeha jinche řanotaon.

⁶ Pero are činhi nchanho, ndaxehntte catrigo mé, co ixin řonhi noehe ca vechonda ca, anto daca ndaxema ca.

⁷ Co icha noanchjan de trigo vinttji ngacjan canchaha, co canchaha mé icha daca vangui ca co coančjandaha ca trigo para vangui.

⁸ Pero icha noanchjan de trigo vinttji tti jí jian jinche, co mé joanjo jian cosecha. Canxion nihi trigo mé joanjo de cien noanchjan cada trigo, icanxin trigo joanjo de sesenta noanchjan, co icanxin trigo joanjo de treinta noanchjan, cada trigo.

⁹ Si jaha ra ttinxin ra, ttinhi ra jian.

*Quedonda Jesús joinchegonda tsje ejemplo
(Mr. 4.10-12; Lc. 8.9-10)*

¹⁰ Cottimeja tti chojni que vacao Jesús conchienhe na ngain co ndačo na:

—¿Quedonda ndache chojni conixin ejemplo?

¹¹ Jesús ndačo ngain na:

—Jaha ra Dios ndačo para que tsonoha ra queřén ttetonha jehe ngain ansén chojni, pero jehe na čhoha tsonohe na.

¹² Tti ttinxin, Dios sinchequinxin icha para que jehe icha tsinxin; pero tti xonhi ttinxin, Dios santsjehe hasta tti nchion que jehe ttinxin.

¹³ Mexinxin janha ndattjan na de ixin ejemplo ixin jehe na dicen na pero inchin rroguiconha na, co jehe na ttinhi na pero inchin rroquinha na ixin ttinxinha na tti jehe na ttinhi na.

¹⁴ Jañá tti jehe na tenchehe na yá joiconhe tti dindačo Dios ngain profeta Isaías are Isaías dicjin:

Jaha ra seguro tsinhi ra, pero tsinxinha ra;
sicon ra, pero satsoanha ra.

¹⁵ Ixin ansean ra atto ndaconcha,
co ndatsjoan ra ttjenguijnaha ra para daca tsinxin
ra,
co masqui tonoha ra que jmacon ra teḡangué,
pero ttejé,
para que rrochonxinha ra tti jaha ra dicen ra,
ni tsinxinha ra tti jaha ra ttinhi ra,
ni ansean ra tsinxinha,
ni rroḡaxaonha ra sihi ra nganji na janha para que
janha tsjenguijna ra.

¹⁶ Cottimeja Jesús cjan ndačo ngain chojni que vacao:

—Pero janha ndačhjan que anto čhjoin para ixin jaha ra ixin chonxin ra tti dicen ra, co ttinxin ra tti ttinhi ra de ngain ndatsjoan ra.

¹⁷ Janha seguro rrindattjo ra que are icha saho tsje profeta co tsje chojni jian de ngain ansén joinao na rroguicon na cain tti jaha ra tedicon ra jaxon, pero jehe na iviconha na. Co cai joinao na rroquinhi na cain tti jaha ra tettinhi ra jaxon, pero jehe na icoinha na.

Jesús ndaĉho quehe rroĉho ejemploe tti joiquenga trigo

(Mr. 4.13-20; Lc. 8.11-15)

18 Ttinhí ra quehe rroĉho ejemploe tti joiquenga trigo ngataon jngui.

19 Tti chojni que ttinhí tti joajna de ixin queĉén siquetonha Dios ngain ansén na, co jehe na ttinxinha na joajna mé, chojni mé inchin tti trigo que vinttji ngá nttiha. Co ttí inchínji co jehe ndanchetjani na joajné Dios que vittohe ngain ansén na.

20 Co tti trigo que vinttji ngataha tti jí ttjao, mé rroĉho tti chojni que ttinhí joajné Dios co jehe na anto ĉhjoin tonohé na dayé na joajna mé.

21 Pero inchin trigo mé chondaha tsje noehe seha tonĉhjenhe trigo, jamé jehe chojni mé cai are tangui tonhe na co icha chojni feo nchehe ngain na ixin ditticaon na joajné Dios, cottimeja jehe na ndadoan na desanimado.

22 Co tti trigo que vinttji ngacjan canchaha, mé rroĉho tti chojni que ttinhí joajné Dios, pero jehe na icha ĉaxaon na cain cosa que jí ngataha nontte jihí co tomi, mé tti ncheyehe na, co cain mé tti ndanchetjañehe na joajné Dios co incheha na inchin ttetonha joajna jihí.

23 Pero tti trigo que vinttji ngain tti jian jinche, mé rroĉho tti chojni que ttinhí joajné Dios co ttinxin na, co jehe na inchin tti trigo que anto tsje noa joinchechjian. Canxion jehe na inchin tti trigo que joinchechjian cien noa ngain nacoa ninchjan, co icanxin na inchin tti trigo que joinchechjian sesenta co de treinta noa ngain nacoa ninchjan.

Ejemploe ca xonhi xé ngagaha trigo

24 Cottimeja Jesús ndačo ngain na iná ejemplo jiji:

—Rrondattjo ra queḡén ttetonha Dios que ttjen ngajni. Mé inchin ná xí que coenga jian trigo ngain jnguihi.

25 Pero ttie are cain chojni tatejoa na, cjoí ná chojni nttiha que ningaconhe jehe tti jnguihi mé co coenga anto tsje tsehe ca que ḡonhi ḡé ngain jngui mé, co sacjoi.

26 Are trigo mé vangui, ocoexinhi joinchechjian ninchjan, hasta are mé cononxin quehe clase de ca jí nttiha.

27 Cottimeja ninchehe ḡé tti jnguihi mé cjoí na joindačo na ngain: “Si tti trigo que soixin coenga ngataon jngui cjoí joxon trigo jian, ¿quettinó joixin ca jiji que ḡonhi ḡé?”

28 Tti jnguihi mé ndačo ngain na: “čhonja chojni que ningaconna joinchehe jiji.” Cottimeja ninchehe ḡa joanchiangui na co ndačo na: “¿Ari-nao tsji na janha na sigantsjengui na cain ca mé?”

29 Pero tti jnguihi ndačo ngain na: “Nahi, ixin are santsjengui ra ca mé, santsjengui ra trigo cai.

30 Icha jian tančhjanda ra ca sanguicaho ca trigo hasta are cosecha, cottimeja janha rrorroanha ninchehe ḡana para que saho santsjegaha na ca yá, co tsia na ca para rroche ca, cottimeja tsenchjinha na joxon trigo ngain nchiania.”

*Ejemploe ná tsé que dinhi mostaza
(Mr. 4.30-32; Lc. 13.18-19)*

31 Cai ndačo Jesús ngain na ejemplo jiji:

—Tti ttetonha Dios ngain ansén chojni, mé inchin ná tsé de ca que dinhi mostaza que ná xí ttenga ngataon jnguihi xa.

³² Tsé mé anto icha nchinnchin tse que cainxin tsehe icha ca; pero qué tsé mé anto dangui ca hasta icha jie diji ca que cain icha ca. Co dangui ca inchin ná nttá jie que hasta conttoa nchechjian va caqué va ngagaha ramé ca mé.

Ejemplo levadura

(Lc. 13.20-21)

³³ Cai ndačo Jesús ngain na ejemplo jiji:

—Tti ttetonha Dios ngain ansén chojni, mé inchin levadura que ná chojni ttinttjecjan ngain hariné niottja para que nchegangi nchoho.

Quexén vanchegonda Jesús cain ejemplo

(Mr. 4.33-34)

³⁴ Jesús ndačo cain jiji ngain chojni de ixin ejemplo, co si jeha de ixin ejemplo, jehe xonhi vandačo ngain na.

³⁵ Jañá conhe para joiconhe tti dindačo Dios ngain profeta are jehe dicjin janhi: Janha rronichja de ixin ejemplo; janha rrondačhjan cosa que vinttema desde que are nontte conchjian nontte.

Jesús ndačo quehe rročo ejemplo tti ca que chinhi ngagaha trigo

³⁶ Jesús joanjo joajna ngain cain chojni mé, cotimeja jehe conixin chojni que vacao sacjan na para ngain tti nchia que vintte na are mé. Are ongain nchia mé cain chojni que vacao conchienen na co ndačo na ngain:

—Ndanchenji ni ra quehe rrocho ejemploe tti ca que chinhi ngagaha trigo ngataon jngui.

³⁷ Cottimeja Jesús ndacho:

—Tti ttenga jian trigo, mé janha, tti Xí que joixin de ngajni.

³⁸ Co jngui rrocho mundo jihi. Co tti jian trigo, mé rrocho tti cain chojni que chonda parte ngain tti ttetonha Dios, co tti ca que chinhi ngagaha trigo, mé rrocho tti cain chojni que nchehe inchin ttetonha inchínji.

³⁹ Co tti coenga ca, mé tti ningaonna, co mé rrocho mero inchínji. Co cosecha rrocho are ondatsjexin mundo. Co tti satse cosecha jihi, mé cain ángel de Dios.

⁴⁰ Jamé inchin ca que chinhi ngagaha trigo xatse ca para che ca ngacjan xohi, cai jamé tsonhe chojni inchínji are ondatsjexin mundo jihi.

⁴¹ Janha, tti Xí que joixin de ngajni, rrorroanha tsje ángel para sigantsjeyexin de ngain chojni que ditticaon na janha tti cain chojni que ncheyehe icha chojni para nchehe na jianha, co cain chojni que nchehe jianha,

⁴² para siguinttjiate na ngacjan xohi. Nttiha tti rrotsjanga na co sinetaon neno na.

⁴³ Cottimeja cain tti chojni que nchehe inchin rinao Dios, chojni mé tsonguixima na inchin nchanho ngain lugar tti ttetonha Ndodá na que ttjen ngajni. ¡Si jaha ra ttinxin ra, ttinhi ra jian!

Ejemploe tti tesoro que jixavá

⁴⁴ Jesús ndacho iná ejemplo jihi:

—Tti ttetonha Dios ngain ansén chojni, mé inchin ná tesoro que jixavá ngataon ná jngui. Are

ná xí dittja xa tesoro mé, cjan xa tjavá xa nttiha iná. Cottimeja anto ché xa sacjan xa nchiandoha xa, nchecji xa cainxin cosa que chonda xa co ttehna xa jehe tti nontte que jiřavá tesoro mé.

Ejemploe tti perla que anto rentte

⁴⁵ Co cai tti ttetonha Dios ngain ansén chojni, mé inchin tti perla que anto rentte. Co xitachji perla,

⁴⁶ are dittja xa perla mé, jehe xa ttji xa co nchecji xa cainxin cosa que chonda xa para ttenanxin xa perla mé.

Ejemploe ná nonchaha

⁴⁷ Co cai tti ttetonha Dios ngain ansén chojni, mé inchin ná nonchaha que tja na ngangui jinda co tse cain clase de copescado.

⁴⁸ Are ondacaon nonchaha mé de copescado, xitse va dantsjengui xa nonchaha mé hasta tti ngandehe jinda. Co nttiha ttinchiehe xa cain copescado; tti copescado jian ttenga xa va ngain nntaxa co copescado que řonhi řé jehe xa ttinttji xa va.

⁴⁹ Jamé tsonhe are ondatsjexin mundo jiji; tsí tsje ángel de Dios para santsjenda cain chojni que nchehe jianha de ngayehe chojni que nchehe jian.

⁵⁰ Co ángel mé rrorroanha cain chojni que nchehe jianha para ngacjan řohi, nttiha tti jehe na rrotsjanga na co sinetaon neno na.

Tti tesoro naroaxin co tti tesoro onttaxí

⁵¹ Cottimeja Jesús joanchiangui ngain chojni que vacao, co ndařo:

—¿Attinxin jaha ra cain jiji?

Jehe na vinttendařo na:

—Ján.

52 Cottimeja Jesús ndačo:

—Mexinxin cain jihi rročo que are ná ximaestroey ley Israel ditticaon xa tti janha ndačhjan, jehe xa inchin ná chojni que diquenchjinha yó tesoro ngaxinhi nchiandoha co jehe nchao dantsje tesoro naroaxin co tesoro nttaxí. Ixin ximaestroey ley mé nchao nchecoenhe xa chojni quehe ttonha ley mé co jai cai nchao ndache xa chojni tti ndačhjan janha. Mexinxin rročo que chonda xa yó tesoro, tti nttaxí co tti naroaxin.

Jesús ngain Nazaret

(Mr. 6.1-6; Lc. 4.16-30)

53 Are Jesús joexin ndačo cain ejemplo jihi, jehe sacjoixin de nttiha.

54 Co sacjoi para Nazaret, tti jehe vanguixin. Nttiha coexinhi joinchecoenhe chojni de ixin Dios ngain ningoe na, co cain chojni nttiha vagoan na admirado co ndačo na:

—¿Quexén coanguixin xí jihi? Ixin anto nohe xa jai. ¿Quexén nchao nchehe xa cain milagro jihi?

55 Ixin xí jihi xitsihi tti carpintero co janné xa María, co xanchó xa Jacobo, co José, co Simón, co Judas.

56 Co cai xanchó xa xannčí nttihi te xan ngain rajná na jihi. ¿Quexén coanguixin xa cain tti nohe xa yá?

57 Mexinxin jehe na čhoha na joinchehe na caso tti ndačo Jesús. Pero Jesús ndačo ngain na:

—Cain chojni nchesayehe na ná profeta pero nahi profeta que ttixin de ngain xajeho rajné na o profeta que ttixin de ngain xajeho nindoha na.

⁵⁸ Co tsjeha milagro joinchehe Jesús nttiha ixin chojni nttiha vitticaonha na Jesús.

14

*Quexén ndavenhe Juan, tti vancheguitte chojni
(Mr. 6.14-29; Lc. 9.7-9)*

¹ Ngain tiempo mé Herodes, tti vehe gobernador nttiha Galilea, jehe cai conohe tti vanchehe Jesús.

² Co jehe mé ndačo ngain chojni:

—Jehe xí yá, mé Juan, tti vancheguitte chojni, que xechon. Mexinxin chondaxin joachaxin de nchehe milagro yá.

³ Ixin Herodes tti coetonhe xisoldadoe para tse xa Juan co coia xa co joiquixinhí xa ngain cárcel. Herodes joinchehe jañá ixin causexin ná nchí que vinhi Herodías tti cjoí nchíchihi ná xichó jehe Herodes que vinhi Felipe.

⁴ Juan vandačo ngain Herodes:

—Jianha ixin rricoho nchí yá.

⁵ Herodes desde are mé joinao narrogoenxon Juan, pero vañaoncoa ngain chojni ixin cainxin na vaguitticaon na que Juan vanichja joajné Dios que jehe vagayé.

⁶ Pero are quié Herodes, ná nchichjehe jehe Herodías joí ncha co tte ncha són ngattoxon con cain chojni que te ngain Herodes rato mé. Co Herodes antó joincheřoxinhí quexén tte xannchí mé,

⁷ hasta que joinchejurá Herodes que jehe sanjo ngain xan quexeho ná cosa que jehe xan sanchia xan ngain jehe.

⁸ Co jehe xan ocoá xan consejo de ngain janné xan, mexinxin ndačo xan ngain Herodes:

—Chjana ngá na láto já Juan, tti ncheguitte chojni.

⁹ Co rey Herodes are coinhi jihi, jehe anto vechín, pero ixin jehe ondačo que seguro sanjo quexehó cosa que jehe xannchí mé sanchia xan, co ixin coinhi cain chojni que tate ngain Herodes rato mé, mexinxin jehe coetonha que sayé xannchí mé tti jehe xan joanchia xan.

¹⁰ Herodes coetonha para joicončhinjihi na já Juan ngain cárcel.

¹¹ Cottimeja joiaho na já Juan ngá ná láto, joanjo na ngain xannchí mé, co jehe xan joanjo xan ngain janné xan.

¹² Cottimeja vinttequí chojni que vacao Juan para sajoicao na cuerpoe Juan co joicjavá na. Cottimeja cjoí na para joinchenohe na Jesús.

*Are Jesús joanjo joine naho mil xí
(Mr. 6.30-44; Lc. 9.10-17; Jn. 6.1-14)*

¹³ Are Jesus conohe yá, jehe coani ná barco co sacjoi jehó ngain ná lugar tti xonhi chojni te. Pero chojni vicon na para ttinó sacjoi, co tsje chojni de ngain rajna nttiha rroé na conixin rotté na.

¹⁴ Mexinxin are Jesús joiji nttiha co vačhjexin de barco mé, vicon anto tsje chojni sinchonhe nttiha, co jehe coiaconoehé na co joinchexingamehe cain chojni nihi que joicao na.

¹⁵ Co ixin ocoexinhi conaxin xehe, chojni que vacao Jesús conchienenhe na co ndačo na ngain jehe:

—Otsocjin co xonhi nchia jí ngain lugar jiji. Ndache cain chojni que onchao, para que jehe na sasinttecji na ngain rajna para siquehna na tti sine na.

¹⁶ Jesús ndačo:

—Chondaha na que sasinttecji na; danjo ra jaha ra tti sine na.

¹⁷ Jehe na ndačo na:

—Janha na nttihi xonhi chonda na, jehonaho niottja co yó copescado.

¹⁸ Jesús ndačo:

—Sicohna ra cain yá nttihi.

¹⁹ Cottimeja jehe coetonhe cainxin chojni para tavintte na ngataha ca ngataha nontte. Cottimeja jehe coá tti naho niottja ngá rá co tti yó copescado co tsjehe para ngajni, joanjo gracias ngain Dios co váña niottja mé co joanjo nio ngain chojni que jehe vacao para que jehe na conchjea na nio ngain cainxin chojni mé.

²⁰ Cainxin chojni mé joine na, co cojehe na jian, co después xa joinchecaon na tteyó nntaxa de pedazo que xexin joine na.

²¹ Tti chojni que joine niottja mé cjoí inchin naho mil xí, aparte nchí co icha xannchinnchinchjan.

Jesús cjoixin rotté ngataonhe jinda

(Mr. 6.45-52; Jn. 6.16-21)

²² Cottimeja Jesús coetonhe tti chojni que vacao para coani na barco co satto na toenxin jinda mé icha saho que jehe ixin jehe xa vittohe nttiha ixin jidoan despedido de ngain cain chojni mé.

²³ Co después de goan despedido de ngain cain chojni mé, jehonaho coani ná jnanchjan para

joinchecoanxinhi Dios. Co are ondaconttie Jesús nttiha taji jecho.

²⁴ Co barco que sajoicao tti chojni que vacao ojoiji barco ngosine jinda mé. Co olé nda coexinhi cjoinhi nganito barco mé ixin čhintto anto soji joixin čhintto de tti satettji na.

²⁵ Co are ochiaon vingasán Jesús conchienne ngain na jittjixin rotté ngataonhe jinda.

²⁶ Co are tti chojni que vacao vicon na que jehe jittjixin rotté ngataonhe jinda, jehe na vintteħaon na, co de joaħaon jehe na vinttecoyao na sén co ndaħo na:

—¡Yá ná nttanchanha!

²⁷ Pero Jesús nichjé na co ndaħo ngain na:

—¡ħaonha ra, ixin janha joihi!

²⁸ Cottimeja Pedro nichja ngain co ndaħo:

—Si ndoa soixin, ttetonna tsjixin rotnena ngataonhe jinda hasta tti ttjen soixin.

²⁹ Co Jesús ndaħo ngain:

—ħacoi remé.

Cottimeja Pedro vanianxin de barco mé co coexinhi cjoixin rotté ngataonhe jinda para sarrocji ngain tti jí Jesús.

³⁰ Pero are jehe conohe ixin anto soji čhintto, jehe ħaon co ixin jehe coexinhi ndaxincanjingui jinda, jehe ndaħo sén:

—¡Tančhjandaha na rroxincanjingui na jinda!

³¹ Ngain rato mé Jesús tsehe rá co ndaħo ngain:

—¡Jaha tantoha ditticaon! ¿Quedonda joidoho joaħaon?

³² Co are cayoi jehe na coani na barco mé, otavehe chintto.

³³ Cottimeja nidiguittohe ngaxinhi barco mé vinttetoxin nttajochjihi na ngain Jesús, co vinttendačo na:

—Ján ndoa, soixin Xenhe Dios.

Jesús joinchexingamehe tsje chojni nihi ngain nonttehe Genesaret
(Mr. 6.53-56)

³⁴ Coattoa na jinda mé, co joihi na ngain nonttehe Genesaret.

³⁵ Are chojni de ngain lugar mé joatsoan na que jehe Jesús, jehe na joinchenohe na chojni de ngoixin región mé, co joiaho na cain chojni nihi ngain Jesús.

³⁶ Co vanchetsenhe na ñao Jesús ixin sanjo joachaxin ngain cain tti nihi mé de rrocatte na masqui jehó rioho ngandehé lonttoe, co cainxin chojni que catte lonttoe Jesús, xingamehe na de ixin tti chin que vinttechonda na.

15

Tti nchejianha chojni
(Mr. 7.1-23)

¹ Cottimeja vintteconchiehe ngain Jesús canxion xifariseo co canxion ximaestroé ley Israel que vinttequixin xa de ngain ciudad de Jerusalén, co joanchiangui xa ngain Jesús co ndačo xa:

² —¿Quedonda chojni que čhjiho ncheha na tti costumbre que coetonha nigoelitona xančhjen? Ixin jehe na tonttiha na jinda rá na tsje nttiha saho que sine na.

³ Pero Jesús joanchiangui ngain xa co ndačo:

—¿Quedonda jaha ra ncheha ra tti ttetonha Dios co jeho nchehe ra inchin costumbre que jaha ra chonda ra?

⁴ Ixin Dios coetonha: “Ttjiho ra respeto ngain ndodá ra co ngain janná ra”, co “Tti rronichja jianha de ixin ndodé o janné, chojni mé jiquin-ixin nasenxon.”

⁵ Pero jaha ra ndačo ra que ná chojni nchao rrondate ndodé o janné: “Janha čoha tsjenguijna soixin ixin cain cosa que janha chonda, ojoanjo ngain Dios.”

⁶ Co jaha ra ndačo ra que quexeho chojni que rrondate jañá, irrochondaha na que tsjenguijna na ndodé na o janné na. Jañá jaha ra incheha ra caso tti coetonha Dios co nchehe ra inchin costumbre que jaha ra chonda ra.

⁷ ¡Jaha ra ncheha ra tti ndačo ra! Jian dindačo profeta Isaías de ixin jaha ra, are jehe dicjin:

⁸ Chojni tehe nchesayana na de ngain rroha na, pero de ngain ansén na řa icjin te na para sino na na janha.

⁹ Mexinxin řonhi řé masqui tenchecoanxinna na; ixin tti jehe na tenchecoenhe na chojni joxon tti ttetonha xí nttihi ngataha nontte.

¹⁰ Cottimeja Jesús vayé cainxin chojni que vintte nttiha co ndačo ngain na:

—Ttinhí ra tti rrondate ra co ttinxin ra jian:

¹¹ Jeha tti jine co tti dihi chojni nchejianha na, sino que cain palabra jianha que dačhjexin de rroha na, mé tti nchejianha na.

¹² Cottimeja tti chojni que vacao Jesús conchienhe na ngain co ndačo na:

—¿Anoaha soixin ixin xifariseo yá feo vintteconhe xa are vinttequinhi xa tti soixin ndačo?

¹³ Pero Jesús ndačo ngain na:

—Quexeho nttattochjoin que Ndodana que ttjen ngajni cjoengaha, nttá mé chonda que sačhjenguinoa nnta.

¹⁴ Tančhjanda ra xa ncheha ra xa caso ixin jehe xa inchin tti diconha que dicao iná tti diconha. Co jañá si ná tti diconha sicao iná tti diconha, cayoi chojni mé sinttjia na ngain ná ttoe.

¹⁵ Cottimeja Pedro ndačo ngain Jesús:

—Ndachjenji na quehe rročo ejemplo yá.

¹⁶ Jesús ndačo:

—¿Acai jaha ra ttinxinha ra?

¹⁷ ¿Attinxinha ra que cain tti jine ni sattji para ngaxinhi tsehe ni, cottimeja dačhjexin de ngain cuerpoe ni?

¹⁸ Pero tti palabra que dačhjexin de ngain rroha ni ttixin de ngain ansén ni, co palabra mé tti nchejianha ni.

¹⁹ Ixin de ngain ansén chojni ttixin cain cosa jianha que jehe na řaxaon na, co jehe na řaxaon na para santsjehe na vidé iná chojni, co jehe na dinttejoacaho na iná nčhí que jeha nčhichihi na, jehe na tté na cosé iná chojni, jehe na nichja na ndoaha de ná cosa, co jehe na ncheřoxinhi na nichja na cuentoe iná chojni que jeha ndoa.

²⁰ Cain cosa yá tti nchejianha chojni, pero tti tonttiha na jinda tsje nntiha saho que sine na, jeha mé tti nchejianha na.

*Ná nčhí de iná nacion que vitticaon nčha Jesús
(Mr. 7.24-30)*

²¹ Jesús vachjexin de nttiha co sacjoi para re-gioen ciudad de Tiro co Sidón.

²² Co ná nchí que joixin de ngain nacioen Canaán tiempo mé vehe ncha ngain región mé, co joí ncha ngain Jesús co ndacho ncha sén:

—¡Soixin tti razé David, nttatsanha ñao ttiaconoana na! Ná xanhna xannchí chonda xan ná espíritu jianha co anto tangui tonhe xan.

²³ Pero Jesús joincheha caso nchí mé. Cottimeja tti chojni que vacao joí na ngain co joinchetsenhe na ñao Jesús co ndacho na:

—Ndache nchí jiha satsji ncha ixin atto sén jinichja ncha jirroá na ncha.

²⁴ Cottimeja ndacho Jesús ngain ncha:

—Dios rroanha na janha pero jeha para ngain chojni de nacioen Israel que ndadiguitján inchin coleco.

²⁵ Pero nchí mé conchienenhe ncha co vettoxin nttajochjihi ncha ngain Jesús co ndacho ncha:

—¡Nttatsanha ñao ttjenguijna na soixin!

²⁶ Jesús ndacho ngain nchí mé:

—Nchaoha jí si ná chojni santsjehe xenhe niot-tja para rrochjé conia nio.

²⁷ Pero jehe nchí mé ndacho ncha:

—Ján ndoa, pero hasta conia nchao jine va tti nchoe niottja que dinttjixin de ngataha mesé nindo-ha va.

²⁸ Cottimeja Jesús ndacho ngain nchí mé:

—¡Jaha anto jian ditticaon! Tsonhe inchin jaha rinao.

Co ngain rato mé xenhe tti nchí mé ndaxingamehe xan.

Are Jesús joinchexingameje tsje chojni nihi

²⁹ Jesús sacjoixin de nttiha co vatto ngandehelago de Galilea, cottimeja coani ngataha ná jna co tavehe nttiha.

³⁰ Tsje chojni joí ngain Jesús tti jehe tají, co joiaho na ngain Jesús tsje chojni nihi; tti rrengo, tti chejo, tti ttao, tti chonda rá que xonhi xé ra, co icha ninihi. Cain chojni mé coín na ngandaxinhi Jesús, co jehe joinchexingamehe cainxin na.

³¹ Co cainxin chojni que te nttiha goan na admirado are jehe na vicon na que tti chojni ttao onchao nichja, co tti vaquín rá ondaxingamehe, co tti rrengo onchao sacjoixin rotté, co tti chejo onchao vicon. Co cainxin chojni mé coexinhi na joinchecoanxinhi na Dios de chojni Israel.

*Are Jesús joanjo joine nó mil xí
(Mr. 8.1-10)*

³² Cottimeja Jesús vayé tti chojni que vacao co ndačo ngain na:

—Janha ttiaconoá cain chojni tehe ixin ochonda ní nchanho que te na nttihi nganji na, co xonhi chonda na para sine na. Janha rinaoha rrorroanha na para nchiandoha na si sineha na ixin puede ndatsonchjenxin na jinta ngatja nttiha.

³³ Cottimeja tti chojni que vacao Jesús ndačo na ngain:

—Pero ¿quexén sonttó na tti sine na jehe na? Ixin anto tsje na, co nttihi ngain lugar jihí xonhi nchia jí.

³⁴ Jesús joanchiangui ngain jehe tti chojni que vacao co ndačo:

—¿Quejanhi niottja chonda ra?

Co jehe na ndačo na:

—Yáto niottja co nchion copescadochjan.

³⁵ Cottimeja Jesús coetonhe cain chojni mé que tasintte na ngataha nontte.

³⁶ Co jehe coá tti yáto niottja mé co copescado co joanjo gracias ngain Dios. Cottimeja váña nio co copescado co joanjo ngain tti chojni que vacao, co jehe na conchjea na nio conixin copescado ngain cainxin chojni mé.

³⁷ Cainxin na joine na co cojehe na jian. Cottimeja xa joinchecaon na yáto nntaxa de tti xexin joine na.

³⁸ Cain chojni que joine mé cjoí nó mil xí co icha nchí co chjan.

³⁹ Cottimeja Jesús goan despedido de ngain cainxin chojni mé, co joixinhi barco co sacjoi para regioen Magdala.

16

Xifariseo co xisaduceo joanchia xa ixin Jesús rrojinchehe ná milagro

(Mr. 8.11-13; Lc. 12.54-56)

¹ Xifariseo co xisaduceo cjoí xa vintteguitsjehe xa Jesús, co para que rroguicon xa que Jesús rrojinchehe ná cosa nchaoha, jehe xa ndačo xa ngain que jehe rrojinchehe ná señal de milagro que rroquixin de ngajni.

² Pero Jesús ndačo ngain xa:

—Are totsocjin jaha ra ndačo ra: “Anto čhjoin tsí nchanho ndoe ixin ngajni jatse.”

³ Co are ndoyo ndačo ra: “Jai čhjoinha sehe nchanho ixin jatse ngajni co jiá ttjoi.” ¡Jaha ra ncheha ra tti ndačo ra! Jaha ra noha ra datsoenhe ra quexen sehe tiempo are tsjehe ra ngajni,

pero noaha ra datsoenhe ra quehe rroĉho señał de ngain tiempo jġhi.

⁴ Jaha ra chojni jianha de ngain tiempo jġhi que ditticaonha ra co tedanchia ra ná señał de milagro. Pero ųonhi icha señał sayehe ra que jeho inchin señał que conhe Jonás.

Jańá ĉho Jesús ngain xa, co cointtohe xa nttiha co jehe sacjoi.

Tti levaduré xifariseo

(Mr. 8.14-21)

⁵ Are tti chojni que vacao Jesús vatto na toenxin lago mé, jehe na tjańehe na de joicao na niottja para rrojine na.

⁶ Cottimeja Jesús ndaĉho ngain na:

—Tsġenxin ra, ttġiġho ra cuidado de ixin levaduré xifariseo co levaduré xisaduceo.

⁷ Co tti chojni que vacao Jesús coexinhi na ndache chó na:

—Jańá ndattjo na na ixin ján na joicoġha na niottja para sontte na.

⁸ Jesús conohe quehe tetjao na co jehe ndaĉho ngain na:

—¿Quedonda ndaĉho ra ixin chondaha ra niottja? ¡Jaha ra seguro que tantoġha ditticaon ni ra!

⁹ ¿Aĳa ttinxinha ra, ni ųaxaonha ra de tti naho niottja que janha conġhġeyá tti naho mil xí, co ixin tsġe nttaxa joinchecaon ra de tti niottja que xexin joine na?

¹⁰ ¿Ani ųaxaonha ra de tti yáto niottja que conġhġeyá tti nó mil xí, co ixin tsġe nttaxa joinchecaon ra de tti niottja que xexin joine na?

¹¹ ¿Queĳén ųaxaonxin ra que janha rrindaĉġhan de ixin tti sintte ra are ndaĉġhan ixin tsġiġho ra

cuidado de ixin levaduré xifariseo, co levaduré xisaduceo?

¹² Cottimeja jehe na coinxin na que Jesús jeha jindache na ixin sicao na cuidado de ixin levaduré niottja, sino que tti tenchecoenhe xifariseo icha chojni co tti tenchecoenhe xisaduceo icha chojni.

Pedro ndaĉho que Jesús, mé tti Cristo

(Mr. 8.27-30; Lc. 9.18-21)

¹³ Are Jesús joiĵi ngain regioen Cesarea de Filipo, jehe joanchiangui ngain tti chojni que vacao co ndaĉho:

—¿Quehe ndaĉho chojni ixin quensen na janha, tti Xí que joixin de ngajni?

¹⁴ Jehe na ndaĉho na:

—Canxion chojni ndaĉho na que jaha Juan tti vancheguite chojni, icanxin na ndaĉho na que jaha Elías, co icanxin na ndaĉho na que jaha Jeremías o iná profeta.

¹⁵ Cottimeja ndaĉho Jesús ngain tti chojni que vacao:

—Co jaha ra, ¿quehe ndaĉho ra ixin quensen na janha?

¹⁶ Cottimeja ndaĉho Simón Pedro:

—Soixin tti Cristo, tti Xenhe Dios que jichon.

¹⁷ Jesús ndaĉho ngain Pedro:

—Anto ĉhjoin para ixin jaha, Pedro, tti xenhe Jonás, ixin ni ná chojni ndattjoha yá, sino que Nnodana que ttjen ngajni tti ndattjo yá.

¹⁸ Co janha rrindattjo que jaha dinhi Pedro, co nombre jihi rroĉho ŋo. Co ngataha ŋo jihi sint-tachjian ningona; co ni joachaxín infierno tsixinha ngain nihngo jihi.

¹⁹ Janha rrochjaha jaha cain joachaxin de tsinxin quehe rinao Dios nttiha ngajni; inchin janha rrochjaha jaha llave de ngajni. Co tti jaha tsiatte nttihi ngataha nontte, Dios ocoiatte nttiha ngajni; co tti tsonxindanguehe jaha nttihi ngataha nontte, Dios oconxindanguehe mé nttiha ngajni.

²⁰ Cottimeja Jesús coetonhe jehe tti chojni que vacao que xonhi chojni rrondate na ixin jehe tti Cristo.

*Jesús ndačo ixin jehe ndasenhe
(Mr. 8.31—9.1; Lc. 9.22-27)*

²¹ Desde are mé Jesús coexinhi ndache jehe tti chojni que vacao que ixin jehe chonda que tsji para ciudad de Jerusalén co nttiha anto tangui tsonhe jehe ngain cain xittetonha ngain nihngo nttiha, co ngain cain xidána que vaquetonha ngain icha xidána, co ngain cain ximaestroe ley Israel. Co ndačo que cain xí mé nasoexon xa jehe, pero ngain nchanho ninxin jehe rroxechon.

²² Cottimeja jehe Pedro joantsjenda Jesús co coexinhi Pedro ndache Jesús:

—¡Nichjaha jamé ixin Dios sicao cuidado de ixin soixin que xonhi tiempo tsonha jhi!

²³ Pero Jesús ngaria co ndačo ngain Pedro:

—¡Sattjixin de nganji na, Satanás! ixin jaha rinao rrocayaconhna na janha. Jaha xaxaonha inchin xaxaon Dios, sino inchin xaxaon chojni que te ngataha nontte.

²⁴ Cottimeja Jesús ndačo ngain tti chojni que vacao:

—Si chonja de jaha ra rinao ra sacjin na, pero chonda ra que rrotjañaha ra cain tti chonda ra co

masqui anto tangui tsonha ra co hasta nasenxon ra.

²⁵ Ixin tti rinao que vidé xonhi tsonhe, mé sinchetján vidé; pero tti sinchetján vidé de ixin causananxin janha, mé sechon para cainxin tiempo.

²⁶ Ixin xonhi xé que ná chojni sachá cainxin que jí ngain mundo jishi co ndasinchetján almé, ¿o quejanhi tsenanxin chojni almé?

²⁷ Ixin janha, tti Xí que joixin de ngajni, sihi iná conixin gloria que rrochjana Ndodana conixin cain angelna, cottimeja cada chojni tsjengá na hna inchin jehe na joinchehe na.

²⁸ Co atto seguro rrindattjo ra, que ttoha ra xo te ra nganji na jaixon, xa senha ra hasta que siconja ni ra janha, tti Xí que joixin de ngajni, rrocjan na sihi conixin joachaxin para siquetonha cain cosa.

17

Are vicon na Jesús anto ojé (Mr. 9.2-13; Lc. 9.28-36)

¹ Vatto incjaon nchanho, cottimeja Jesús joicao Pedro co Jacobo co Juan, xanchó Jacobo, co Jesús cjoí conixin jehe na ngataha ná jna anto noi,

² co nntiha vicon na Jesús anto ojé. Ngá con Jesús anto conguixian inchin tté nchanho, co lonttoe anto coroa lontto hasta conguixima lontto.

³ Co ngain rato mé jehe na vicon na Moisés co Elías, tatetjao na Jesús nntiha.

⁴ Cottimeja Pedro ndačo ngain Jesús:

—Soixin, ¡Atto nchao ixin janha na te na nntihi!
Si rinao, janha na sinttachjian na ní nchiachjan:

ná nchiachjan para ixin soixin, ná nchiachjan para ixin Moisés, co iná nchiachjan para ixin Elías.

⁵ Pedro xa jinichja jañá are joí ná ttjoi anto roa hasta jitonguixima ttjoi, co ttjoi mé ndacjoanotaon na, co de ngacjan ttjoi mé coinhi na tté Dios que ndačo:

—Jihi tti Xanhna que janha anto rinaho, co de ixin jehe Xan janha anto chahna. Ditticaon ra tti rrondačo Xan.

⁶ Cottimeja tti canio chojni que joicao Jesús ntiha are coinhi na yá, canio na vinttettoxin na co visé na ngataha nontte, co anto xaon na.

⁷ Cottimeja Jesús conchienne ngain na, catte na co ndačo ngain na:

—Dingattjen ra, co xaonha ra.

⁸ Co are jehe na tsjehe na, ixonhi chojni vicon na, más que jeho Jesús.

⁹ Are tedania na de ngataha jna mé, Jesús cetonhe na co ndačo:

—Xonhi chojni ttequinhi ra tti jaha ra vicon ra, hasta que janha, tti Xí que joixin de ngajni, rroxechon na.

¹⁰ Cottimeja jehe tti canio chojni que joicao Jesús joanchiangui na ngain Jesús co ndačo na:

—¿Quedonda ndačo ximaestroey ley Israel ixin Elías chonda que tsí icha saho que jaha?

¹¹ Jesús ndačo ngain na:

—Ján ndoa que Elías tti tsí icha saho que janha co jehe tti siquentonxinhi vidé chojni para que nchao sayehna na janha.

¹² Pero janha rrindattjo ra que Elías ojoí co jehe na joatsoanha na, sino que joinchehe na ngain

inchin jehe na joinao na. Jamé janha cai, tti Xí que joixin de nganji, tangui tsonna de ngain rá jehe na.

¹³ Cottimeja jehe tti canio chojni que joicao Jesús xaxaon na que Jesús jindačo de ixin Juan, tti vancheguitte chojni.

Jesús joinchexingamehe ná xanxí que vechonda chin denda

(Mr. 9.14-29; Lc. 9.37-43)

¹⁴ Are joihi na ngain tti vittohe icha chojni que vacao Jesús, nntiha anto tsje chojni sinchonhe na Jesús. Are conchienne ná xí ngain Jesús co vettoxin nntajochjihi xa co ndačo xa:

¹⁵ —Nttatsanha ñao soixin, ttiaconoehe xanhna ixin chonda xan chin denda co anto tangui tonhe xan. Tsje nntiha detsingatte xan xohi o ngangui jinda.

¹⁶ Nntihi joiquina xan ngain chojni que čhiho tehe, pero čoha nchexingamehe na xan.

¹⁷ Jesús ndačo:

—¡Jaha ra chojni que ditticaonha ra co jianha ra! ¿Hasta quesá janha chonda que sarihi nganji ra? ¿Hasta quesá janha chonda que tsixinna nganji ra? Sicozna ra chjan yá nntihi.

¹⁸ Cottimeja Jesús joinchesattehe tti espíritu jianha que vechonda chjan mé, co venguixin espíritu mé de ngaxinhi cuerpoe xan. Co desde ngain rato mé jehe xan ndaxingamehe xan.

¹⁹ Cottimeja are jehó Jesús nntiha conixin chojni que vacao, jehe na joanchiangui na ngain co ndačo na:

—¿Quedonda janha na čoha vehngui na espíritu jianha yá?

²⁰ Jesús ndačo ngain na:

—Ixín jaha ra antoha jian ditticaon ni ra janha. Co janha atto seguro rrindattjo ra que si tti ditticaon ra jiexin rrogehe inchin ná tsehe ca dinhi mostaza, nchao rrondache ra jna jiha: “Sattjixin de nttihi co sattji iná lugar”, co jna yá satsjixin jna de tti jí jna. xonhi cosa que čhoha sinchehe ra si ndoa ditticaon ra.

²¹ Pero clase de espíritu jianha yá jeho nchao dengui ni are nchecoanxinhi ni Dios co dintecjáño ni saho.

*Jesús ndačo iná ixín jehe ndasenhe
(Mr. 9.30-32; Lc. 9.43-45)*

²² Ná nchanho are xa vintte na ngain regioen Galilea, Jesús ndache tti chojni que vacao ixín chojni sinchechienhe na jehe, tti Xí que joixin de ngajni, para ngain chojni jianha.

²³ Co ixín nasoenxon na jehe Jesús, pero ngain nchanho ninxin jehe rroxechon iná. Co chojni que vacao anto vinttechín na are coinhi na yá.

Are Jesús cjoenga hna impuesto ngain nihngo

²⁴ Are Jesús conixin chojni que vacao joiji na ngain rajna Capernaum, tti xí que vanchehe cobro impuestoe nihngo cjoí xa ngain Pedro co joanchianguihi xa co ndačo xa:

—¿Attjenga hna ximaestrea ra impuesto para ixín nihngo?

²⁵ Pedro ndačo:

—Ján.

Cottimeja Pedro are cjoí ngaxinhi nchia para rrojindačo tti ndačo xicobrador, pero Jesús saho ndačo ngain jehe:

—Pedro, ¿quensen xaxaon jaha nchehe cobro impuesto xittetonha ngataha nontte nttihi? ¿Achojni de ngain nacioen xa o ni chojni que ttixin cjin?

²⁶ Pedro ndačo:

—Tti chojni que ttixin cjin.

Jesús ndačo:

—Mexinxin chojni xa chondaha na que tsjenga na hna.

²⁷ Pero para que xonhi chojni sonttoñao na, tti jaha ngain lago, dancanguihi anzuelo co dantsjengui tti saho copescado que rrotse anzuelo. Co ngaxinhi rroha copescado mé sinchí ná tomi. Tomi mé sittja para tsjengaxin na hna impuestona janha co impuestoa jaha. Ttjiho tomi mé co ttjenga hna cain.

18

¿Quensen tti icha importante?

(Mr. 9.33-37; Lc. 9.46-48)

¹ Ngain rato mé chojni que vacao Jesús conchienne na ngain Jesús co ndačo na:

—¿Quensen icha importante ngajni?

² Cottimeja Jesús vayé ná xannchinchjan co coín xan ngayehe na,

³ co ndačo:

—Atto seguro rrindattjo ra que si jaha ra tsen-toxinha ra vidá ra co rrocjan ra inchin xannchinchjan, čoha rrochonda ra parte ngain tti ttetonha Dios.

⁴ Mexinxin quexeho chojni que jaha orgulloso co cjan inchin chjan jihi, chojni mé tti sehe icha importante nttiha ngajni.

⁵ Co tti chojni que sayé ná tti inchin xannch-inchjan jihi ixin ditticaon na janha, cai chojni mé sayehna na janha.

Tti sinchenchehe ni cosa jianha
(Mr. 9.42-48; Lc. 17.1-2)

⁶ 'Quexeho chojni que sincheyehe ná chojni mé que xa antoha jian ditticaon na janha, icha jian sechianito ná xočin ngain ttosin chojni mé para rroxincanjingui ndachaon.

⁷ Atto nchaoha ixin jí cosa ngataha nontte nttihi que tenchenchehe chojni tti jianha. Cosa mé cainxin tiempo sehe nttihi, pero janto tangui tsonhe tti chojni que sincheyehe iná chojni para sinchehe jamé!

⁸ 'Mexinxin si ná rá o ná rottea sinttařaxaon para sinchehe jianha, ncheha cosa mé, masqui hasta tončhinji rá o rottea co tja cjin, ixin icha jian rrochonda vida naroaxin masqui coha ná rá o ná rottea, co nahi tsji conixin yoixin rá o yoixin rottea ngain infierno tti xonhi tiempo danga xohi.

⁹ Co si jmacon sinttařaxaon para sinchehe jianha, ncheha cosa mé, masqui hasta dantsjengui jmacon co tja cjin, ixin icha jian rrochonda vida naroaxin masqui nacoa jmacon, co nahi tsji conixin cayoxin jmacon ngain infierno tti xonhi tiempo danga xohi.

Ejemploe tti coleco diguitján
(Lc. 15.3-7)

¹⁰ 'Xaxaonha ra ixin chojni que xa antoha jian ditticaon na janha jeha importante na. Ixin janha rrindattjo ra que ngajni cain ángel que tenda jehe

na, cainxin tiempo te ángel mé ngattoxon con Nnodana que ttjen ngajni.

¹¹ Ixin janha, tti Xí que joixin de ngajni, joihi para joicjenguijna tti chojni que otequininxin rrocji ngain infierno.

¹² 'Inchin si ná xí chonda xa cien coleco co ndasitján ná va, ¿quexén sinchehe xa? ¿Atsinttoeha xa tti noventa y nueve va ngagaha jna, co satsji xa sicjé xa coleco vitján?

¹³ Co si sittja xa va, seguro que icha rroché xa ngain coleco mé que ngain tti noventa y nueve coleco que vitjanha.

¹⁴ Jamé cai Nnodá na que ttjen ngajni rinaoha Ndo que sitján ni ná chojni que xa antoha jian ditticaon na janha.

Quexén sinchetjañehe ni chojni que ditticaon Jesús

(Lc. 17.3)

¹⁵ 'Si ná chojni que ditticaon na janha sinchehe ná cosa nchaoha nganji jaha, nichjehe jaho co jehe co ndache ixin jehe nchaoha joinchehe. Si jehe sinchehe caso tti jaha rrondache, nchao, ixin jaha ocjoenguijna jehe para que jehe rrochonda parte ngain tti ttetonha Dios.

¹⁶ Pero si sincheha caso tti jaha rrondache, cottimeja ttjé ná o yó chojni para ttjiho dinichjehe ra jehe que tti joinchehe nchaoha jí, co jehe cayoi chojni mé sintte na de testigo de quehe rrondache chó ra.

¹⁷ Co si jehe xa sincheha caso masqui cjoiho cayoi chojni mé, cottimeja jaha dindache cain chojni ngain nihngo. Co si chojni mé xa sincheha caso

tti rrondačo cain chojni ngain nihngo, cottimeja cain ra dantsjenda ra chojni mé inchin tti chojni que ditticaonha Dios o inchin ná chojni jianha.

¹⁸ Janha rrindattjo ra seguro que cain tti tsia ra nttihi ngataha nontte, Dios ocoia cosa mé nttiha ngajni. Co cain tti jaha ra tsonxindanguehe ra nttihi ngataha nontte, Dios oconxindanguehe cosa mé nttiha ngajni.

¹⁹ Cai rrindattjo ra que si yó de jaha ra sintte ra de acuerdo nttihi ngataha nontte de sanchia ra čhonja are tenchecoanxinhi ra Nodana que ttjen ngajni, seguro que jehe Ndo rrochjá ra Ndo.

²⁰ Ixin tti te yó o ní chojni que tenichja na conixin nombrena janha, janha nttiha rrihi ngayehe na.

²¹ Cottimeja Pedro cjoí joanchianguihi Jesús co ndačo:

—¿Quejanhi nttiha chonda janha que sinttatjañá ná tti sinchehe jianha nganji na janha? ¿Achonda que sinttatjañá hasta yáto nttiha?

²² Jesús ndačo ngain Pedro:

—Janha rrindattjoha que hasta yáto nttiha, sino que hasta yáto de tti setenta nttiha.

Ejemploe ná tti nchehe xa que čhoha joinchet-jañehe ná xicompañeroe

²³ Mexinxin rrondattjo ra quežén tti ttetonha Nodana que ttjen ngajni. Mé inchin ná rey que joinchechjienhe cuenté cain ninchehe žé ixin quejanhi teca na cada na.

²⁴ Jehe mero coexinhi jinchechjian cuenta mé are joiaho na ngain rey mé ná tti nchehe ža que jica tsje millones.

25 Pero ixin tti nchehe xa mé chondaha quehe tsjengaxin hna, mexinxin coetonha rey mé que rrojinchecji na tti nchehe xa mé ngain iná xinajni conixin čhihi co xenhe co cain cosa que jehe vechonda para rroxengaxin hna tti jehe jica ngain rey.

26 Cottimeja jehe tti nchehe xa mé vettoxin ntajochjihi ngain rey co ndačo: “Nttatsanha ñao chonna na nchion co tsengaha hna cainxin tti rricaha.”

27 Rey coiaconoehe tti nchehe xa mé co joinchetjañehe cain tomi que veca co coančjanda sacjoi.

28 Pero are jehe tti nchehe xa mé vačhje para sacjoi, nttiha vetanxin iná tti nchehe xa, xicompañeroe. Co jehe mé veca nchion tomi ngain tti sajittji. Co jehe tti sajittji mé tse co tsenguihi ttosin xicompañeroe co coejehe tté xa, co ndache chó: “¡Ttjengana hna tti rricana na!”

29 Cottimeja jehe tti veca vettoxin nttajochjihi co ndačo: “Nttatsanha ñao chonna na, co tsjengaha hna cain tti rricaha.”

30 Pero tti sajittji čchoha, sino que sajoicao coiax-inhi ngain cárcel hasta que rrocjengaja hna tti jica.

31 Co are icha ninchehe xa vicon na jihi, anto vinttechín na co cjoí na joindačo na cain jihi ngain xinajní na, jehe tti rey mé.

32 Cottimeja jehe rey mé rroanha joajna para joiçacoa tti cjoaya, co ndačo ngain: “¡Jaha ná ninchehe xa anto jianha! Janha jointtatjañaha jaha cain tti joaricana na ixin joinchetsena ñahona.

33 Jaha cai rrochonda que rroquiaconoehe xicompañeroa, jañá inchin janha coiaconoaha jaha.”

³⁴ Co jehe rey mé anto coñao co coetonha para que sayé castigo jehe tti nchehe xa mé hasta que tsjengaja hna cain tti jica.

³⁵ Co are ojoexin ndačo Jesús cain yá jehe ndačo:

—Cai jañá sinchehe Ndodana que ttjen ngajni nganji ra, si jaha ra sinchetjañeha ra icha chojni tti nchaoha que sinchehe na nganji ra.

19

*Jesús ndačo de ixin xí que dachjendehe čhihi
(Mr. 10.1-12; Lc. 16.18)*

¹ Después que Jesús ndačo cain cosa yá, jehe sacjoixn de Galilea co joiji ngain tti parte de region Judea que jí lado čhinxin nchanho de río Jordán.

² Anto tsje chojni rroé na Jesús, co nttiha jehe joinchexingamehe tsje chojni nihi.

³ Cottimeja canxion xifariseo vintteconchienne xa ngain Jesús para rrojinchenichja xa Jesús ná cosa nchaoha para que nchao rrocjanguihi xa. Joanchiangui xa ngain jehe co ndačo xa:

—¿Anchao ná ni sachjendehe ni čhihi ni de ixin quexeho cosa que jehe ni isincheřoxinha ni?

⁴ Jesús ndačo ngain xa:

—¿Atsjeha ra tti jitaxin Palabré Dios? Nttiha jitaxin ixin Dios tti joinchekhjian chojni are saho. Co jehe mé joinchekhjian xí co nčí.

⁵ Cai jitaxin nttiha: “Mexinxin xí sachjendehe xa ndodé xa co janné xa para secaho xa jeho čhihi xa, co cayoixin na sintte na inchin nacoaxinxon chojni.”

⁶ Co jañá ijeha yó chojni, sino que nacoaxinxon chojni. Mexinxin xí čhoha sačhjendehe xa čhihi xa ixin Dios joinchechjian cayoi jehe na nacoa chojni.

⁷ Cottimeja vinttendačo jehe xa:

—¿Quedonda diquetonha Moisés que nchao sanjo ni ngain ncha ná xón que jitaxin que jehe ni on-davačhjendehe ni čhihi ni, co jamé ondatsinttohe ni ncha?

⁸ Jesús ndačo:

—Moisés ndačo jañá ixin jaha ra atto cha ansean ra, mexinxin jehe joanjo joachaxin yá de sačhjendehe ra nchičhiha ra, pero are icha saho jeha jañá coetonhe Dios.

⁹ Co janha rrindattjo ra, que tti dačhjendehe nchičihi (co jeha de ixin vittjaxin ncha tajijoa-aho ncha iná xí), co jehe decaho iná nchi, jehe nchehe jianha xajeho como si rrochonda yó nchi. Co tti decaho ná nchi que digáčhjendehe xixihi, cai chojni mé jianha nchehe, xajeho inchin rrochonda nchičihi iná xí.

¹⁰ Cottimeja chojni que vacao Jesús ndačo na ngain:

—Si jañá jí remé de ixin xí co nchi, icha jian sinttecaoha chó ni.

¹¹ Jesús ndačo ngain na:

—Pero jeha cain chojni nchao sintte na jeha na, sino que jeha tti chojni que Dios ndačo para que sintte na jeha na.

¹² Jí tsje razón para que xí dinttecaoha xa nchi. Te xí deporsín desde are toncjihí xa cuerpoe xa rinaoha nchi, co icanxin xí čhoha sinttecao xa nchi ixin chojni joinchexoenhe xa ngain tti parte jima

de cain xí, co icanxin xí rinaoha xa dinttecao xa nchí ixin icha rinao xa nchehe xa inchin ttetonha Dios que ttjen ngajni. Co xo rinaoha ra sinttecoho ra nchí ixin sinchehe ra inchin ttetonha Dios, nchao nchehe ra.

Jesús joinchenaon xannchinnchinchjan
(Mr. 10.13-16; Lc. 18.15-17)

¹³ Cottimeja joiaohé na Jesús canxion xannchinnchinchjan para que Jesús rroquín rá ngataha já xan co sinchetsenhe ñao Dios ixin sinchenaon xan. Pero chojni que vacao Jesús coexinhi na joinchesattehe na cain tti chojni que joicao cain chjan mé.

¹⁴ Pero Jesús ndacho ngain chojni que vacao:

—Tančhanda ra que xannchinnchinchjan tsí xan nganji na janha, cayacoenha ra xan ixin ngajni tti ttetonha Ndodana, nttiha para cain chojni inchin jehe xan.

¹⁵ Co Jesús coín rá ngataha cain xannchinnchinchjan mé co joinchetsenhe ñao Dios ixin sinchenaon xan, cottimeja Jesús sacjoixin de nttiha.

Ná xanxí anto rico cjoao xan Jesús
(Mr. 10.17-31; Lc. 18.18-30)

¹⁶ Ná xanxí cjoí xan joitsjehe xan Jesús, co joanchiangui xan co ndacho xan:

—Maestro, soixin que anto jian, ¿quehe icha cosa jian chonda janha que sinttaha para que janha rrochonda iná vida naroaxin que xonhi tiempo tsjexin?

¹⁷ Jesús ndacho ngain xanxí mé:

—¿Quedonda ncheguinhí na janha jian? xonhi iná tti icha jian, jehó nacoaxinxon, co mé jehe

Dios. Pero si jaha rinao rrochonda iná vida naroaxin, ditticaon co nchehe cain tti coetonha Dios.

¹⁸ Xanxí mé ndačo xan:

—¿Quecá?

Co Jesús ndačo ngain xan:

—Dantsjeha vidé iná chojni; xonhi nchí ncheyehe; xonhi cosé iná chojni ttehe; ndačoha cosa ndoaha de iná chojni;

¹⁹ ttjiho respeto ngain ndodá co ngain janná; co rinao cain chojni inchin rinao cuerpoa.

²⁰ Xanxí mé ndačo xan ngain Jesús:

—Cain yá rrinttaha desde are xa nchín na, ¿quehe xa ditján sinttaha?

²¹ Jesús ndačo ngain xan:

—Si jaha rinao sarihi chojni jian ndoa, ttji co nchecji cainxin tti chonda co tonchjeyehe chojni noa tomi, cottimeja ngajni jaha rrochonda cosa icha rentte, cottimeja sihi para sacjin na tti sacji janha.

²² Pero are xanxí mé coinhi xan yá, anto vechín xan co sacjoi xan ixin anto rico vehe xan.

²³ Cottimeja Jesús ndačo ngain chojni que vacao:

—Atto seguro rrindattjo ra que atto tangui para que chojni rico rrochonda na parte ngain tti tte-tonha Ndodana que ttjen ngajni.

²⁴ Icha tanguiha para ná cocamello sattoxinhi va ttoechjenhe ná nttachiehe manta que para chojni rico rrochonda na parte ngain tti ttetonha Dios.

²⁵ Are chojni que vacao Jesús coinhi na yá, anto vinttegoan na admirado co joanchianguihi chó na co ndačo na:

—¿Mexinxin quensen nchao rrochonda iná vida naroaxin remé?

²⁶ Jesús tavetsjehe ngain na co ndačo:

—Chojni nttihi čhoha sinchehe na jamé, pero Dios nchao sinchehe cainxin.

²⁷ Cottimeja Pedro ndačo ngain Jesús:

—Janha na cointtoa na cain tti joichonda na, para que jai nchao čhjin na nganji soixin. Mexinxin, ¿quehe rrochonda na janha na?

²⁸ Jesús ndačo ngain na:

—Atto seguro tti rrindattjo ra, que ngain tti tiempo que tsí, are cainxin rrocjan naroaxin, are mé janha, tti Xí que joixin de ngajni, sarihi ngain tti lugar que chonda gloria, co jaha ra que čhjin na jai cai sintte ra ngain tteyó lugar de joachaxin para que sinchejuzguehe ra tti tteyó grupoe chojni Israel.

²⁹ Co cain chojni que ttinttohe na nchiandoha na, o xanchó na, o ndodé na, o janné na, o čhihi na, o xenhe na, o jnguihi na para tenchehe na žana janha, chojni mé sayé na cien nttiha icha tsje co cai sayé na iná vida naroaxin que žonhi tiempo tsjexin.

³⁰ Pero tsje chojni que jai žaxaon na ixin jehe na anto importante na, pero are mé, žonhi rentte na. Co tsje chojni que jai žaxaon na ixin jehe na jeha importante na, pero are mé jehe na nisintte icha importante.

20

Ejemploe ninchehe ža

¹ Cai ndačo Jesús:

—Tti ttetonha Dios ngajni, mé inchin joinchehe ná xí que vechonda jie jngui. Xí mé vačhje xa ndoyo para joicjé xa ninchehe řa para sinchehe na řa ngain nttauva.

² Jehe xí mé ndačo xa ngain na que tsjenguehe xa na hna tti jiquininxin dacha ni ngoi ná nchanho, co jehe na vittoexin na. Mexinxin jehe xa rroanha xa na para ngain jnguihi xa joinchehe na řa.

³ Cottimeja jehe xa vačhje xa iná řa jidacao inchin las nueve co vittja xa icanxin chojni ngain ndásin que řonhi řa tenchehe.

⁴ Jehe xa ndačo xa ngain na: “Cai jaha ra ttji ra dinchehe ra řana ngain jnguihna, co tsjengaha ra hna inchin jiquininxin.” Co chojni mé vinttecji na.

⁵ Cottimeja jehe xí mé vačhje xa iná inchin chonguíxin co cai iná inchin ní hora tsocjin, co joinchehe xa řajeho.

⁶ Co inchin naho hora tsocjin cjan vačhje xí mé iná para ngain ndásin, co vittja xa icanxin chojni que řonhi řa tenchehe na cai, co jehe xa ndačo xa ngain na: “¿Quedonda nttihi tate jaha ra ngoixin nchanho co řonhi řa tenchehe ra?”

⁷ Jehe na vinttendačo na: “Ixin řonhi chojni chjana na řa.” Cottimeja jehe xa ndačo xa ngain na: “Cai jaha ra ttji ra dinchehe ra řana ngain jnguihna, co tsjengaha ra hna inchin jiquininxin.”

⁸ Co are ondaconttie, jehe xa ndačo xa ngain tti jinda řa mé: “Dayehe cain ninchehe řa co ttjenguehe na hna. Ttexinxin ngain tti chojni que joixinhi después, co ttjaxin ngain tti nijoixinhi icha saho.”

⁹ Cottimeja vintteconchienne tti chojni que co-

exinhi joinchehe x̃a inchin naho hora tsocjin, co cada na xenguehe na hna lo de ngoixin nchanho.

¹⁰ Cottimeja are xenguehe hna tti chojni que joixinhi joinchehe x̃a icha saho, jehe na x̃axaon na que rroxenguehe na hna icha tsje, pero cai xenguehe na hna jecho tti ná nchanho.

¹¹ Are xenguehe na hna tti nijoixinhi joinchehe x̃a icha saho, jehe na coexinhi na ndačho na ixin jianha joinchehe tti jnguihi.

¹² Jehe na ndačho na ngain xinajni mé: “Cain chojni tehe que joinchehe na x̃a jecho nacoa hora co cjoenguehe na hna x̃ajeho que janha na que jointtaha na x̃a ngoixin nchanho ngandaohe soa.”

¹³ Pero jehe xinajni mé ndačho xa ngain ná na: “Amigo, janha x̃onhi ni ná cosa jianha rrinttaha nganji ra. ¿Acjoanha na ixin tsjengaha ra hna lo de ná nchanho?”

¹⁴ Jaxon dayehe tomia co sattji. Janha rinaho tsjengá chojni tehe hna x̃ajeho inchin rrittjengaha ra hna jaha ra.

¹⁵ ¿Apoco janha chondaha derecho de sinttaha tti janha rinaho ngain tomina? ¿O ani jaha ra tonchjoaha ra ixin janha danjoncoa tomina?”

¹⁶ Mexinxin jihi rročho ixin tti chojni que jai x̃axaon na ixin jehe na jeha importante na, pero are mé jehe na nisintte icha importante. Co tti chojni que jai x̃axaon na ixin jehe na anto importante na, pero are mé x̃onhi tsorentte na. Ixin janha nichjá anto tsje chojni pero cainxinha na rinao na na janha.

*Jesús cjan ndačho iná ixin jehe ndasenne
(Mr. 10.32-34; Lc. 18.31-34)*

¹⁷ Are Jesús ojittji ngatja nttiha para Jerusalén, jehe joantsjenda tti tteyó chojni que vacao co ndačo ngain na:

¹⁸ —Jaha ra tedicon ra que jaxon satettjin na para Jerusalén. Nttiha janha, tti Xí que joixin de ngajni, sinchechienhe na na ngain xidána que ttetonha ngain icha xidána co ngain ximaestroe ley Israel, co nimé ni rrondačo que ixin janha nasenxon na.

¹⁹ Co sanjo na na janha ngain xí de ojé nontte para que nimé tsjanao na na janha, co rroḡanguihna na cuarta de roa, co sinchecrucificá na na. Pero ngain nchanho ninxin janha rroxechon na.

*Tti joanchia janné Jacobo co Juan
(Mr. 10.35-45)*

²⁰ Cottimeja conchienenhe ngaca Jesús, janné Jacobo co Juan, cayoi nimé xenhe Zebedeo. Co jehe janné na conixin cayoi jehe na vintteconchienenhe na ngain Jesús. Co jehe jan vettoxin nttajochjihi jan ngain Jesús para joanchia jan ná joatotsenhe ñao jan ngain Jesús.

²¹ Jesús ndačo ngain naníta mé:

—¿Quehe rinao?

Naníta ndačo:

—Ttetonha soixin que are soixin tsetonha cainxin cosa, ná de xanhna tehe sehe lado jian de soixin co iná xan sehe xan ngain lado cjon de soixin.

²² Pero Jesús ndačo ngain Jacobo co Juan:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenhe ra inchin janha ndasenhe na?

Jehe na vinttendačo na:

—Ján nchao.

²³ Jesús ndačo ngain na:

—Ján ndoa que jaha ra tangui tsonha ra, co senhe ra inchin janha senhe na, pero de tti sintte ra lado jian na co lado cjon na, jeha janha tti danjo joachaxin mé, sino que Ndodana Ndo nohe quensen sintte nttiha.

²⁴ Co are tti itte chojni que vacao Jesús coinhi na yá, coña na ngain Jacobo co Juan.

²⁵ Pero Jesús vayé na, co ndačo ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cai icha xí que chonda joachaxin nttiha anto ttetonha xa ngain chojni.

²⁶ Pero jeha jamé tsonhe ngayaha jaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni.

²⁷ Co quexeho de jaha ra xó rinao ra icha tsetonha ra, pero cai chonda que sintte ra inchin esclavo para icha chojni.

²⁸ Janhi inchin janha, tti Xí que joixin de ngajni, joiha para que chojni tsjenguijna na janha, sino que janha joihi para joicjenguijna chojni co para que janha sanjo vidana para tsjenga hna tti teca tsje chojni.

Jesús joinchexingamehe yó tti chejo

(Mr. 10.46-52; Lc. 18.35-43)

²⁹ Are Jesús conixin tti tteyó chojni que vacao vačhexin na de ciudad de Jericó, anto tsje chojni rroé Jesús.

³⁰ Ngandehe nttiha mé tate yó tti xí chejo, co are vinttequinhi xa que Jesús jidatto nttiha, jehe xa ndačo xa sén:

—¡Soixin, razé David, ttiaconoana ni ra janha na!

³¹ Cain chojni que tettji nttiha joinchesattehe na cayoi xí mé para que rrotencoá xa, pero jehe xa icha coyao xa co ndačo xa:

—¡Soixin, razé David, ttiaconoana ni ra janha na!

³² Cottimeja Jesús tavengattjen, co vayé cayoi tti chejo mé co joanchiangui ngain co ndačo:

—¿Quehe rinao ra sinttaha janha nganji ra?

³³ Cayoi tti chejo mé vinttendačo:

—Janha na rinaho na sicon na.

³⁴ Cottimeja Jesús coiaconoehé cayoi xí mé co cattehe jmacon xa. Co ngain rato mé cayoi tti chejo mé onchao vicon, co cayoi sacjoi conixin Jesús.

21

Jesús joigaha ciudad de Jerusalén

(Mr. 11.1-11; Lc. 19.28-40; Jn. 12.12-19)

¹ Are joihi na ngain rajna Betfagé, chiaon ngaca Jerusalén, co ngaca tti jnanchjan que dinhi Nntaolivo, Jesús rroanha yó de tti chojni que vacao.

² Co ndačo ngain na:

—Ttji ra ngain rajnanchjan jimé. Yá sinchí ra ná colochó jichoa va co nttiha jí colochochjenhe va. Toxindanguehe ra va co sicohna ra cayoi va nttihi.

³ Co si čhonja chojni rrondattjo ra čhonja, jaha ra ndache ra que ximaestroa ra rrogondehe xa va co toin sicán ra va iná.

⁴ Jihi conhe para que joiconhe tti dindačo profeta are diquentaxin janhi:

⁵ Ndache ra ciudad de Jerusalén:

“Tsjenxin, tti Rey de jaha joí nganji, co jehe joí inchin ná chojni que jeha importante, co jitaha ná colochó,
que mé colochochjan nchín, xenhe ná colochó que otame va.”

⁶ Cottimeja cayoi chojni mé sacjoi na co joinchehe na inchin coetonha Jesús.

⁷ Joiaho na colochó mé conixin xenhe va, co manta que tetsá na cjoajinhi na colochochjan para Jesús vetaha va.

⁸ Co tti anto tsje chojni que joichonhe na Jesús, ttoha na coingo na ngá nttiha tti manta que tetsá na, co icanxin na conchinji na ramé nttá para coingo na ngá nttiha.

⁹ Co cain chojni que tetaon nttiha co cain chojni que terroé coexinhi na ndačo na:

—¡Gloria para ixin xí jihi ixin jehe xa razé rey David co chonda xa joachaxin que vechonda rey David! ¡Anto jian jehe tti joí conixin nombré Dios! ¡Gloria ngain Dios!

¹⁰ Are Jesús joixinhi ciudad de Jerusalén, cainxin chojni que te nttiha xatte na ngain ixin anto ché na, co tsje na joanchiangui na co ndačo na:

—¿Quensen jihi?

¹¹ Co icha chojni ndačo na:

—Jihi tti profeta que dinhi Jesús, tti joixin de ngain rajna Nazaret ngain nonttehe Galilea.

*Jesús joincheroa nihngo icha importante
(Mr. 11.15-19; Lc. 19.45-48; Jn. 2.13-22)*

¹² Después Jesús joixinhi patioe nihngo icha importante para ixin Dios, co nttiha vengui cain chojni que tettehna co tenchecji. Concjamangui cain

mesé tti chojni que tedasinguixinhi icha chojni tomi para rrochondaxin na suelto, co concjaman-gui nttaxintaoen cain nitenchecji conttoanajni.

¹³ Co ndačo ngain na:

—Ngain tti jitaxin Palabré Dios jindačo: “Nchi-ania sehe nchia para sinchecoanxinna na janha”, pero jaha ra ndadinchecjian ra nchia ná lugar tti xatte xichehe.

¹⁴ Co nttiha ngain nihngo mé canxion tti chejo co canxion tti rrengo conchienne na ngain Jesús, co Jesús joinchexingamehe cain chojni mé.

¹⁵ Pero xidána que vaquetonha ngain cain icha xidána co ximaestroe ley Israel are vintteguicon xa cain milagro que jehe Jesús jinchehe co are vinttequinhi xa quexen cain chjan ngaxinhi nihngo ndačo xan sén: “¡Gloria para ixin xí jihi ixin jehe xa razé rey David co chonda xa joachaxin que vechonda rey David!” Are vinttequinhi xa yá vinttegoñao xa

¹⁶ co vinttendačo xa ngain Jesús:

—¿Arrittinhi tti tendačo chjan taha?

Co Jesús ndačo ngain xa:

—Ján, rrittian. Pero jaha ra ¿axa tsjeha ra ngain tti jitaxin Palabré Dios? Nttiha jitaxin de ixin jihi ixin ndačo janhi:

Dios joinchecoenhe cain chjan hasta xan nandá toncjihí para nchesayehe xan jehe jian.

¹⁷ Cottimeja jehe xa nttiha vintteguittohe xa co Jesús sacjoixin de ngain ciudad de Jerusalén co sacjoi para ngain rajna Betania co nttiha vattoxin ttie mé.

Are Jesús nichja ngain nttahigo que xonhi ttochjoin jiyá

(Mr. 11.12-14, 20-26)

¹⁸ Ndoexin dacao are Jesús cjan para ngain Jerusalén iná, jehe venhe jintta.

¹⁹ Ngandehe nttiha mé Jesús vicon ná nttahigo co jehe conchienne ngain nttá, pero xonhi ttochjoin vittja ngain nttá, jecho qué nttá chonda nttá. Cottimeja Jesús ndačo ngain nttá:

—¿Xonhi tiempo jaha rrocjan sinchechjian ttochjoin!

Co ngain rato mé ndaxema nttahigo mé.

²⁰ Are chojni que vacao Jesús vicon na yá, vinttegoan na admirado, co joanchiangui na ngain Jesús co ndačo na:

—¿Quexén ndaxemanxin nttahigo yá anto daca?

²¹ Jesús ndačo ngain na:

—Atto seguro tti rrindattjo ra que si seguro ditticaon ra co xaxaonha ra que ixin čhoha tsonhe, jeoha sinchehe ra jihi, tti janha jointtaha ngain nttahigo yá, sino que jaha ra nchao rrondache ra jna jiha: “Sattjixin de yá co digaritsiahngui ndachaon”, co jamé tsonhe.

²² Co cain tti sanchia ra ngain Dios, co si ditti-caon ra que sayehe ra, ján sayehe ra.

Tti joachaxin que chonda Jesús

(Mr. 11.27-33; Lc. 20.1-8)

²³ Cottimeja Jesús joixinhi ngaxinhi tti nihngo icha importante, co are jehe jindache cain chojni nttiha de ixin Dios, conchienne ngain jehe canx-ion xidána que vaquetonha ngain cain icha xidána

conixin icanxin xittetonha ngain nihngo mé, co vinttejanghiangui xa ngain Jesús co ndačo xa:

—¿Quehe joachaxin chonda jaha para nchehe cain cosa jihi? ¿Quensen chjá joachaxin jihi?

²⁴ Jesús ndačo ngain xa:

—Janha cai sanchianguiha ra ná cosa jaha ra, co si jaha ra rrondachjenji ni ra tti janha sanchianguiha ra, cottimeja janha rrondattjo ra quexehe joachaxin nttaxin janha cain cosa jihi.

²⁵ ¿Quensen rroanha Juan para joincheguitte chojni? ¿A Dios, o ani chojni?

Cottimeja coexinhi xa joanchianguihi chó xa co ndačo xa:

—Si rrondačo na que Dios tti rroanha Juan, xí jihi nchao rrondattjo na xa: “¿Quedonda vitticaonha ra remé?”

²⁶ Co si rrondačo na que chojni tti rroanha Juan, pero ján na xagoen na chojni ixin cainxin chojni ditticaon na que Juan vanichja joajna que vagayé de ngain Dios.

²⁷ Co mexinxin vinttendačoxin xa ngain Jesús:

—Nonaha na.

Cottimeja Jesús ndačo ngain xa:

—Mexinxin ni janha rrondattjoha ra cai quexehe joachaxin nttaxin janha cain cosa jihi.

Ejemploe tti yó xanxí

²⁸ Jesús ndačo ngain xa:

—¿Quexén xaxaon ra de ixin ejemplo jihi? Ná xí vechonda xa yó xenhe xa xanxí, co ndache xa xansaho: “Ttji jai dinchehe xa ngain nttauva.”

²⁹ Co jehe xan ndačo xan: “Rinaoha tsji.” Pero después xaxaon xan ojé co ján, cjoí xan joinchehe xan xa.

³⁰ Cottimeja tti xí mé joitsjehe xanyoxin co ndačo xa řajeho ngain xan mé, co xan mé ndačo xan: “Ján tsji.” Pero jehe xan cjoiha xan.

³¹ ¿Quexehe de cayoi xan joinchehe xan inchin joinao ndodé xan?

Jehe xa vinttendačo xa:

—Xansaho.

Cottimeja Jesús ndačo ngain xa:

—Atto seguro tti rrindattjo ra, que cain xicobrador de impuesto, co cain nčí que vanchecji cuerpoe ngain icha xí, nimé ni icha saho rrochonda parte ngain tti ttetonha Dios que jaha ra.

³² Ixin Juan, tti vancheguitte chojni, jehe jói para joinhattjo ra queřen chonda ra que sintte ra ngain vidá ra, co jaha ra vitticaonha ra tti ndačo jehe Juan. Pero xicobrador de impuesto co nčí que vanchecji cuerpoe ngain icha xí, cain nimé vitticaon na tti ndačo Juan. Pero jaha ra masqui vicon ra jamé, coentoxinha ra vidá ra para rroguitticaon ra tti ndačo Juan.

Ejemplo ninchehe xa jianha

(Mr. 12.1-12; Lc. 20.9-19)

³³ 'Ttinhí ra iná ejemplo jishi: Ná tti vechonda jie jngui ngoixin jngui cjoenga nttauva co ngoixin jngui coendanji cerco, co joinchechjian ná tanque tti vagueninxin na ttouva, co joinchechjian ná torre para siconxin tti senda ngoixin jngui de nttattochjoin mé.

'Cottimeja tti xí mé joanjo xa nttattochjoin media ngain canxion tti nchehe řa co jehe xa sacjoi xa cjin.

³⁴ Co are ojoí tiempo de cosecha, jehe xí mé rroanha xa canxion ninchehe xé xa ngain tti nicoá nttattochjoin media para joiganchia na tti parte de cosecha que jiquininxin sayé xinajni mé.

³⁵ Pero jehe tti nicoá nttattochjoin media tse na jehe tti ninchehe xé xinajni mé; ná coaxin na nttá, ná nagoenxon na, co iná coaxin na xó.

³⁶ Jehe xinajni mé cjan rroanha icha tsje ninchehe xé iná para joiganchia na tti parte de cosecha que jiquininxin sayé xinajni. Pero jehe tti nicoá nttattochjoin mé media, cjoaya na iná, co joinchehe na xajeho inchin joinchehe na ngain tti nicjoi icha saho.

³⁷ Ultimo jehe xinajni mé rroanha xenhe xanxí, ixin jehe xaxaon: “Chonda na que sicao na respeto ngain xanhna.”

³⁸ Pero are vicon tti nicoá nttattochjoin media que joihi xenhe jehe xinajni, jehe na ndache chó na: “Jihi tti sayé ngoi nontte jihi de nttattochjoin. Nasoenxon na jehe para que ján na sittoá na ngoixin jngui de nttattochjoin.”

³⁹ Co jamé joinchehe na; tse na xan, joantsjegaxin na xan de ngain nttattochjoin mé co nagoenxon na xan.

⁴⁰ Cottimeja Jesús joanchiangui ngain xa co ndačo:

—Are tsí tti jnguihi mé, ¿quehe sinchehe ngain tti nicoá nttattochjoin mé media?

⁴¹ Jehe xa vinttendačo xa:

—Jehe xinajni mé sincheniha xa para nasoenxon xa cain tti nchehe xa jianha que coá nttattochjoin media co jehe sanjo nttattochjoín media ngain ojé chojni, que sanjo na ngain jian

tiempo tti parte de cosecha que jiquininxin sayé xinajni.

⁴² Cottimeja Jesús ndačo ngain xa:

—¿Añonhi tiempo tsjehe ra jaha ra tti jitaxin Palabré Dios? Ndačo janhi:

Tti ðo que joinchegondaha xittette nchia, pero ðo mé tti ðo joiguehe esquiné nchia.

Co jiji joinchehe Dios,

co para ixin ján na cosa jiji anto çhjoin.

⁴³ Mexinxin janha ndattjo ra que jaha ra sachjaha ra parte ngain tti ttetonha Dios, co sayé tti chojni que sinchehe inchin jiquininxin ngain tti ttetonha Dios.

⁴⁴ Co para tti ðo que rrindattjo ra, quexeho chojni que tsonttenguixin ðo jiji, tsonchjian pedazo cuerpoe na. Co si ðo jiji setsinga ðo ngataha quexeho chojni, rrocjan cuerpoe chojni mé polvo.

⁴⁵ Are cain xidána que vaquetonha ngain icha xidána co cain xifariseo vinttequinhi xa cain ejemplo que ndačo Jesús, coinxin xa que ixin jinichja de ixin jehe xa.

⁴⁶ Mexinxin joinao xa are mé rrotse xa Jesús, pero ða joincheha xa ixin ðagoen xa chojni que te nttiha ixin cain chojni vaguitticaon na que Jesús vanichja palabré Dios.

22

Ejemploe tti quiai are tottehe na

¹ Jesús coexinhi ndačo iná ngain na de ixin ejemplo, co ndačo:

²—Tti ttetonha Dios ngajni, mé inchin joinchehe ná rey que coín ná vandango are cottehe xitsihi.

³ Jehe rey mé coetonhe cain xinchehe xé para jointdache xa cain chojni que ovinnte invitado para sijine na ngain vandango mé, pero cain chojni mé čoha na cjoí na.

⁴ Jehe rey mé cjan rroanha icha ninchehe xé, co ndačo ngain na: “Ndache ra cain chojni que ote invitado que otsí na sine na ixin onchao jí comida. Ndache ra na ixin janha ocoetonha para venhe coxinttahná co cain coxigo que janha jointtanttao, co cainxin onchao jí. Ndache ra na que tsí na ngain vandango jiji.”

⁵ Pero cain tti chojni que ovinnte invitado čoha na cjoí na. Ná de jehe na sacjoi na ngataon jnguihi na, co iná na ngain negocioe na,

⁶ co icanxin na tse na jehe ninchehe xé rey mé, co feo joinchehe na ngain na hasta nagoenxon na na.

⁷ Cottimeja rey mé anto coñao, co rroanha cain xisoldadoe para nagoenxon xa cain jehe tti chojni que cjoaya co cjoaga xa rajné na.

⁸ Cottimeja ndačo rey mé ngain ninchehe xé: “Vandango onchao jí, pero cain chojni que jointtainvitá rrojine na tequininxinha na para rroquí na.

⁹ Jai ttji ngain cain nttiha yeye co ndache ra cain chojni que setan ra que tsí na sine na.”

¹⁰ Cain ninchehe xé rey mé vačhje na ngain cain nttiha, co joatse na cain chojni que vetan na, tti jian co tti jianha; co jamé hasta caon nchia mé de chojni.

¹¹ Cottimeja jehe rey mé joixinhi para joitsjehe cain chojni que tejine, co jehe vicon nttiha ná xí, pero diguítinxinha xa inchin ná chojni que ttji

ngain ná vandango.

¹² Jehe rey ndačo ngain tti xí mé: “Amigo, ¿quedonda joixinxin jaha nttihi que ditoxinha para ngain vandango jiji?” Pero jehe tti mé tencoa.

¹³ Cottimeja rey mé ndačo ngain tti nitedayá láto ngain mesa: “Ttia ra xí yá de rotté xa co de rá xa co diganca ra xa ndoja ngain tti naxin xehe tti rrotsjanga xa co sinetaon neno xa.”

¹⁴ Ixin janha nichjá anto tsje chojni, pero cainxinha na rinao na na janha.

*Tti rroxenga hna ngain impuesto
(Mr. 12.13-17; Lc. 20.20-26)*

¹⁵ Cottimeja xifariseo savinttecji xa, co vinttecjao chó xa quexen sinchehe xa para sinchenichja xa Jesús ná cosa nchaoha para mé tsjanguixin xa Jesús.

¹⁶ Mexinxin rroanha xa canxion chojni xa, conixin canxion chojni Herodes para joindačo na ngain Jesús:

—Maestro, janha na nona na que soixin ndačo tti ndoa, co soixin ndoa nchecoenhe chojni de ixin Dios, co ncheha caso tti nichja icha chojni ixin soixin ncheha juzgado chojni rico oje que chojni noa.

¹⁷ Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

¹⁸ Pero Jesús oconohe de tti jianha que jehe xa teřaxaon xa de ixin jehe, co jehe ndačo ngain xa:

—¡Jaha ra řo ncheha ra tti ndačo ra! ¿Quedonda rinao ra sincheyana ra?

¹⁹ Tjagohna ra ná tomi que ttjengaxin ra hna impuesto.

Co jehe na cjoagoe na Jesús ná tomi de plata que vanchegonda chojni tiempo mé.

²⁰ Are vicon Jesús tomi mé joanchiangui ngain na co ndačo:

—¿Quensen con jinganito jihi, co quensen nombré jitaxin jihi?

²¹ Jehe xa vinttendačo xa:

—Con xiemperador co nombré xa.

Cottimeja Jesús ndačo ngain xa:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

²² Are vinttequinhi xa jihi, jehe xa vinttegoan xa admirado; co nttiha cointtohe xa Jesús co jehe xa savinttecji xa.

Canxion chojni joanchiangui quexén tti rroxechon ni

(Mr. 12.18-27; Lc. 20.27-40)

²³ Ngain nchanho mé canxion xisaduceo cjoí xa para joitsjehe xa Jesús. Xisaduceo vaguitticaon xa que chojni que ndadenhe irroxechonha na; mexinxin joanchiangui xa ngain Jesús co ndačo xa:

²⁴ —Maestro, ley que vayé Moisés jitaxin que si ná xí que jicao xa čihi xa ndasenhe xa co řonhi chjan tsinttohe xa, chonda que ná xanchó xa xanxí secoo nčhiganha mé co rrochonda na chjan para que chjan mé sehe xan inchin xenhe tti ndavenhe.

²⁵ Nttihi ngayehna janha na vintte yáto xanxí, cain xanchó xan. Xansaho vecao xan čihi xan pero ndavenhe xan, co ixin řonhi chjan cointtohe xan, nčhiganha mé vecao nča xanchó tti ndavenhe, xanyoxin.

²⁶ Xajeho jamé conhe ngain xanyoxin cai, co después vecao ncha xanninxin, pero xajeho jamé conhe, co hasta vecao ncha tti xanyatoxin co xonhi chjan joichonda ncha.

²⁷ Co después de cain mé, cai jehe ncha ndavenhe ncha.

²⁸ Mexinxin ndachjenji ni ra, are rroxechon cain ni yá, ¿quexehe de tti yáto xanchó mé sehe mero xixihi jehe nchí mé ixin cain xan vinttecao xan xajeho nchí mé?

²⁹ Jesús ndacho:

—Jaha ra noaha ra quehe tendacho ra ixin noaha ra tti jitaxin ngain Palabré Dios, ni noaha ra tti joachaxin que chonda Dios.

³⁰ Ixin cain chojni que ondavenhe, are rroxechon na, isinttecaoha chó na de xí co ni de nchí, ixin are mé sintte na inchin cain ángel de Dios que te ngajni.

³¹ Pero de tti jaha ra danchianguina ra de ixin tti chojni que ndadenhe, ¿atsjeha jaha ra tti jindattjo ra Dios mismo? Jehe dindacho janhi:

³² “Janha tti Dios de Abraham co Isaac co Jacob.” Dios jeha Dios de tti nindadiguenhe, sino que Dios de chojni que techon.

³³ Cain chojni que te nttiha, are vinttequinhi na yá, cain na vinttegoan na admirado de ixin tti nichja Jesús.

Tti icha importante que ttetonha Dios

(Mr. 12.28-34)

³⁴ Are xifariseo conohe xa que Jesús ndajoinchetencoa xisaduceo, jehe xifariseo xatte xa ngain Jesús.

³⁵ Co ná de jehe xa que vehe xa maestroe ley Israel joinao xa rrojinchenichja xa Jesús ná cosa nchaoha; mexinxin joanchiangui xa ngain Jesús co ndačo xa:

³⁶ —Maestro, ¿quexehe tti icha importante que tte-tonha Dios sinchehe ni?

³⁷ Jesús ndačo:

—“Rinao Dios, ngain ansean, conixin ngain almá, conixin ngain joarrixaoan.”

³⁸ Jihi tti icha importante, co tti saho que tte-tonha Dios sinchehe ni.

³⁹ Co tti yoxin chiaon xajeho ixin ndačo: “Rinao cain chojni inchin rinao cuerpoa.”

⁴⁰ Jehe cayoi cosa yá tti icha importante de ngain ley que vayé Moisés co de cain tti ndačo cain profeté Dios.

*Tti dindačo David de ixin Jesucristo
(Mr. 12.35-37; Lc. 20.41-44)*

⁴¹ Are cain xifariseo xa tate xa nttiha,

⁴² Jesús joanchiangui ngain xa co ndačo:

—¿Quehe xaxaon ra de ixin Cristo? ¿Quensen mé? Jehe xa vinttendačo xa:

—Mé tsixin de ngain razé rey David.

⁴³ Cottimeja ndačo Jesús:

—Mexinxin ¿quedonda Espíritu Santo joinchenichja David, co David joincheguinho Cristo, soixin? Ixin David dindačo:

⁴⁴ Tti Tte-tonha cainxin cosa ndačo ngain tti Tte-tonna janha:

“Darihi ngain lado jian na hasta que janha sinttagacha jaha de ngain cain tti ningaconha.”

⁴⁵ Mexinxin, ¿queñén que Cristo jehe ná xanntí David si jehe David mismo ndaño que Cristo tti ttetonha ngain jehe?

⁴⁶ Co ni ná xa iñonhi ndaño xa ngain Jesús, co desde ngain nchanho mé ni ná xa iñonhi joanchi-anguihi xa Jesús.

23

Jesús joinchesattehe xifariseo co ximaestroe ley (Mr. 12.38-40; Lc. 11.37-54; 20.45-47)

¹ Cottimeja Jesús ndaño ngain cain chojni que te nttiha co ngain chojni que vacao:

² —Cain ximaestroe ley Israel co cain xifariseo chonda xa joachaxin de nchecoenehe xa chojni cain tti coetonha ley que vaye Moisés.

³ Mexinxin jaha ra ditticaon ra co nchehe ra cain tti rronhattjo ra xa, pero ncheha ra inchin jehe xa tenchehe xa ixin jehe xa dinttendaño xa ná cosa co dinttenchehe xa oje.

⁴ Ndache xa chojni que sinchehe na tti anto tangui que jehe xa ttetonha xa, que ni jehe xa choha ni rinaoha xa nchehe xa cain mé.

⁵ Jehe xa nchehe xa cosa jian pero jeho para que icha chojni dicon, co para xaxaon na que jehe xa anto jian xa. Co jehe xa ttianito xa nttattjen xa co rá xa cajachjan de roa tti jingá rioho xón que jixin canxion parte de Palabré Dios, co dinttengá xa lonto icha jinjini que icha chojni.

⁶ Co anto ncheñoxinhi xa ttji xa ngain vandango co dintte xa ngain tti lugar icha importante. Co are dinttecji xa ngain nihngo dintte xa ngain nttaxintaon icha importante.

⁷ Co are rridintte xa ngain nttiha, rinao xa que chojni sanjo na joajna ngain xa conixin anto tsje respeto, co sincheguinh na xa maestro.

⁸ 'Pero jaha ra dittoaxinha ra que chojni sinttaguinh na ra maestro, ixin cain jaha ra inchin chó ra cainxin ra co chonda ra jeho nacoaxinxon Maestro, que mé Cristo.

⁹ Co nttihi ngataha nontte ni ná chojni ncheguinha ra padre, ixin chonda ra jeho nacoaxinxon Ndadá ra que ttjen ngajni.

¹⁰ Ni dittoaxinha ra que chojni rronhattjo ra na ixin jaha ra anto importante ra ixin Cristo jeho mé tti icha importante para ixin jaha ra.

¹¹ Tti chojni que ttjenguijna icha chojni, mé tti icha importante de cain jaha ra.

¹² Ixin tti chojni que tonohé ixin jehe tti anto importante, mé settoxin nttajochjih nganji ra co tti chojni que jai tonohé que jehe jeha importante, chojni mé tti sehe icha importante.

¹³ '¡Pobre de jaha ra, ximaestroé ley co jaha ra chojni fariseo, xo ncheha ra tti ndačo ra! Ixin jaha ra tecayacoenhe ra chojni para que jehe na čoha rrochonda na parte ngain tti ttetonha Dios que ttjen ngajni. Ni jaha ra mismo rinaoha ra rrochonda ra parte ngain tti ttetonha Dios, ni tančjandaha ra icha chojni para rrochonda na parte nttiha.

¹⁴ '¡Pobre de jaha ra, ximaestroé ley co jaha ra chojni fariseo, xo ncheha ra tti ndačo ra! Ixin jaha ra dantsjehe ra nchiandoha nčhiganha ixin ittixinha nča ttjenga nča hna contribución, cottimeja para que xonhi chojni rročaxaon tti jaha

ra tenchehe ra, anto sé nchecoanxinhi ra Dios. Mexinxin jaha ra sayehe ra icha jie castigo que icha chojni.

¹⁵ ¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Ixin jaha ra anto ttingaria ra para que ttjé ra chojni que sitticaon xajeho inchin jaha ra co are odinchí ra chojni mé, masqui jeho nacoa, jaha ra nchenchehe ra chojni mé cosa que jiquininxinha para que jehe icha jiquininxin tsji ngain infierno que jaha ra mismo.

¹⁶ ¡Pobre de jaha ra, xo tenchecanttjen ra icha chojni que noeha. Ixin ndačo ra que are ná chojni ndačo sinchehe ná cosa, co sinchejurá de ixin ningoe Dios, juramento mé xonhi xé; pero si sinchejurá de ixin tti oro que jixinhi nihngo, juramento mé nchoe jian.

¹⁷ ¡Jaha ra tonto ra co chejo ra! ¿Quexehe tti icha importante, aoro o nihngo que jinchejian oro mé?

¹⁸ Co cai ndačo ra que are ná chojni ndačo sinchehe ná cosa, co sinchejurá de ixin altar que jixinhi nihngo, juramento mé xonhi xé; pero si sinchejurá de ixin cain tti jí ngataha altar, juramento mé ján jian.

¹⁹ ¡Jaha ra tonto ra co chejo ra! ¿Quexehe tti icha importante, a tti jí ngataha altar o jehe altar que jinchejian cain cosa mé?

²⁰ Ixin tti chojni que nchejurá de ixin altar, chojni mé jinchejuraha de ixin jeho altar, sino que de ixin cain cosa que jí ngataha.

²¹ Co tti chojni que nchejurá de ixin nihngo, chojni mé jinchejuraha de ixin jeho nihngo, sino

que cai de ixin Dios que jí ngaxinhi nttiha.

²² Cai tti chojni que nchejurá de ixin ngajni, chojni mé cai jinchejurá de ixin tti jitaha Dios co cai de ixin jehe Dios mismo, ixin jehe tti jí nttiha.

²³ ¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Jaha ra danjo ra para ixin Dios tti ttexin parte de ca inchin cařancho, co de anís, co de comino, pero ncheha ra tti icha importante de cain tti coetonha Dios, inchin de tti sinchehe ra jian ngain vidá ra, co tti tsiaconoehe ra icha chojni, co tti sitticaon ra jian de ixin Dios. Cain yá tti chonda ra que sinchehe ra cain nchanho, co cai nchehe ra sigue danjo ra tti ttexin parte de ca mé.

²⁴ ¡Jaha ra tenchecanttjen ra icha chojni que noeha! ¡Jaha ra nchecanguihi ra ná coxisenchjan de ngain vasa ra pero dinga ra nchejio ná camello!

²⁵ ¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Jaha ra inchin vaso co láto que chojni ncheroa de ngama, pero de ngaxinhi ansean ra anto ttjoaha ra ixin řa teca ra de cain cosa que diquehe ra co de puro rinao ra que jaho ra rrochonda ra cainxin cosa.

²⁶ Jaha ra xo fariseo chejo. Saho ncheroa ra ansean ra co jamé cai tsoroa ngama ra, inchin nchehe ra ngain vaso co láto.

²⁷ ¡Pobre de jaha ra, ximaestroe ley co jaha ra chojni fariseo, xo ncheha ra tti ndačo ra! Ixin jaha ra inchin cueva tti texinhi cuerpoe chojni que ndadiguenhe ixin cueva mé řhjoin te ixin diguin-gaxin nttésó ndojaxin, pero ngaxinxin tecaon de loroe chojni co cain cosa que ttjoaha.

28 Jamé te ra jaha ra; de ndojaxin xago ra ixin jian ra ngain chojni, pero de ngaxinhi ansean ra tecaon ra de cosa jianha.

29 '¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Ixin jaha ra nchechjian ra monumento anto čhjoin ngataha tti teřavá cuerpoe cain profeta que ndavenhe are saho co nchetsonji ra monumentoe cain tti chojni que cjoí jian.

30 Cottimeja ndačo ra: “Si janha na rroguintechon na ngain tti tiempo que vinttechon nindogoelitoa na xančhjen, janha na rrocjenguijnaha na na para narrogoenxon na cain profeta que goen jehe na.”

31 Conixin yá jaha ra mismo datsoan ra que jaha ra xanntí tti chojni que nagoenxon cain profeta que venhe.

32 ¡Janché jaha ra nchejexin ra tti coexinxin joinchehe nindogoelitoa ra xančhjen!

33 '¡Jaha ra te ra inchin conché, co inchin razé conché ra! Jaha ra chonda ra que tsji ra ngain infierno.

34 Mexinxin janha rrorroanha profeta nganji ra, co xí que Espíritu Santo joinchenohe, co xí que sinttacoanha ra de ixin Dios. Pero jaha ra nasoenxon ra na co sinchecrucificá ra canxion na co icanxin na rrořanguihi ra na nttá o tton ngaxinhi nihngo, co rrorroehe ra na de rajna co rajna ngoi tti jehe na sacji na para feo sinchehe ra ngain na.

35 Mexinxin jaha ra tti teca ra vidé cainxin chojni jian que vintteguenhe, desde Abel, tti cjoí xí jian para ngain Dios, hasta Zacarías,

xenhe Berequías tti nindogoelitoa ra nagoenxon na ngain lugar entre nihngo co altar.

³⁶ Atto seguro tti janha rrindattjo ra, que cain chojni judío que techon jai, nijihi, niteca cain yá.

Jesús tsjanga por ixin Jerusalén

(Lc. 13.34-35)

³⁷ Cottimeja ndačo Jesús iná:

—¡Chojni de Jerusalén, jaha ra que nadoenxon ra profeté Dios co xanguihi ra xo tti chojni que ttiaho joajna que Dios rroanha nganji ra; anto tsje nttiha janha joinaho rrogatse ra inchin ná cochia datse va xenhe va nganguihi nenehe va, pero jaha ra joinaoha ra!

³⁸ Tsjenxin ra; nchiandai ra ndasittohe nchia jeho nchia,

³⁹ ixin janha rrindattjo ra que irrocjanha ra sicon ni ra janha hasta que tsija tti tiempo que jaha ra rrondačo ra: “Anto jian tti joí de ngain nombré Dios.”

24

Jesús ndačo que nihngo icha importante rroxantte

(Mr. 13.1-2; Lc. 21.5-6)

¹ Jesús vačhjexin de nihngo icha importante co sajittji are chojni que vacao conchienne na ngain co ndačo na ixin rrotsjehe Jesús ngoixin nihngo mé.

² Pero Jesús ndačo ngain na:

—¿Adicon jaha ra cain yá? Atto seguro tti rrindattjo ra que yá sittoeha ni ná xo ngataha iná xo; cainxin rroxantte.

*Quehe tsonhe icha saho que mundo ndatsjexin
(Mr. 13.3-23; Lc. 21.7-24; 17.22-24)*

³ Cottimeja savinttecji na ngain tti jnanchjan que dinhi Nttaolivo, co are Jesús tavehe nttiha, chojni que vacao conchienne na co joindačo na ngain jimao:

—Rinaho na que rrondachjenji ni ra quesa tsonhe yá, ¿Quehe señal rrožago are soixin rrocjan sihi iná, co are ondatsjexin mundo jiji?

⁴ Cottimeja Jesús ndačo ngain na:

—Tjiho ra cuidado que xonhi chojni sinttayaha ra.

⁵ Ixin atto tsje chojni tsí co sinchegonda na nombrena rrondačo na: “Janha tti Cristo na”; co sincheyehe na tsje chojni.

⁶ Jaha ra tsinhi ra que sehe guerra nttihi co ngain icha lugar, pero xaonha ra ixin jamé chonda que tsonhe; pero xa jeha tti nchanho que ndatsjexin mundo.

⁷ Ixin ná nación tsetocaho iná nación, co ná región tsetocaho iná región. Co ngain tsje parte de nontte sehe jintta, co chin, co tsingui nontte.

⁸ Cain yá nandá tsexinxin tsonhe tti anto tanguí que tsonhe chojni.

⁹ Cottimeja sinttachienne ra na jaha ra ngain chojni que ningaonha ra para feo sinchehe na nganji ra, co nasoexon na jaha ra, co ngoixin mundo rroningaonha ra chojni ixin ditticaon ni ra janha.

¹⁰ Ngain tiempo mé tsje chojni isincheha na sigue sitticaon na nganji na janha co rroningaonhe chó na co jeha na sinchecienne chó na ngain tti ningaonna janha.

¹¹ Are mé tsononxin tsje tti rronichja cosa ndoaha, co jehe na rrondačo na que jehe na tenichja na joajné Dios, co sincheyehe na tsje chojni.

¹² Co anto tsje cosa jianha sehe, que hasta tsje chojni isinaoha chó na.

¹³ Pero tti chojni que sinchehe sigue sitticaon na janha hasta ndasenhe, chojni mé rrochonda iná vida naroaxin.

¹⁴ Co tti jian joajna de queǵén ttetonha Dios, jihi tsonohe chojni ngoixin mundo para que chojni ngain cainxin nación tsonohe na tti jian joajna jihi. Are tsjexin cain yá, cottimeja ndasitján mundo jihi.

¹⁵ 'Profeta Daniel diquentaxin de ixin tti cosa que icha jianha de cainxin cosa. Co are jaha ra sicon ra que cosa mé siguehe ngain tti lugar santo de ngain nihngo icha importante, (tti tsjehe ǵón jihi chonda que tsinxin),

¹⁶ cottimeja tti chojni que te Judea rrochonda na que satsinga na ngagaha jna.

¹⁷ Co tti sintte ngataha techoe nchiandoha, are jehe sania, rrochjeha tiempo para sicao cosé de ngaxinhi nchia ixin anto daca satsinga.

¹⁸ Co tti sintte ngataon jngui, chondaha que rrocjan ni para sirroé lonttoe ngain nchiandoha.

¹⁹ ¡Pobre de cain nǵhí que sintteyá chjan co cain nǵhí que rrochonda chjan que tetai ngain nchanho mé!

²⁰ Nchetsenhe ra ñao Dios que jaha ra rrochondaha ra que satsinga ra mero ngain tiempoe quin, ni ngain tti nchanho que nchejogaha ni,

²¹ ixin are mé anto tangui tsonhe, que ǵa ǵonhi

tiempo tonhe jamé ni desde are coexinhi vehe nontte jihi, ni tsonhe después.

²² Co si Dios rrojinchenchinha tiempo mé, xonhi chojni rroxehé, pero Dios sinchenchín tiempo mé ixin jehe anto rinao cain tti chojni que jehe coinchiehe.

²³ 'Si are mé çhonja chojni rrondattjo ra: "Nttihi jí Cristo", o "Nojiha jí", jaha ra ditticaonha ra.

²⁴ Ixin are mé tsí tsje chojni que sincheyehe tsje chojni ixin rrondaçho na que jehe na ni Cristo co tsí chojni que rrondaçho ixin jehe na dayé na joajné Dios. Co sinchehe na tsje señal co milagro para sincheyexin na tsje chojni, co si nchao hasta tti chojni que Dios mismo coinchiehe sincheyehe na.

²⁵ Janha ondattjo ra cain yá desde jaxon.

²⁶ Mexinxin si rrondattjo ra na: "Cristo cjan jói co jehe jí ngagaha jna tti xonhi chojni jí", jaha ra ttjiha ra ditsjehe ra nttiha, o si rrondattjo ra na: "Cristo nttihi jí ngaxinhi ná cuarto", jaha ra ditticaonha ra.

²⁷ Ixin janha, tti Xí que joixin de ngajni, are sihi iná, janha tsononxin na inchin are tonguixin anto daca dattoa xohi ngajni desde tti çhinxin nchanho hasta tti diataonxin nchanho.

²⁸ Co tti sarihi janha, nttiha rroxatte cain chojina.

Quexén tsí tti Xí que joixin de ngajni

(Mr. 13.24-37; Lc. 21.25-33; 17.26-30, 34-36)

²⁹ 'Nttihi tsjexin satto cain tti nchanho que anto tangui mé, cottimeja nchanho isinchengasanha nchaon, co conittjao co conotse sinttjixin va

de ngajni, co hasta cainxin cosa que jí ngajni, rrořanga.

³⁰ Cottimeja sicononxin ngajni señal de janha, tti Xí que joixin de ngajni, co ngain cainxin rajna de ngoixin mundo rrotsjanga chojni, co sicon na na janha, tti Xí que joixin de ngajni, sihi are mé ngacjan ttjoi de ngajni conixin anto tsje joachaxin co gloria.

³¹ Co janha rrorroanha cain angelna para que are tsoyao trompeta, jehe satse cainxin chojni que janha coinchiá de cainxin parte de ngoixin mundo.

³² Tangui ra ejemploe nttahigo: Are xesan ramé ntta co činhi qué ntta, jaha ra onoha ra que ojoiconchian tiempoe čin.

³³ řajeho jamé cai, are jaha ra sicon ra que cain cosa yá tsexinhi tsonhe, jaha ra onoha ra que janha ochiaon rrocjan na sihi iná.

³⁴ Atto seguro tti rrindattjo ra que cain yá tsonhe icha saho que generación jihi sitján.

³⁵ Ngajni co nontte ndasitján, pero tti janha ndačhjan sitjanha ixin chonda que tsonhe cain tti ndačhjan.

³⁶ 'Pero nchanho co hora que tsonhe mé, ni ná chojni noeha, ni cain ángel que te ngajni, ni janha tti Xenhe Dios nonaha. Jeho Dios Ndodá na tti nohe quesa co quehe hora.

³⁷ Jañá inchin conhe ngain tiempoe Noé cai jamé tsonhe are sihi janha, tti Xí que joixin de ngajni.

³⁸ Ngain tiempo mé are icha saho que vitjanxin na jinda, cain chojni vanchehe sigue vanchehe na inchin costumbré na; vajine na co vaguihi na,

vacottehe na co vaganjo na n̄hichehe na para vacottehe n̄cha. Jañá hasta ngain tti nchanho que Noé joixinhi para ngaxinhi tti arca que jehe joinchechjian.

³⁹ Co coinxinha na que ixin ndarroquitján mundo hasta que joí jinda co ndagoen cainxin na. Jamé tsonhe cai are sihi janha, tti Xí que joixin de ngajni.

⁴⁰ Ngain rato mé si yó xí tenchehe ʒa ngataon jngui, ná rrochonda iná vida naroaxin co ná nahi.

⁴¹ Co si yó n̄hí tedaho, ná n̄cha sayá n̄cha co iná n̄cha nahi.

⁴² ʽJaha ra cain nchanho dintte ra listo ixin noaha ra quesa sihi janha tti chonda cain joachaxin.

⁴³ Pero ttettexin ñao ra jihi, que si xinajní ná nchia rroconohe xa quehe hora rroquí xichehe are ttie, xinajní rroquejoaha xa; jehe xa rroguenda xa nchiandoha xa para rrocanchjandaha xa xichehe rroguixinhi xa rroqué xa.

⁴⁴ Mexinxin jaha ra cai dintte ra listo ixin noaha ra quesa janha, tti Xí que joixin de ngajni, sihi iná.

*Ná tti nchehe ʒa jian co ná tti nchehe ʒa jianha
(Lc. 12.41-48)*

⁴⁵ ʽTti nchehe ʒa que ditticaon nchehe cain tti ditonhe co chonxin tti jian; xinajni chonda xa confianza ngain chojni mé para que jehe dittoehe icha ninchehe ʒé xa para danjo jine na hora que denhe na jintta.

⁴⁶ Anto ʒhjoin para ixin jehe tti nchehe ʒa si jehe jinchehe cain tti vitonhe are tsí xinajní.

⁴⁷ Atto seguro tti rrindattjo ra, que xinajní rrochjé xa joachaxin para que jehe senda cainxin cosa que jehe xa chonda xa.

⁴⁸ Pero si tti nchehe xa mé jianha, co rrořaxaon que xinajní tsiha xa toin,

⁴⁹ co si jehe tsexinhi sinchesattehe icha ninchehe xé xa, co sehe sinecaho co sicaho cain tti dicoan,

⁵⁰ pero cottimeja xinajní tsí xa ngain ná nchanho que ni jehe rrořaxaonha, co ngain ná hora que ni jehe noeha.

⁵¹ Co rrochjé xa ná castigo anto tangui, que xajeho inchin castigo que sayé cain chojni que ncheha na tti jehe na ndačo na. Cottimeja nttiha jehe rrotsjanga co sinetaon neno.

25

Ejemploe tti tte xannčí

¹ Cai ndačo Jesús:

—Jihi ná ejemploe quexén ttetonha Dios que ttjen ngajni. Mé inchin ná xanxí que tsottehe. Co tte xannčí vinttecji xan ngain vandango mé co joicao xan lámpara de aceite para joichoexin xan xinovio ngatja nttiha.

² Naho de jehe xan lista xan co naho xan xaxaonha xan jian.

³ Tti xan xaxaonha jian joicaoha xan icha aceite para rroquequia xan lamparé xan iná.

⁴ Co tti xan lista joicao xan icanxin xoxao de aciete aparte de lamparé xan.

⁵ Co ixin xinovio dacaha joí xa, cain xannčí mé tse xan cottačhin co tavinttejoa xan.

⁶ Cottimeja inchin ngosine ttie, coinhi xan coyao ná tti ndaĉho: “¡Ojoí xinovio, daĉhje ra dichoenxin ra xa ngatja nttiha!”

⁷ Cain xannĉhí mé vintteguingattjen xan, para vinttenchegaon xan lamparé xan.

⁸ Cottimeja tti xan naho que ʒaxaonha jian vinttendaĉho xan ngain tti xan naho que vintte lista: “Chjana ni ra nĉhion aceite ixin lamparana na ndatedanga lampara.”

⁹ Pero tti xan naho que vintte lista vinttendaĉho xan: “Nahi, ixin sittjaha aceite para ixin janha na co jaha ra. Icha jian ttji ra tti toĉhji aceite, co nttiha ttehna ra aceite para ixin jaha ra.”

¹⁰ Pero are tti naho xannĉhí mé joiquehna xan aceite, xinovio ojoí xa. Co cain tti xannĉhí que tedacaon lamparé joixincaho xan xinovio ngaxinhi nchia tti jí vandango co coejé na puerta.

¹¹ Cottimeja vinttequí tti inaho xannĉhí co vinttendaĉho xan: “Nttatsanha ra ñao danttjena ni ra puerta.”

¹² Pero xinovio ndaĉho xa: “Chonxinha quensen jaha ra.”

¹³ Cottimeja Jesús ndaĉho:

—Dintte ra listo cain nchanho ixin noaha ra quesa ni quehe hora rrocjan na sihi janha, tti Xí que joixin de ngajni.

Ejemploe tomi

¹⁴ Jihi iná ejemploe quexén ttetonha Dios que ttjen ngajni. Mé inchin na xinajni que sajittji para ngain iná nación. Pero icha saho que jehe xa sacjoi xa, vayé xa cain ninchehe ʒé xa co ndaĉho xa ngain na: “Nttihi cada ra tsinttoaha ra tomina.”

15 Ngain ná de jehe na joanjo xa inchin naho mil de tomi mé, co ngain iná na joanjo xa inchin yó mil, co ngain iná na inchin ná mil. Cada na vayé na tomi inchin jehe na nohe na nchenchehe na tomi xa. Cottimeja jehe xinajni mé sacjoi xa cjin.

16 Tti nchehe xa que vayé tti naho mil de tomi mé, jehe joinchegonda tomi mé co joacha iná naho mil.

17 Co jamé joinchehe tti vayé tti yó mil, co joacha iná yó mil.

18 Pero tti vayé ná mil, mé ngue co cjoavá tomí xinajní.

19 Vatto tsje tiempo, cottimeja cjan xinajní cain ninchehe xa mé para joitse xa cuenta ngain na.

20 Saho conchiennehe tti vayé naho mil, co joanjo iná naho mil, co ndačo ngain xa: “Chjana naho mil, co nttihi dayehe iná naho mil que joacha janha.”

21 Xinajni mé ndačo xa ngain: “Atto nchao jí; jaha ná ninchehe xa atto jian co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. Xacoi dixinhi nchiania para rrochaha conixin janha.”

22 Cottimeja conchiennehe tti nchehe xa que vayé tti yó mil, co ndačo: “Chjana yó mil, co nttihi dayehe iná yó mil que joacha janha.”

23 Xinajní ndačo xa ngain: “Atto nchao jí; jaha ná ninchehe xa atto jian, co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. Xacoi dixinhi nchiania para rrochaha conixin janha.”

²⁴ Pero are conchienne tti nchehe xa que vayé tti mil, ndačo ngain xinajní: “Janha nona que soixin anto soji ansean que dantsjehe chojni tti soixin danjoha co jamé tsinhi cosecha tti soixin ttengaha.

²⁵ Mexinxin janha xaon na nganji co joiquema tomia, joicjavá tomi. Pero nttihi dayehe tti tomia que chjana.”

²⁶ Xinajni ndačo xa: “Jaha ná ninchehe xa jianha, co atto saha. Si onoha que janha dantsjá chojni tti janha danjoha, co jamé janha tsinhi cosecha tti janha coengaha,

²⁷ mexinxin icha jian si jaha rrojicán tomina ngain ná banco, co are janha rrocjan na rrojihí, rrogayá tomina conixin tti rrogacha tomi.”

²⁸ Co ndačo xa ngain nite nttiha: “Dantsjehe ra xa tti mil que jichonda xa co danjo ra ngain tti jichonda tte mil.

²⁹ Ixin tti chonda, sayé icha, co rrochonda hasta rroxehé. Co tti xonhi chonda, sachjehe hasta cain tti chonda masqui tsjeha chonda.

³⁰ Co tti nchehe xa que xonhi xé jihí, dehngui ra ndoja tti naxin xehe, nttiha tti rrotsjanga jehe co sinetaon neno.”

Quexén soenhe juzgado cain nación

³¹ Janha, tti Xí que joixin de ngajni, are janha sihi inchin ná Rey, conixin cain angelna, are mé sarihi ngain lugar de joachaxin.

³² Chojni de cainxin nación rroxatte na ngat-toxon con, co janha santsjenda na cada na inchin tti ttingaría coleco dantsjenda coleco de ngayehe cottentso.

³³ Janha tsín coleco lado jian na co cottentso lado cjon na.

³⁴ Cottimeja janha, tti Rey na, rrondattjan tti chojni que te lado jian na: “ǵacoi ra, jaha ra ǵo ojointsanchaon ra Ndodana, co dayehe ra tti lugar que jichjian para ixin jaha ra desde que are Ndodana joinchechjian Ndo nontte.

³⁵ Ixin janha venhe na jintta, co jaha ra chjana ra tti joine; co venhe na jinda co jaha ra chjana ra tti vihi; janha vacji inchin chojni de ojé nontte co jaha ra chjana ra nchia tti janha joarihi.

³⁶ Janha ǵonhi lontto joarichonda, co jaha ra chjana ra lontto que joaringaha; janha conina co jaha ra joasotsjena ra; janha viaxinna ngain cárcel, co jaha ra joasotsjena ra.”

³⁷ Cottimeja tti chojni jian rrondaǵho na: “ǵQuesa vicon na que soixin venhe jintta, co janha na ján chjaha ra tti jointte? ǵO quesa vicon na que soixin venhe jinda co janha na ján chjaha ra tti vihi?

³⁸ ǵO quesa vicon na que soixin vacji inchin chojni de ojé nontte, co janha na ján chjaha ra nchia tti joarihi? ǵO quesa joarichondaha lontto co janha na ján chjaha ra lontto?

³⁹ ǵO quesa vicon na janha na que soixin coniha o joarihi ngaxinhi cárcel co janha na ján joasotsjaha ra soixin?”

⁴⁰ Co janha tti Rey na rrondaǵhjan: “Atto seguro tti rrindattjo ra que cain tti jian que joinchehe ra ngain chojni tehe que ditticaon na, masqui chojni mé anto importanteha na, pero rroǵho ixin nganji na janha tti joinchehe ra mé.”

⁴¹ Cottimeja janha tti Rey na rrondattjan tti chojni que te lado cjon na: “Sattjixin ra de nganji na janha, jaha ra chojni jianha. Sattji ra ngain

infierno tti xonhi tiempo danga xohi, que mé conchjian para ixin inchínji conixin cain ángel de jehe.

⁴² Ixin janha venhe na jintta co jaha ra chjanaha ra tti joine; venhe na jinda co chjanaha ra tti vihi.

⁴³ Janha vacji inchin chojni de ojé nontte, co jaha ra chjanaha ra nchia tti joarihi. Janha ivechondaha lonttona, co jaha ra chjanaha ra lonto. Janha conina, cottimeja viaxinna ngain cárcel, co jaha ra joasotsjenaha ra.”

⁴⁴ Cottimeja jehe na rrondačo na: “¿Quesa vicon na que soixin venhe jintta o venhe jinda, o inchin chojni de ojé nontte, o quesá vicon na que soixin ijoarichondaha lontoa, o quesá que soixin coniha, o viaxinha ngain cárcel co janha na cjoenguijnaha ra soixin?”

⁴⁵ Co janha tti Rey na rrondattjan na: “Atto seguro tti rrindattjo ra que cada nttiha que čoha ra cjoenguijna ra chojni tehe que ditticaon na janha masqui chojni mé anto importanteha na, ngain rato mé rročo ixin jaha ra cjoenguijnaha ni ra janha.”

⁴⁶ Cottimeja cain chojni jihi satsji na ngain infierno tti xonhi tiempo danga xohi, co tti chojni jian satsji na tti rrochonda na iná vidé na naroaxin que xonhi tiempo tsjexin.

26

*QueXén Xaxaon na para tse na Jesús
(Mr. 14.1-2; Lc. 22.1-2; Jn. 11.45-53)*

¹ Are Jesús joexin ndačo cain yá, jehe ndačo ngain chojni que vacao:

² —Inchin jaha ra onoha ra, nttihi yó nchanho tsí tti quiai dinhi pascua co janha, tti Xí que joixin de ngajni, jehe na rrondaço na para rrotse na na co sinchecrucificá na na.

³ Cai ngain xajeho nchanho mé cain xidána que ttetonha ngain icha xidána co cain ximaestroe ley Israel co cain xittetonha ngain nihngo, cain chojni mé xatte na ngain patioe palacioe Caifás, tti dána icha importante.

⁴ Nttiha cjoaoxin na de ixin quexén sinchehe na para que sincheyehe na Jesús para rrotse na co nasoenxon na.

⁵ Pero vinttendaço na:

—Sonttoha na ngain mero nchanho de quiai para que tsoñaoha chojni.

*Ná nchí cointtjitte aceite cuerpoe Jesús
(Mr. 14.3-9; Jn. 12.1-8)*

⁶ Ngain tiempo mé Jesús vehe ngain rajna Betania ngain nchiandoha Simón tti vancheguinhí na Leproso.

⁷ Co nttiha, are tene na ngain mesa conchienne ná nchí que joicao ná xoçao de joxon marmol hasta jíche de aceite que anto xajni co anto rentte. Jehe ncha cointtjitte ncha aceite mé ngataha já Jesús.

⁸ Are chojni que vacao Jesús vicon na yá, coñao na co coexinhí na ndaço na:

—¿Quedonda coxinoa aceite yá?

⁹ Nchao rrocchji aceite yá conixin tsje tomi para rrocjenguijnaxin na chojni noa.

¹⁰ Jesús coinhi mé, co jehe ndaço ngain na:

—¿Quedonda jañá techo ra ixin nchí jihi? Tti jehe ncha joinchehe ncha nganji na janha; jihi ná cosa jian.

¹¹ Ixin chojni noa cain tiempo sintte na ngayaha ra, pero janha cainxinha tiempo sarihi ngayaha ra.

¹² Tti joinchehe nchí jihi, are jehe ncha cointtjitte ncha aceite cuerpona, jehe ncha ocoinga na ncha yá para are rrořavá na.

¹³ Atto seguro tti janha rrindattjo ra que cain tti rrondačo na tti jian joajna jihi ngoixin mundo, cai rrondačo na tti joinchehe nchí jihi para rrořaxaonxin na ncha.

Judas ndačo para rrotse na Jesús

(Mr. 14.10-11; Lc. 22.3-6)

¹⁴ Cottimeja ná de tti tteyó chojni que vacao Jesús, mé vinhi Judas Iscariote, cjoí para joicjao canxion xidána que vaquetonha ngain icha xidána,

¹⁵ co ndačo ngain xa:

—¿Quejanhi tomi rrochjana ra si janha rrondattjo ra queřen sinchehe ra para rrotse ra Jesús?

Cottimeja jehe xa cjoenguehe xa hna treinta tomi de plata.

¹⁶ Co desde ngain rato mé Judas cjoé queřen sinchechienhe Jesús ngá rá xidána mé.

Are joincaho Jesús tti tteyó chojni que vacao

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Saho nchanho de tti quiai que jine na niottja que chondaha levadura, tti tteyó chojni que vacao

Jesús conchienne na ngain jehe co joanchiangui na co ndačo na:

—¿Quettinó sinttachjianxin na tti sintte soixin para ngain quiai pascua?

¹⁸ Jesús ndačo ngain na:

—Ttji ra ngain Jerusalén ngain nchiandoha tti xí que jaha ra onoha ra co ndache ra que janha ndačhjan que ochian jói tiempo para janha ndasenne na co ngain nchiandoha jehe sinttasayaxin janha tti quiai pascua conixin chojnina que čhjinha.

¹⁹ Chojni mé vitticaon na joinchehe na inchin coetonha Jesús, co nttiha joinchechjianxin na cain tti joine na ngain tti quiai pascua.

²⁰ Ngain ttie mé Jesús joinecaho tti tteyó chojni que vacao.

²¹ Co are cain na tatene na, jehe ndačo ngain na:

—Atto seguro rrindattjo ra que ná de jaha ra rrondate chojni quečén para rrotse na na janha.

²² Cottimeja cain jehe na anto vinttechín na co coexinhi na, ná na co ná na joanchiangui na ngain Jesús co ndačo na:

—¿Apoco janha?

²³ Co Jesús ndačo ngain na:

—Ná tti rrinequina janha ngain lato jihi, mé tti rrondate chojni quečén para rrotse na na.

²⁴ Ján ndoa janha, tti Xí que joixin de ngajni, senhe na inchin ndačo ngain tti jitaxin Palabré Dios, pero anto tangui tsonhe tti rrondate chojni quečén para rrotse na na. Icha jian para ixin jehe si rroconcjiha.

25 Cottimeja nichja Judas, tti ndache chojni que xén para rrotse na Jesús, co jehe ndačo ngain Jesús:

—Maestro, ¿apoco janha?

Jesús ndačo ngain:

—Ján, jaha.

26 Are tejine na, Jesús coá niottja co joanjo gracias ngain Dios, co váña nio. Cottimeja joanjo nio ngain chojni que vacao, co ndačo ngain na:

—Jintte ra, jihi rročo cuerpona janha.

27 Cottimeja coá tti vaso de vino, co joanjo gracias ngain Dios. Cottimeja joanjo ngain na co ndačo:

—Dihi ra cainxin ra jaha ra vino jihi,

28 ixin jihi tti rročo jnina janha que sinchese gurá tti trato naroaxin. Co jnina singo jni para rroxengaxin hna tti jianha que nchehe tsje chojni.

29 Pero rrindattjo ra que janha irrocjanha na sihi vineo uva hasta tti nchanho que janha conixin jaha ra sonho na tti vino naroaxin ngain lugar tti ttetonha Ndodana ngajni.

Jesús ndačo que Pedro rrondačo ixin jehe chonxinha Jesús

(Mr. 14.26-31; Lc. 22.31-34; Jn. 13.36-38)

30 Co vinttetsje na ná himno, cottimeja savinttecji na ngain jnanchjan que dinhi Nttaolivo.

31 Cottimeja Jesús ndačo ngain na:

—Janha tti cain jaha ra sinttechinhi ra de ixin janha ngain ttie jihi, ixin ndačo ngain tti jitaxin Palabré Dios: “Dios nasoenxon tti ttingaria coleco, co cain coleco rrochjequé va.”

³² Pero después que janha rroxechon na, janha saho tsji Galilea que jaha ra.

³³ Cottimeja Pedro ndaço ngain Jesús:

—Masqui cainxin na sinttechín na de ixin soixin, pero janha nahi.

³⁴ Cottimeja ndaço Jesús:

—Janha rrindattjo seguro que ngain ttie jiji, saho que rrotsje conttaxichia, jaha orrondaço ninxin nttiha que chonxinha na.

³⁵ Pedro ndaço:

—Masqui rrochonda que senxin na tti soixin senxin, pero rrondaçhjanha ixin chonxinha soixin.

Co cain ni icha ndaço na xajeho cai.

*Are Jesús joichetsenhe ñao Dios ngain Getsemaní
(Mr. 14.32-42; Lc. 22.39-46)*

³⁶ Cottimeja Jesús conixin tti chojni que vacao joihi na ngain ná lugar dinhi Getsemaní, co nttiha Jesús ndaço ngain na:

—Nttihi dintte ra co chonna ra ixin janha sinttatsán ñao Dios.

³⁷ Co Jesús sajoicao Pedro co cayoi xenhe Zebedeo, co jehe coexinhi conohe ná joachjaon anto soji ngain almé.

³⁸ Cottimeja jehe ndaço:

—Janha tonona ngain almana ná joachjaon anto soji que hasta rinaho ndasenhe na. Dittoha jaha ra nttihi nganji na janha, co dinttechinha ra.

³⁹ Cottimeja Jesús sacjoi nchion icha cjin co nttiha vecjantaha nontte, co joinchetsenhe ñao Dios, co ndaço:

—Padre, si nchao, tançhjandaha na que janha sattoha ngain tti anto tangui que tsonna; pero

tsoenha inchin janha rinaho, sino que tsonhe inchin soixin rinao.

⁴⁰ Cottimeja cjan para ngain tti ní chojni que joicao, pero are jehe joiji nttiha, jehe na otatejoa na. Co jehe ndačo ngain Pedro:

—¿Acoixianha ra tavinttetsjehe ra ni ná hora para rroguinttenda ni ra?

⁴¹ Tadinttetsjehe ra co nchetsenhe ra ñao Dios, para que xonhi cosa jianha sinttatjanji ra. Ndoa que espiritua ra anto rinao sintte jian, pero cuerpoa ra sojiha.

⁴² Yoxin nttiha jehe cjan para joinchetsenhe ñao Dios iná co ndačo:

—Padre, si čoha para que soixin tsančjandaha na janha satto ngain tti anto tangui jihi, que tsonhe inchin soixin rinao remé.

⁴³ Cottimeja jehe cjan co jehe na tatejoa na iná ixin jmacon na icoixinha de anto cottačhin.

⁴⁴ Jesús nttiha cointtohe na co jehe sacjan para joinchetsenhe ñao Dios ninxin nttiha, co ndačo xajeho.

⁴⁵ Cottimeja cjan ngain tti vittohe jehe tti ní chojni que joicao, co ndačo ngain na:

—Janché dinttečhin ra co nchejogaha ra. Hora ojoí que janha, tti Xí que joixin de ngajni, sinchechienhe na na ngá rá chojni jianha.

⁴⁶ Dingattjen ra sachjin na; ojoí tti ndačo quežén para rrotse na na janha.

Are tse na Jesús

(Mr. 14.43-50; Lc. 22.47-53; Jn. 18.2-11)

⁴⁷ Jesús xa jindačo jañá are ojoí Judas, ná de tti tteyó chojni que vacao Jesús. Judas joiaho anto

tsje chojni que teyá na espada co nttá. Xidána que vaquetonha ngain icha xidána co xittetonha ngain nihngo, xí mé rroanha cain chojni mé.

⁴⁸ Judas, tti joindache xa queñén para tse na Jesús, mé dindačo ngain cain chojni que joiaho:

—Tti janha tsetoxin para rrochjaha joajna, jehe mé. Tse ra co sattjiho ra.

⁴⁹ Cottimeja jehe Judas conchienne ngain Jesús co ndačo:

—¡Deo, Maestro!

Co coetoxin.

⁵⁰ Jesús ndačo ngain Judas:

—Amigo, ¿quedonda joihi nttihi?

Cottimeja cain nicjoi conchienne na co tse na Jesús co sajoicao na.

⁵¹ Ngain rato mé, ná de tti tteyó chojni que vacao Jesús joantsje espadé co conchinjihi ndatsjoen ná xinchehe xé xidána icha importante.

⁵² Cottimeja ndačo Jesús ngain:

—Ttenchjinha espadá lugué espada. Ixin cain chojni que tjayaxin conixin espada, conixin espada senxin cai.

⁵³ ¿Anoaha que janha nchao rrondattjan Ndo-dana co jehe Ndo jaxon rrorroanna Ndo icha que setenta mil ángel?

⁵⁴ Pero si jamé rroconhe, ¿queñén para tsonhe tti ndačo ngain tti jitaxin Palabré Dios, que mé chonda que siconhe?

⁵⁵ Cottimeja Jesús ndačo ngain cain chojni que cjoi:

—¿Ajoih jaha ra conixin espada co nttá para joitse ni ra como si janha rrocji ná xichehe? Cain nchanho vatto janha vagarihi ngayaha ra ngain

nihngo icha importante para vanttacoanha ra de ixin Dios co xonhi tiempo tse ni ra.

⁵⁶ Pero cain jihi tsonhe para que siconhe cain tti dindaço cain profeta ngain tti jitaxin Palabré Dios.

Cottimeja cain tti chojni que vacao Jesús nda-cointtohe na jehó Jesús nttiha co jehe na sacinga na.

Are Jesús ngain juzgadoe nihngo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Cain nijoitse Jesús sajoicao na para ngain nchiandoha Caifás, mé vehe xidána icha importante, co nttiha tti dixatte cain ximaestroe ley co cain xittetonha ngain nihngo.

⁵⁸ Co Pedro ta tti cjin jirroexin hasta joihi ngain patioe nchiandoha jehe Caifás. Nttiha joixinhi Pedro co tavehe ngayehe xipolicía que te nttiha para vicon quehe joinchehe ni icha ngain Jesús.

⁵⁹ Cain xidána que vaquetonha ngain icha xidána, co cain xittetonha ngain nihngo, co cain xittetonha ngain juzgadoe nihngo cjoé xa quehe sinchecaxin xa Jesús, masqui ndoaha joinchehe Jesús ná cosa jianha, jehó para ttjé xa para na-soenxon xa Jesús.

⁶⁰ Pero xonhi cosa vittja xa masqui anto tsje chojni conchienne para ndaço na cosa ndoaha de ixin quehe joinchehe Jesús. Cottimeja vint-teconchienne yó chojni testigo que nichja cosa ndoaha.

⁶¹ Chojni mé ndaço na:

—Xí jiji ndačo xa: “Janha nchao tsonxante ningoe Dios, co rrocjan na sinttachjian nihngo iná ngain nincoa nchanho.”

⁶² Cottimeja vingattjen xidána icha importante co ndačo xa ngain Jesús:

—¿Axonhi nichja jaha? ¿Andoa tti ndačo chojni tehe o ni nahi?

⁶³ Pero Jesús tencoa. Cottimeja ndačo xidána icha importante mé:

—Conixin joachaxín nombré Dios que jichon, janha rritetonha jaha que rrondachjenji na ndoa. Ndachjenji na si jaha tti Cristo, Xenhe Dios.

⁶⁴ Jesús ndačo:

—Ján, janha inchin jaha ndačo. Co cai rrondat-tjo ra jaha ra que sicon ni ra janha, tti Xí que joixin de ngajni, sarihi ngain lado jian de Dios que chonda cainxin joachaxin, co sicon ni ra sihi ngacjan ttjoi de ngajni.

⁶⁵ Cottimeja jehe xidána icha importante co-inchje xa lonttoe xa para ná señal que jehe xa anto coñao xa co ndačo xa:

—Xí jiji nichja xa jianha para ixin Dios. ¿Quehe rrogondá na icha testigo? Jaha ra coinhi ra tti jianha que ndačo xa.

⁶⁶ ¿Quehe xaxaon ra?

Cain na ndačo na:

—Jiquininxin xa senhe xa.

⁶⁷ Cottimeja canxion na cjoatjo na nttatté na ngá con Jesús co xanguí na tton. Icanxin na xanguí na manazo ngá con Jesús.

⁶⁸ Co ndačo na ngain:

—Jaha que Cristo, ¡datsoenhe quensen goen!

Pedro ndačo que jehe chonxinha Jesús
(Mr. 14.66-72; Lc. 22.56-62; Jn. 18.15-18, 25-27)

⁶⁹ De cain mé Pedro tají ndoja ngain patio, co conchienne ngain jehe ná nčhimozé xidána icha importante co ndačo nča:

—Jaha cai vacjiho Jesús, tti joixin nonttehe Galilea.

⁷⁰ Pero ngattoxon con cain nite nttiha, Pedro ndačo:

—Nonaha de quehe rrindachjenji na.

⁷¹ Pedro are jehe sajittji ngain puerté patio are vicon iná nčhimozé xidána mé, ndačo nča ngain nite nttiha:

—Xí jiha cai vacao xa Jesús, tti rajné Nazaret.

⁷² Pedro joinchejurá co ndačo:

—Janha chonxinha xí yá.

⁷³ Nchion después cain nite nttiha conchienne na ngain Pedro co ndačo na ngain:

—Ján ndoa, jaha cai ná de tti chojní Jesús ixin datsoan ni hasta de queǵén nichja.

⁷⁴ Cottimeja Pedro joanchia ná castigo ngain Dios para ixin jehe ixin joinchejurá ngain Dios co ndačo:

—Dios nchao nasoenxon na janha si ndoaha tti rrindachjan que janha choxinha xí yá.

Co ngain rato mé tsje ná conttaxichia.

⁷⁵ Cottimeja Pedro ǵaxaon tti ndačo Jesús ngain jehe: “Saho que conttaxichia rrotsje va, jaha orrondačo ninxin nttiha que ixin chonxinha na.” Cottimeja Pedro vačhjexin de nttiha co anto tsjanga.

27

Are joicao na Jesús ngain Pilato (Mr. 15.1; Lc. 23.1-2; Jn. 18.28-32)

¹ Are ovingasán cain xidána que vaquetonha ngain icha xidána co cain xittetonha ngain ningoe chojni judío cjoao na ixin queḗén sinchehe na para nasoenxon na Jesús.

² Cottimeja coia na Jesús co joicao na ngain Poncio Pilato, tti vehe xigobernador.

Are ndavenhe Judas

³ Judas, tti joindache xidána para tse na Jesús, are jehe conohe que nasoenxon na Jesús, jehe ḗaxaon que jianha joinchehe co anto feo conohe, co cjan cjoí ngain xidána que vaquetonha ngain icha xidána co xittetonha ngain nihngo para joiconcjan tti treinta tomi de plata,

⁴ co ndačo ngain xa:

—Janha jianha jointtaha ixin joindattjo ra queḗén para tse ra ná xí que ḗonhi jica para que nasoenxon ra xa.

Pero jehe xa vinttendačo xa ngain Judas:

—Pero mé, ¿janha na quehe ndosenna na? ¡Yá problemá jaha!

⁵ Cottimeja Judas cjoa tomi mé ngaxinhi nihngo nttiha, co sacjoi para joiquentedonguihi ttosin ná jino jeho para ndavenhe.

⁶ Jehe xidána que vaquetonha ngain icha xidána joatse xa tomi mé co ndačo xa:

—Choha tsín na tomi jihi ngain cajé tti tomi que danjo chojni ixin tomi jihi xengaxin hna jni.

⁷ Cottimeja cjoao chó xa para que conixin tomi mé coenaxin xa tti nontte que dínhi Nonttehe tti

Nchechjian Chi para que nttiha sehe ná lugar tti tsjavá na chojni que ttixin de iná nación.

⁸ Mexinxin jngui mé dinhi hasta jai, Jngui de Jni.

⁹ Jamé joiconhe tti dindačo profeta Jeremías: “Coá na tti treinta tomi de plata, (tti tomi que chojni Israel cjoenga hna para ixin jehe).

¹⁰ Conixin tomi mé coenaxin na tti jnguihi tti nchechjian chi, co jamé conhe inchin coetonna Dios.”

Jesús ngain Pilato

(Mr. 15.2-5; Lc. 23.3-5; Jn. 18.33-38)

¹¹ Joicao na Jesús ngain xigobernador que vinhi xa Pilato, co jehe xa joanchianguihi xa Jesús co ndačo xa:

—¿Ajaha tti Rey de chojni judío?

Jesús ndačo ngain xa:

—Ján janha jañá inchin jaha ndačo.

¹² Co are cain xidána que vaquetonha ngain icha xidána, co cain xittetonha ngain nihngo tenichja xa tti jeha ndoa de ixin Jesús, jehe xonhi ndačo.

¹³ Cottimeja Pilato ndačo ngain Jesús:

—¿Attinha cain tti tendačo na de ixin jaha?

¹⁴ Pero Jesús xonhi ndačo ngain Pilato; co jamé jehe xigobernador Pilato goan xa admirado co inoeha xa quehe rrojinchehe xa ngain rato mé.

Are ndačo na ixin Jesús chonda que ndasenhe

(Mr. 15.6-20; Lc. 23.13-25; Jn. 18.38—19.16)

¹⁵ Nchao remé, ngain cain quiai mé xigobernador vechonda xa costumbre de vacančhanda xa ná de tti teaxinhi para savacji. Jehe xa vacančhanda xa quexeho de tti chojni que vaquinchiehe jehe na.

16 Ngain tiempo mé nttiha vehe ngaxinhi cárcel ná tti vinhi Barrabás, co tsje chojni chonxin jehe mé.

17 Co are cainxin chojni xatte na nttiha, Pilato joanchiangui ngain na co ndačo:

—¿Quensen rinao ra tsančjanda janha para que jehe satsji; a Barrabás o ani Jesús, tti dinhi Cristo?

18 Jamé ndačo Pilato ixin oconohe que cain xidána conchjoehe xa ngain Jesús ixin jehe cainxin jian vanchehe, mexinxin joinchechienxin xa Jesús nttiha.

19 Ngain rato mé are Pilato tajitaha nttaxintaoen tti vanchejuzguexin chojni, nčhičihi rroenhe nča ná joajna que dindačo nča: “Dixintteha jaha ngain xí jian yá ixin are ttie, janha atto feo coxinanxin de ixin jehe xa.”

20 Pero cain xidána que vaquetonha ngain icha xidána co xittetonha ngain nihngo ndache xa cain chojni que rrondačo na ixin Barrabás tti sačhjexin cárcel, co ixin Jesús chonda que senhe.

21 Jehe Pilato joanchiangui ngain na iná, co ndačo:

—¿Quexehe de cayoi xí tti rinao ra tsančjanda para que jehe satsji?

Co cain jehe na vinttendačo na:

—Barrabás.

22 Pilato joanchiangui ngain na iná co ndačo:

—¿Co quehe sinttaha janha conixin Jesús, tti dinhi Cristo?

Cain na ndačo na:

—¡Nchecrucifá!

23 Cottimeja Pilato ndačo ngain na:

—¿Quehe cosa jianha joinchehe?

Pero jehe na cjan na ndačo na sén iná:

—¡Nchecrucificá!

²⁴ Are Pilato vicon que čhoha na para que Jesús sarrocji, sino que cain na anto tedoñao na, Pilato coetonha para que joí jinda, co contti rá ngattoxon con cainxin chojni nttiha, co ndačo ngain na:

—Janha xonhi sarica ixin ndasenhe xí jihi, ixin jehe xa xonhi cosa jianha joinchehe xa. Jaha ra tti sintteca ra yá.

²⁵ Co cainxin chojni ndačo na:

—¡Janha na conixin xanhna na, mé tti sintteca na ixin ndasenhe xí yá!

²⁶ Cottimeja Pilato joantsje Barrabás para coančjanda sacjoi, co coetonha para que vicaon Jesús. Cottimeja Pilato joanjo Jesús para que goan crucificado.

²⁷ Cottimeja xisoldadoe jehe Pilato joicao xa Jesús ngain palacio, co xatte cainxin xisoldado ngandanji Jesús.

²⁸ Cottimeja joantsjehe xa lonttoe Jesús co joinchetsá xa ná lontto jatse.

²⁹ Co joinchecjinga xa Jesús ná corona de joxon nttanchaha, co joinchetse xa ná nttá ngain rá lado jian. Cottimeja vinttettoxin nttajochjihi xa ngatto con Jesús, co cjoanoa xa co ndačo xa ngain:

—¡Viva tti Rey de chojni judío!

³⁰ Cai cjoatjo xa nttatté xa, co coá xa tti nttá que joinchetse xa Jesús para xanguí xa nttá já Jesús.

³¹ Cottimeja are joexin cjoanoa xa jañá, joantsjehe xa tti lontto jatse que joinchetsá xa co coengaha xa lonttoe. Cottimeja sajoicao xa para joinchecrucificá xa.

*Are joinchecrucificá xa Jesús
(Mr. 15.21-32; Lc. 23.26-43; Jn. 19.17-27)*

³² Co are tedačhjecaixin xa Jesús de nttiha, vetan xa ná xí que vinhi Simón que joixin de ngain ciudad de Cirene; co joinchecame xa crue Jesús.

³³ Co jamé joiicaho xa Jesús conixin Simón ngain ná lugar que dinhi Gólgota que rročo Lugué Nttalorojá Chojni.

³⁴ Nttiha chjexin xa Jesús ná vino que jittecyan ná cosa anto tsja. Pero are Jesús joincheprobá vino mé, jehe čhoha vihi.

³⁵ Co are ojoinchecrucificá xa Jesús, cain xisol-dado mé joantsje xa suerte de lonttoe Jesús, para jamé chjejehe xa lontto mé. Jañá conhe para joiconhe tti dindačo profeta: “Joantsje na suerte para chjejehe na lonttona.”

³⁶ Cottimeja tavintte xa nttiha para vinttenda xa.

³⁷ Co nganito cruz icha noi que já Jesús coín xa ná letra que ndačo quedonda chonda que ndavenhe. Co letra mé ndačo: “Xí jihi Jesús, tti Rey de chojni judío.”

³⁸ Cai yó xichehe goan xa crucificado conixin Jesús, ná xa vehe crue xa lado cjon Jesús, co iná xa lado jian de Jesús.

³⁹ Co cain nivatto nttiha cjoanoa na Jesús co coenttjoinga rroha na.

⁴⁰ co ndačo na ngain Jesús:

—Jaha que rrojinchexantte nihngo icha importante co nincoa nchanho ttjexinxin nchechjian nihngo iná, danianxin de cruz jaho, si ndoa jaha Xenhe Dios.

⁴¹ Jamé cai cjoanoa cain xidána que vaquetonha ngain icha xidána, ximaestroe ley Israel, co xifariseo conixin cain xittetonha ngain nihngo, co ndache chó xa:

⁴² —Jehe nchao cjoenguijna icha chojni, pero jehe čoha tsjenguijna cuerpoe jehe mismo. Si ndoa jehe tti Rey para ixin ján na, socon na sanianxin de ngain cruz yá para que sotticaon na jehe.

⁴³ Jehe chonda confianza ngain Dios, mexinxin jai socon na si Dios tsančhjandaha para senhe, si ndoa Dios anto rinao jehe ixin jehe ndattjo na que jehe tti Xenhe Dios.

⁴⁴ Jamé ndačo chojni hasta tti cayoi xichehe que vintte crucificado nttiha ngaca jehe cjoanoa xa Jesús cai.

Are ndavenhe Jesús

(Mr. 15.33-41; Lc. 23.44-49; Jn. 19.28-30)

⁴⁵ Cottimeja ngoixin ngataha nontte ndaconaxin xehe desde ngosine nchanho hasta ní hora tsocjin.

⁴⁶ Co inchin ní hora tsocjin Jesús coyao soji co ndačo:

—Elí, Elí ¿lama sabactani? —que rročo: Diona, Diona, ¿quedonda ndacointtona na janho?

⁴⁷ Canxion de tti xite nttiha coinhi xa mé co ndačo xa:

—Xí jihi jidayé xa tti profeta Elías.

⁴⁸ Ngain rato mé ná tti xite nttiha coinga xa joiroé xa ná esponja. (Cosa mé datse jinda inchin chjon algodón.) Co jehe xa xanguí xa esponja mé ná vino anto san inchin vinagre co coencjin xa con ná nttá. Cottimeja tsín xa noi ngaca rroha Jesús para que jehe rroguihi.

⁴⁹ Pero xi icha ndačo xa:
—Tančhjanda, socon na aco ndoa tsí Elías para tsjenguijna.

⁵⁰ Jesús cjan coyao soji iná, co ndavenhe.

⁵¹ Ngain rato mé tti manta que vettoa ngaxinhi tti nihngo icha importante, hasta yó vichjenga manta mé de noi hasta tti nontte. Co coingui nontte hasta tjao vichjenga.

⁵² Co tsje lugar tti xavá chojni xiré co tsje chojni que vaguitticaon na Dios, co ndavenhe na, are mé xechon na.

⁵³ Cottimeja vačhje cain chojni jihi de ngain tti xavá na, co después de xechon Jesús vinttecji na ngain ciudad de Jerusalén. Nttiha anto tsje chojni vicon jehe cain chojni mé que xechon.

⁵⁴ Are jehe xicapitán conixin cain xisoldadoe xa que tenda Jesús nttiha vintteguicon xa que coingui nontte co conaxin xehe co icha cosa que conhe, anto vinttexaon xa co vinttendačo xa:

—Ján ndoa que xí jihi Xenhe Dios.

⁵⁵ Co cjinha de ngain cruz nttiha tate canxion nčhí que vacji conixin Jesús desde ngain Galilea co vagayaconhe nča Jesús.

⁵⁶ Nttiha vehe María Magdalena, co María tti janné Jacobo co José, co janné cain xenhe Zebedeo.

Are Jesús xavá

(Mr. 15.42-47; Lc. 23.50-56; Jn. 19.38-42)

⁵⁷ Are coexinhi conaxin xehe, joí ná xí anto rico que vinhi xa José, xí mé rajné xa Arimatea, co jehe xa cai vitticaon xa Jesús.

⁵⁸ Jehe José mé cjoí joitsjehe Pilato para joanchiehe joachaxin de sasicao cuerpoe Jesús.

Cottimeja Pilato coetonha que sanjo xa cuerpoe Jesús.

⁵⁹ José joinchegania cuerpoe Jesús co coensiha ná manta anto roa.

⁶⁰ Co joicán cuerpo ngain tti cueva que jehe José joinchecjian ngadoho ná ttjao para ixin jehe José o quexeho de nindoha que ndarroguenhe icha saho. Cottimeja jehe coejé cueva mé conixin ná xo jie co sacjoi.

⁶¹ Co nttiha tají María Magdalena, co tti iná María tate na ngandanguí jehe cueva mé.

Tti venda lugar tti xavá Jesús

⁶² Ngain nchanho yoxin, rrocho sábado, cain xidána que vaquetonha ngain icha xidána co cain xifariseo vinttecji xa joitsjehe xa Pilato,

⁶³ co vinttendačo xa ngain:

—Janha na xaxanho na que tti xí ndavenhe que vanichja cosa ndoaha, jehe ndačo are xa vechon que ngain nchanho ninxin jehe rroxechon.

⁶⁴ Mexinxin janha na rinaho na que soixin rroanha canxion xisoldado para sinttenda xa tti jehe jiřavá hasta tti ngain nchanho ninxin para que chojni que vacao tsjiha na ngain ttie co siqué na cuerpoe. Cottimeja rrondache na icha chojni que ixin jehe xechon. Co si jamé rrondačo na, icha feo tsonhe que are saho.

⁶⁵ Pilato ndačo ngain xa:

—Yá chonda ra canxion xisoldado. Jaha ra ttji ra co jian ttejehe ra cueva tti jiřavá.

⁶⁶ Cottimeja savinttecji na conixin xisoldado co coín na ná señal ngain tti xo que jije cueva mé

para que sicon na si xo mé tsingui xo. Co nttiha cointtohe na xisoldado para vinttenda xa.

28

Are xechon Jesús

(Mr. 16.1-8; Lc. 24.1-12; Jn. 20.1-10)

¹ Are vatto tti nchanho que nchejogaha ni, co ojidingasán tti saho nchanho de semana, María Magdalena co tti iná María cjoí na joitsjehe na tti xavá Jesús.

² Ngain rato mé coingui nontte anto soji. Are mé ná ángel de Dios xincanjinxin de ngajni co joí ngain cueva mé. Jehe vinttjia tti xo que jijé puerté cueva co tavehe ngataha xo mé.

³ Angel mé anto jitonguixima inchin tti xohi que xincanjinxin de ngajni, co lonttoe anto roa lontto inchin chintta que jí ngataha jnanchaha.

⁴ Are tti xisoldado que tenda nttiha vicon xa mé, anto vinttexaon xa hasta ndavinttji xa de joaxaon, xá ndavintteguenhe xa.

⁵ Cottimeja ángel mé ndačo ngain jehe yó nchí que vinttecji:

—Xaonha ra. Janha nona que tettjé ra Jesús, tti joinchecrucificá na.

⁶ Jehe coha nttihi ixin jehe oxechon inchin jehe ndačo. xacoi ra sitsjehe ra tti lugar que jehe na coín na.

⁷ Jaicoa ttji ra co dindache ra tti chojni que vacao: “Jehe ndavenhe pero jai jehe oxechon co jehe tsji Galilea icha saho que jaha ra. Nttiha siconxin ra.” Jeho yá tti chonda janha que joindattjo ra.

⁸ Cottimeja jehe nčí mé jaicoa savinttecjixin ncha de nttiha. Jehe ncha vintteñaon ncha co ãajeho tiempo anto vintteché ncha cai. Co coinga ncha joidache ncha tti chojni que vacao Jesús.

⁹ Co are jehe ncha tettinga ncha, Jesús conchienne ngain ncha co joanjo joajna ngain ncha. Jehe ncha vintteconchienne ncha ngain Jesús co vinttettoxin nttajochjihi ncha co cjóa ncha rotté Jesús co joinchesayehe ncha.

¹⁰ Co jehe ndaço ngain ncha:

—Ñaonha ra. Tji ra dindache ra chojnina que jehe na chonda na que tsji na Galilea co nttiha siconxin na na janha.

Tti coequin xisoldado que vinttenda tti ãavá Jesús

¹¹ Are nčí mé savintteguicao ncha joajna mé, canxion xisoldado que vinttenda lugar tti ãavá Jesús vinttecji xa joidache xa xidána que vaquetonha ngain icha xidána cain tti conhe.

¹² Co xí mé jaicoa joidache xa cain xittetonha ngain nihngo para que cjoao chó xa queñén sinttenchehe xa. Cottimeja vintteganjo xa anto tsje tomi ngain tti xisoldado que vinttenda lugar tti ãavá Jesús,

¹³ co vinttendaço xa ngain xisoldado mé:

—Jaha ra ndaço ra que are jaha ra tatechin ra ttie, cjoit tti chojni que vacao Jesús co coé na cuerpoe.

¹⁴ Co si xigobernador tsonohe xa jihi, janha na sicjao na xa co jaha ra ãonhi tsonha ra.

¹⁵ Cottimeja cain xisoldado mé vittoexin xa vinttegayé xa tomi mé, co vinttecji xa co vinttendaço

xa inchin vitonhe xa. Co jamé ttequin chojni judío hasta jai.

*Tti coetonhe Jesús nirepresentanté jehe
(Mr. 16.14-18; Lc. 24.36-49; Jn. 20.19-23)*

¹⁶ Jamé tti ttejngo chojni que vacao Jesús sav-inttecji na para Galilea ngain tti jna que Jesús coetonhe na.

¹⁷ Co are vintteguicon na Jesús, jehe na joinchesayehe na Jesús, masqui ittoha na xa vitticaonha na ixin jehe Jesús.

¹⁸ Cottimeja Jesús conchienne ngain na co ndačo:

—Janha ovayá cainxin joachaxin de ngajni co de nttihi ngataha nontte.

¹⁹ Jai jaha ra ttji ra ngain chojni de cainxin nación co ndache ra na que sitticaon na na janha co sintte na chojnina, co ncheguitte ra na conixin joachaxín nombré Ndodana co joachaxín nombrena janha tti Xenhe Ndo conixin joachaxín nombré Espíritu Santo,

²⁰ co nchecoenhe ra na sitticaon na sinchehe na cainxin tti janha coetonha ra. Co noha ra que janha rrihi nganji ra cainxin nchanho hasta are tsjexin mundo. Amén.

Tti jian joajné Jesucristo New Testament in Popoloca, San Marcos Tlalcoyalco

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

a23ba35e-b016-5f67-a705-694e460cf18a